

钦定四库全书

集部六

海壑吟稿

别集类五

明

提要

臣等谨案海壑吟稿十一卷明赵完璧撰完璧字全卿号云壑晚号海壑胶州人由岁贡生官至巩昌府通判是集诗六卷文五卷王三锡序其诗集谓嘉靖间筮宦司城抗直忤权奸与杨椒山公同厄按集中北司狱中七言律二首序云嘉靖甲寅秋秋曹檄捕豪校某因获罪东湖翁劾执坐死赖元老科台之力仅复瓦全云云东湖者陆炳别号也时炳为锦衣卫都督与严嵩表里为奸其势张甚完璧以指挥末秩能与之抗其狱中与杨继盛倡和诸诗有辛苦不妨淹日月援书喜有汉良臣等句继盛死西市完璧作杨烈妇词以哀之有小雅怨悱之遗可谓志节之士其诗多触事起兴吐属天然绝无叫嚣怒张之态亦与有明末造矫激取名者有殊徒以名位未高史不立传遂几于湮没不彰仅赖此集之存犹得畧见其始末亦足见正直之气有不得而销蚀者矣

乾隆四十六年九月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●海壑吟稿序

海壑赵先生今年八十余矣吟稿其平生所肆力且以自愉快者也盖先生位不偿才故以其未尽用之志寄之于诗久而成家积之成帙云先生之子为今大名守清廓君于余弟辅为寮长而与余侄坤同进士也则余于先生有世好之谊焉一日弟辅受是稿于清廓君既付之梓已又偕大名倅韩君等致书于余索余言以弁其端余取而阅之因得以见先生于诗详先生之始末则益嗟叹歆慕之矣昔太史氏有云诗三百篇大抵圣贤发愤之所为作也迄至盛唐如李翰林杜工部二大家古今称卓尔者亦皆意有所郁结不得通其道耳先生幼负才气谓功名可指取已而数不偶从岁荐就秩都下而先生业已着诗自娱无他愠居无何绩效懋着声籍籍于缙绅间人谓先生脱颖之才已试囊中矣然先生一意危行不为媵媚世竟以被中逮系方其时人皆为先生震怖顾先生特屹不为动适椒山杨公同时在狱与之吟咏酬答以道义相得甚驩于利害之临泊如也故余读是集中至独知心上原无累与授书喜有汉良臣之句则辄变色动容亟服之焉最后谢天水之郡判以归世方弹指咄咤以未能究先生之用为惜而先生内沾沾自喜以长有天地之日而竟其适于诗为幸盖自其立朝时已尝自命云何时谢朝组随意踏莓苔由是以观则先生者尤泥涂轩冕浮游尘埃之外古之所谓达者也先生既归徜徉林壑触趣成声或幽踪雅致广萧散之怀或精裁婉托寓无聊之感悯时迪志谈理训

真则翛然方之内含和茹泊悟玄超凡则悠然方之外其所咨嗟咏叹实时或自鸣其郁结不平而绝不为叫噪怒张以恣其臆盖先生之发愤于诗垂数十年而不为佞来之物以滑其内而夺其功故振之以雄丽而出之以优游卓绝一时有如斯者语曰用志不分乃凝于神岂谓是与假令先生以其直节壮猷托景青云系籍华懋表树崑廊之上驰骛万里之途其勳烈可胜道哉乃其所历宦踪仅仅止此遂卷之于泉石岩谷之间非其当矣然先生志不郁道不穷其发为诗章必不能自力以致必传于世如今虽使先生究所施旧勳烈于一时吾不知先生肯以此易彼否也虽然吾又闻先生年已逾耄而神犹屹屹不衰其文思不少减于壮岁矧今太守君抱猷宏峻且伟然有公辅之望由兹以往先生之未艾者年未已者诗而未可量者后人之勳业也则先生于不朽之事可谓兼之矣余复读先生诗至庭下伊皋之语历古诗家诂能有之乎■〈口茗〉嗟先生固足以自愉快矣哉济郡见峰王之垣顿首拜撰

●钦定四库全书

海壑吟稿卷一

（明）赵完璧 撰

○五言古诗

感兴

淳风不可挽大道成微茫
椒兰不自保恶楫以充囊
自爱琼佩姿期以扬清芳
美人改中路徒此明月光

闻慎修两台交荐

顾我寡昧子庸庸何所长
祇有一寸心可以昭夜光
藏息良有由持赠美人傍
念此蹇修理爱惜以崇芳

笼鸟叹

山鸟胡不幸罹此樊笼中
啄不获野田栖不及深丛
梳翎背旭日垂翅当寒风
徒抱旷逸怀侧目云霄鸿
祇绿笙簧音乃滞幽囚穷
嗟嗟耳目娱盍以物我通

冬夜书怀

新月衔寒山北风下檐楹
羁人夜秉烛孤坐远含情
渺渺海山曲依依凤凰城
禄薄十口饥官卑一身轻
印绶钳铁坚风尘魂梦惊
枳棘忍自栖盐车向谁鸣
舞剑尚余辉弹琴不成声
赖有杯中物啸歌仰太清

月林遗酒西台感赋

故人遗我酒我悲故人心
故人不可见使我愁思深
画地谁能违刻木威难禁
烟霜夜凄凄鸿鴈秋沉沉
衣葛当北风餐荼绝衷肠
怨艾去祸胎今古归福堂
把酒且自饮淋洗爵冤伤
嗟嗟同心人翦烛今何方

冬夜感怀

高斋夜独坐寂寂银蟾生
疎檐素影下闲阶秋水明
冷光侵我体清辉怡我情
独酌

不成醉幽吟无与赓坐久静不寐松风落寒声悠悠东山下岁晚沈高名拔剑自抚拭咄
暗空悲惊

饮马长城窟行

饮马长城窟马渴饮不已马饮良易足我怀当何止畴昔离故乡淹淫几万里明月
缺复圆边声日充耳精魂遶天涯日夜邈伊迩仰天不可呼归鸿背我起燕然勒几时大
刀难自揆一身寄他人未保生与死横颐断肠泪堕落长城水长城水不竭离情不终歇
弃妇辞

弃妇出兰房长辞薄幸郎忆昔授綬曰合卺双鸳鸯相为琴瑟欢宜室期余光自君
荡春心嬖爱章台倡冶容盲尔明荆布成恶裳娇歌褫尔魄沈默非巢簧销神复索家顾
谓邂逅良劬劳敬克室反目卒为殃子为邪孽迷妾为君子伤贱妾不足惜古道孤肝肠
泪出身亦出请试倡短长

代鹤言

山人遗鹤蓄久而驯扰弥甚家人戮焉羈诸柙无令纵恣嘖嘖晨暮不休余闻而叹
乃代言

元化泄灵淑产此神异姿皓洁焕冰彩不杂尘埃缙啄嫌四海云九霄惟所之忘机
天壤间何意虞罗欺铄我紫氛羽刷我青田思垂翅鸡鹜羣矫首燕雀嗤良玉污涂泥仙
格奴隶司昔为青云器今为粪壤遗郁郁寥廓抱依依知者谁开此含丹睛迹滞无异窥
胡为作近翫养翻以前期

静宁晓发

晓出静宁郭山川郁苍苍初日韬玄霞凄风下崇冈铅花肃寒色岚气昏朝光山木
涵烟古云泉嗽石凉我车亦何之高谊图忠良日短不遑食暮夜成仓皇空谷越营魂冷
候嗟薄裳遥途力应蹶修坂马玄黄鸿鴈声嗷嗷望之思渺茫飘飘迴不见横涕知几行

渔父词

世道久交丧人心不如水萧然一钓舟沧波吾老矣棹去镜中天归来芦叶里鱼鸟
作比邻风月还知己江山万古情烟雨平生喜云静卷钓丝得失何心尔雪中无羊裘日
长回猎士坐看惊涛帆戒险知谁是而无名利怀祸患胡罹此买得孤村醪醉中冥甲子
悠然快一眠化契青蓑底觉后作长吟横竹杂流征浩然天地间无复逾乐只谁能质姓
名鼓枻不相俟

樵父词

太古不可挽空山潜幽人世务无縶缚樵苏不为辛游日旷烟霭骋怀极嶙峋咄惜
耸壑材聊斧臃肿薪空翠冷入骨残霞每在身溪谷适蹙然鹿豕夙所亲朗唱振林木长
啸超风尘寓兴云与石逃名秋复春巢由慕狂踪尧舜非所钦岂云负叔敖含笑弃买臣
此中有真趣物外曾忧贫丹崖一千丈不愿圖麒麟夕阳二三束重负嗤丘民颓然卧明
月身外安足论

○七言古诗

古道傍

古道傍双垂杨长风飒飒声欲狂行人已去寂渺茫黄尘一阵空断肠

禽言

水儿者小水鸟也天将雨飞鸣曰水儿水儿俗为雨占盐城久雨为灾犹闻此快快以赋

水儿水儿穿云呼雨今何之连天秋水苗已稀汝慰何多民何其

寒食吟

芳春苦扁朱户疎帘几点寂寥雨醇酒何能刷我怀朗吟岂尽幽情吐平湖春草绿如烟安得杖藜缓步桃花阡

春夜曲

乌夜啼月欲西沉沉院落春云低玉漏无声夜将半金盘有酒人欲迷桃花扇底苦夜短千金一刻催邻鸡

淮村八景【为安丘黄甥作】

淮川晚渡

淮水浩以广滔滔下沧溟长风吹落日烟雨时冥冥行人欲渡不可行滩头且莫相喧争方舟自有济川术不比无人尽日横

朱寺晓钟

山僧睡欲足携鲸戏蒲牢疎星带残月殷殷来曙号惊风吹落仙台高云际袅袅回林皋大千种种尘梦劳虚空一破无秋毫

浯水澄清

齋泫何清澄上彻太虚明纖云不敢翳万古谁能并惟有孤贞契心骨波澜不为生倏忽如何独漉水中泥水深月暗行人没

盖峯耸翠

嵌崟不可仰缥渺通天衢翠色照终古正气永不渝斜阳断霭浓未释过雨晴岚蔼欲滴对尔亭亭一正色彷彿巍巍千仞壁

书带余香

断简那可覩秀带留余芳乾坤假私息雨露滋春长王孙一去不复返牛羊归来日应满野火空将化劫灰斯文根蒂终难断

囊沙报雨

夙仰淮阴名不识淮阴陈囊沙今尚存报雨无从信虫沙之化自可猜千秋杀气神与偕多多益办真雄才军声十万风雨来

搭岭连云

碧岭何崔巍行云日萦回相看不相厌怡尔重徘徊衣裳炫烂资尔补蛟龙早晚凭

尔雨秋风吹动桂花香跨腾直抵清虚府

松池印月

皎皎松上月湛湛松下池水月本无意相逢如有期微波不兴拟镜净一片琉璃迥
相映灵机悟取真境中万海千江同一性

海屋添筹二首寿尹金峯侍御太翁

凉飙西下吹洪涛秋空怒卷云山高紫霞绿雾从逶迤金银台畔追仙曹醉指三山
看海屋此中筹筭原于穆瀛海仙来九天手挽白鹿秋风前童颜鹤髮不知年五云奇觀
欣何緣沧溟会见归神筹相寻今古良有由筹同运人同休天同久地同悠

夏日小庄即景

细柳孤村白日长柴门流水芰荷香幽轩独抚翠岩光闲庭芳草晴烟薄南熏细细
余花落虞弦静抱凭谁作梦回修竹听啼莺百鸟丛中啜玉笙如何迥不近蓬瀛

八龙济美行赠刘春台太守

丈夫合作人中龙生子拟与荀氏同荀龙之名不可核转看八子迎春翁翠涛红雨
奋头角江门霹雳斡春工八荒鸿润畅枯槁九天一息祛氛雾姬周达駟直螭挺高辛才
子俱螻蛄老龙种种赤帝宗要亦海若瑞锡乎天东

杨烈妇辞【杨子椒山因同难西台相知乙卯冬被刑避时禁托烈妇辞以伤之】

杨烈妇情可伤生平雅操冰与霜小姑作逆诚无良众人默默将谁匡直言为姑陈
丹心照中堂不惜一人生大义或可扬何意触姑怒青蝇白璧反无光抱我寸心曲终始
谁能详死以天下事辱为小姑偿彼苍不堕泪万古摧肝肠

西山

行西山行苦难去去愁无端盘盘朝还暮登顿凋朱颜孤云巉岩不可攀羊肠诘曲
天漫漫车轮摧尽马蹄缺颓年病骨伤心酸风霾暗黄日妖鸟哀林峦豺虎昼纵横行人
恣饥飡艰哉此行良可叹拊膺摧折心与肝沧溟何在生羽翰白云石上垂纶竿

春溪行送盐城苏二尹擢判寿州

春溪柳黄君祖行烟开锦浪桃花明琼■〈奭斗〉醴凸暖风软彩舟望絶仙云程
芳声楚天阔斜日沧波悠孺子絙宓弦宠驾遄西州旷此山水音乖彼兰蕙俦青阳无定
所碧树生凉秋短髮萧萧春欲歇故乡未去故人别送君天衢努力答明王蓬山迤邐余
休烈

懒起

懒起懒起六十余龄闲懒已癖布被昏明仅庇身竹窻风雨无侵耳农耕不思商利
莫齿纷华冰炭权势已矣山海悠悠春复秋风花扰扰从人喜醒复成眼觉曾开视辗转
无期非午辰已枕畔安眠蓬岛仙不知床外有书琴在里香暖从容一欠伸笑他横足帝
腹何心尔尔

盐城获双鹤

淮南偶得双仙禽野人慰我高云心昔阅沧涯仿佛尽凡格适尔华亭清絕夸灵音
雪衣六月开烦襟霞颠一夕来遥岑昂昂烟华犹在翻皎皎尘点胡相侵天风吹酩酊海
月鸣琼琴尔志九霄遠我怀千古深世无知己沈幽淲日斜逢君犹断金万里终当作遐
举徘徊暂尔狎青林

清宵篇送孙小渠

故人子荆何处来清宵红烛心眼开燕山一别二十载停云望断空徘徊淮南小邑
桃李香青藜白髮从翱翔春来几日风雨狂闲庭岑寂古藓苍锦帆一夕飞沧江相持梦
寐惊华堂话来往事欢复伤人生离合参与商顾我几多残岁月君行咫尺登云阙神虬
灵凤又何期清漏玉杯君莫歇

己丑开都城有妬妻斫其妾之双足者妻就刑夫逋焉感而赋

青娥倏陨双秋莲玉魂凄断千里緣纖弓射反伏未覩凌波履险知谁怜入室之妬
莫可测他人所慕吾所捐前鱼泪落后鱼船飞燕褫魄班姬妍天涯弱质胡相及仇讎乃
在香尘边翦忌不遑图掩鼻甘心共弃沧浪天昔以要宠今杀身膏兰自取焚与煎薄命
速辜闾室延一朝三褫尤物愆猩猩之履犹在前

晚春西原

衰翁三月不出城春深早已过清明西原偶尔踏芳草且幸春光犹未老桃花半笑
如有情新柳垂青度妖鸟溪声送客去潺潺村落迎人来渺渺步入翠红径松烟逸高兴
堕紫惜年华綠阴怡日静嗟我尘埃人幽境罕相并不如野鸦明月巢林隈空怜海鹤来
往啄苍苔喜来悲晚从徘徊斜日寒山又欲颓

晓帆歌送温玉斋

玉翁张帆凌晓风飘飘飞向鲁王宫凉云凄雨不忍别把觴挹袂嗟相逢人生落叶
全无据我胡来斯君胡去天涯渺渺无前期若更相逢是何处和风煦我春无涯朗月依
人秋正华错刀欲报魏琼玖明珠割分懷遠遐汀草萋萋湖水綠烟波断送人如玉丹萼
十里如有情君胡不醉阳關曲碧山斜日余几多梦魂失道如君何红颜拟有青眼时白
髮惟看鸿鴈过

代鳌山王西淳大尹送周古栢先生擢教天城镇边

嵌崑牢落沧溟东绛绡青眼濂溪翁云飞巫台碾寒魄雨余金谷流清风瑶草珠帘
晓涵翠天桃琼圃春摇红图丹绘碧耿交谊青灯细雨调丝桐芝兰充庭旧食德琬琰懿
质今谁碧青鸾宠锡塞垣迴白首怅慕蓬瀛空邹鲁文旌達荒裔奎壁瑞采流琇弓风树
销魂苦萧飒烟山送目凄冥蒙金石荒亭一动色萍踪何处重相逢碧峯落日梦初断青
天杳杳凉秋鸿

双节辞

密人有兄弟相继而亡者其姒娣各寻死之乡人义而表双节焉余因感赋

山云野水春漫漫我欲吊此双节空含酸淳风死去不可挽声华千载颓狂澜烈哉

二淑女冰雪凜肠肝谁令逶沈鴈各惜孤鸣鸾痛絕异时殒泪尽同日欢贞心逐幽渺落
蓋随风湍金石何期抱一节渊泉偶尔寻相安春草空留翠罗绮秋风零落金琅玕纷华
浊俗猥琐观珠聯青海星斗寒君不见须眉丈夫尽楚楚胡为偷生反面视此曾无难

南极歌癸酉寿辰【时年七十四也】

南极秋转青云岑西风早下灵璈音飘飘老鹤过溟海沧州缥渺遥相寻独上金银
台祥烟四望开天空日月老海岳心悠哉瑶觞晓吸霞入口玉筇晚拖龙在手偕老金堂
古亦稀重颁紫诰今何有兰桂儿孙赫凤仪楼台箫鼓惊鼉吼未须更问彩云人如何不
醉华筵酒大儿武库超擢频小儿文场声价新燕山济水亦千里方寸喜来青眼真唐虞
化日乐不禁蓬瀛玄筭要千春祇恐无述底衰老天恩帝力空怀抱芳庭尽热鷓鴣班后
昌图报精禋禱

盐城送侄懷慎遊杭州

壮夫慷慨吳楚遊飞虹浩气湖天浮我欲从之滯衰骨风流美事输先筹束书腰剑
觞高楼北风日夜吹兰舟片帆望迷残雪浦孤鸿声断沧烟洲寒梅三弄出淮水黄鹤一
跨轻扬州得鱼沽酒风月阔闲云遠水情思悠丈夫宏图岂鹿豕乾坤胜概开雄眸雪涛
澎湃江千里芙蓉秀削峯峦起海头怒激子胥潮桥边苔老黄公履江山人物尽繁华黄
金紫玉何足夸收来图画寸心曲赋拟班张五色葩剡溪尽兴一返艇锦城虽乐终还家
椒盘迟尔起颂花华灯焰焰醺紫霞春宵客梦惊天涯悬河慰我卧遊賒

行路难懷慎侄自盐邑将浙遊不狎乘舟眩暈病归戏作

吳山迢迢几千里北人不狎南中水孤舟一叶浪吞天风帆激雪云中起残魂零落
波心里洄流俯瞰头目旋山移岸转何时已昏然混沌之九天颓然沈迷于九渊仲子哇
出心与肝庄舄长吟夜不眠甘息风尘机慰我方寸地履险不如夷未必江湖利石尤风
急棹空回兴尽何须苦复催三日淹淫一日来卢医一笑非其灾孤城半夜惊鱼钥严牙
灯火吹残角昨日遠遊今日归偶尔沈痾倏尔豁古来声利山水间凿空万里将何堪岂
图坎坷还平湍举足世路俱间關行路难良可叹

頽室叹【并序】

嘉靖丙辰秋余擢判巩昌携慎修儿以行过寓济阳官署适风雨连朝次夜分乃已
辗转不能寐芒刺隱然凡一再起如或翼之移装间亦莫知所谓俄而所寢之一楹遂塌
几致覆压而幸免也亦神矣哉时维七月之二十有七日也悵悵以行是为叹

倥偬七月来济阳陇西遄驾秋山长狂风吹雨行不得潇潇二日云茫茫中宵乍歇
天兵休奔泉汨汨庭际流邮亭寥落少人游我胡偶寄令嗟愁呼僮秉烛灭复明一夕再
起莫我由束装三鼓为谁速歛然頽室非人谋飞我天涯魂顾我仙桂子一榻粉尘泥二
命惊且喜始以宦走荣詎知患且并几为立岩人幸免刑谷生挥泪忽盈把微名灰且轻
樵云钓沧水安知此阨倾人生修短良自命神禹风波终亦庆白头老我岂摧残青春腾
踏知何竟尼父从天亦泰然豪雄不变山隕前壮懷落落胡相牵前途有酒还如泉

送陈肖玉长教擢教楚藩

胡为孤竒姿覩此青海曲玄简如有情纲常僻邑鹄朱丝返淳元彩笔振颓俗霖霖膏幽兰剖劂试良玉炫日天桃崇紫霞凌风瑶笋超贞华楚淮弦诵春无涯龙门蟾窟文泽賒歛有紫泥书仰翥丹青凤潇湘杳灵翰琬琰破尘梦怅惘湖水春索寞山阳弄挹之不可留瀕溪薄相送青青杨柳摇碧波孤帆万里情如何醪■〈酉灵〉一酌强君酩青萍三尺为君磨江空岁晚目力短霜寒秋老鴈无多荒城银烛坐风雨春晖紫府迷笙歌陈琳负伟才仲舒抱俊策银纪湘东豪仙集淮南客梁园授简空陈编巫台梦思俱云烟风流儒雅懷千年壮图此日辉前贤

题张平山古山春色图

张生雅抱奈尔尘世何走笔驱此一段太古之嵯峨辟开天地不可纪杳絕人寰知几多青壁嶄岩以直上幽谷窈窕而莫窥云澹澹兮空寂气苍苍而陆离隱乎清飈浙沥于穷壑藹兮幽芬逸泛于危巘林莽凄旷悄乎无人一鸟不鸣暗泉磷磷苔老麋鹿迹烟涵草树春巢由秘高踪车马违惊尘中有金仙之寶刹浮图隱隱重霄拔高僧姓字不可闻钟磬沉沉隔断云闲情独抚悲氤氲一生肠断在人羣我忖张子懷景中情亦偕龙钟老夷门霞想终难谐聊复快写幽旷心使我亦得展慰挥千金

题张平山溟海曦阳图

讶此尺素中沧波拟万顷是谁为此图荡漾元无定此非摹我东溟无际之洪涛胡为一轮初日停朱影三山巔在何处长烟野雾茫茫去金光焕射紫霞飞晴飈歛扫青天曙不闻天鸡鸣无复鱼龙惊但见火轮簸荡下不可测潮头绛雪如山倾烟波迴撼赤城明扶桑灼烁金鸦轻一鸟飞百鸟归一水耀万水辉幽荒寒门开夕霏长江大河相依稀虞渊终古不相值妙造精光随手挥张公图山复图水卷首畴昔如豫此晚年别号偶相符海惭薄劣山维尔君负大造资我非补造才巍巍君名何可摧沧波犹笑能尘埃

【忆作画时张号茅溪予号云壑别来六十余年间张更平山予更海壑当时卷首二图殆彷彿后来之二号若豫为之者故未见其意云】

汤即墨太翁南还过胶墨人追送之

华轩忽遽胶水东三子速我玉钵诗无工仙翁夙仰天上客彩毫漫尔随春风一枝仙桂来墨阳相从懿训称龚黄沧海枯莱被时雨华胥仙梦交扶桑兴高引旆下蓬阙春帆缥渺吴山月恩沾有自可能忘挽辔空教心力竭柳依依雨霏霏桃花乱点春衫稀子规啼歇暮山紫清樽酒尽沧云归望君拟南极雪颠方瞳瑞王国待君游东瀛玉笙琼佩飞天声劳峯鸣凤一时举朱衣鴈绣黄鹤轻山高而海清泽潏而永名赤子慕不辍青桂当重荣丹青有道在平地皇灵厥艾还分明顾我迂踈老林水烟丝云斧何如情长短有句长短亭聊尔为墨人之诚遠人之征

次韵元遗山送李叅军赴塞上

尝读遗山塞上篇悲愁惨愤极边塞之苦词亦工矣但丈夫之气何太靡耶想当时

于叅军必有为而发也余非敢以文词相雄长特欲反其意以壮之耳

慷慨出门去击楫渡桑干丈夫处世非鹿豕關山谈笑驱漫漫不策絶世勲虚生天壤间义气摩青冥肯教别泪潜惜哉折坂王孝子奉身废义回间關更有吳江窃一隅偷安忍耻忘寄环要知西域竒功照青史要知燕然伟绩垂毫端岐路情懷总儿女风云六翮乘时转身归斧钺命禄遗椿萱盘一朝树功名家国同庆欢便教风雷烈烈肃沙漠直须名王授首霜刃赭花斑冲风单于庭踏雪贺兰山孤臣夙中热不知铁衣单王灵振无极何恤凋朱颜雄飞本自猛将志丘园徒老冥与顽君不见陶太守时忧过尔耽优闲移甓寄深意扬名合自甘辛酸一杯万里与君诀无前戎捷期君还

春风篇

春深暮夜春风号沧溟吹转凉月高修篁歷乱不成影长松滚滚翻江涛断云流光惨惨归鸿失侣声嗷嗷迢迢琅玕下绮阁破窻耿坐烧兰膏台城柳条今又碧金谷花枝向谁赤一番草綠长杨基千载春光乐游陌西陵无复望铜台北邨一夜摧松柏春来春去奈人何古人今人春几多叹息风前一杯酒亦曾笑把昔人手今古情懷不相值祇合冥会浮生意翩翩白马金鞍光晴川渺渺桃李香东山华容莫相弃兰陵美酝何可量梨花皜夜夜不寐秦筝金鴈飞高堂春风日日吹我袂春酒时时淋我觞但于芳春羨风物不向春风空断肠吹颺琼岳了不觉落来乌帽从数数百年幻梦瞬息尔莫令来者悲齷齪吁嗟太昊封姨兮难久依亦能布春兮送春归今日清樽惜沈醉明日苍苔红雪飞

海壑吟稿卷一

●钦定四库全书

海壑吟稿卷二

（明）赵完璧 撰

○五言律诗

昌平道中

蒙蒙寒食雨翦翦暮春风醉眼开新綠征衣点落红山光怜靄靄王事苦匆匆空复寻芳意凄其望海东

安宁寨晓发

微雨晓初霁扬帆亦快哉轻风疎柳下晴景断崖开帘影青山过潮声雪浪回凭虚来浩渺顿觉出烦埃

德州

画舫来天上黄昏泊德州沧波千里迴残月片帆收吾境欣初入他乡叹遠游云山开晓色早晚步瀛洲

阻雨安宁寨

小雨阻孤村千山云雾昏方舟系枯柳落日傍柴门飒飒蒹葭冷悠悠蟋蟀频疎灯照秋夜欹枕自惊魂

癸酉新秋二首

玄运不自已清秋暗迫来金风轧烦暑爽气溢楼台世事全如梦韶华半不回余光更几许相赏莫相猜

又

幽赏莫相猜蝉声故复催烦襟凉似洗尘虑暗须裁月转高天朗花随淡日开清风樽酒在千古几人回

再赋新秋

清晓一登楼新凉报早秋风轻梧叶响露重竹光流山意淡青眼波澄莹白头老怀怜暮景潇洒作闲游

冬日靖虏晓发

初冬发靖虏残雪照山头冽气凝青嶂寒光迫翠裘孤臣愁绝塞万里望中州扰扰无东计凄凄欲岁遒

寄黄海野天曹郎谪归

不见黄生久尘襟耿未忘玉堂周礼乐彩笔汉文章碧树虚秋思黄花负晚香拟为沧海慰不久滞怀王

登阅江亭【亭在镇江江南岸简阅舟师者】

独上江亭望长江豁壮眸风帆随雾卷雪浪拍空浮天堑中原迥王灵百世悠酒酣千里客聊尔一优游

新中驿夜雨

即次昏黄雨潇潇夜未停孤灯烧欲暗宿酒醉初醒辗转那能寐淋淫不忍听何如飞梦去遶我故山亭

房山道中

晓日房山道行看亦自幽空山鸣野鹤小水立闲鸥断霭迷村树晴云结海楼东风吹欵段倦客重回头

送范惠泉地曹南守汧關【都城作】

别送沧江渺怜分青海情楚天春草合吴水暮烟平萝月清无寐丝桐秘不声關山劳望迥报绩计仙程

都城西望湖亭

云外下长坂湖南过小亭寒泉冷石窦细草暗沙汀骇鹭开青霭游鱼破翠萍钓矶来暂息波影俗怀醒

纵舟张家湾

早解云边缆初归海上宾双鳧冲翠霭孤鹤出红尘回首燕台月离情汉苑春雨昏留别浦沽酒暂相斟

晚泊长芦

晚泊长芦月凉生瀛海风云川凄暮笛岸苇泣寒蛩酒尽空明里诗成欸乃中天涯
浮桂棹星畔老槎翁

月夜饮静宁刘陵沙太守

凉月飞寒蠹清宵遇故人共将辽海思相慰塞垣春把酒黄尘倦论文清兴新挑灯
放襟抱海内为谁真

赠许空石解元刺史贵南

荆识今何幸萍踪亦可怜声光齐鲁外俊逸汉唐前塞日孤城暮蛮烟万里天何当
一朝宠相慰五云边

广济寺

迢递驱山径倥偬入梵宫长廊喧燕雀古殿郁杉松采药神僧去霏香禅榻空清魂
欲延伫俗役未从容

寄丘月林给事

旷望天低树孤吟月满林断云春寂寂落日晚沉沉青琐钦怀玉沧溟拟断金封书
将别恨迢递过西岑

月林见枉遥践琴约西还赋送

故人欢有陨永夜问何其醺饮酬良觌调丝慰夙期霜寒红蜡短水冷玉龙迟竹里
清风起连床无寐时

晚行溪畔

翠盖斜阳外雕舆绿水边清风吹细葛微雨散遥天沙鸟盟何在溪鱼乐自牵好来
垂钓处只是近人烟

初秋暑退晚坐

蟋蟀鸣阶下凉风动槛前露华侵袂湿月魄缀檐翩酷暑知何去清宵自不眠幽吟
对修竹相与斗■〈女便〉娟

对雪限韵

错落明垂地岑寥冷闭闾寒庭花满树青海玉连山作赋才难企高眠迹可攀怀人
清兴发孤棹夜中还

夏夜独坐

独坐芳庭晚遥依银浦清竹风披溽暑山月静荒城有酒闲仍醉无官负自轻年年
沧海上高兴此平生

雨中

冥雨朝还暮凄风夏作秋竹光翬榻润苔色上衣浮古木惊涛转飞甍瀑布流清轩
人独倚尽日看浮沤

官衙夜雨

清馆鸣寒雨离人寄远天高风岁欲暮孤烛夜如年妻病沈双鲤儿官苦独贤羈愁

千里外鱼目五更前

盐城闻促织

忽闻鸣促织应自感清秋花底来何暮风前听未休异乡人不寐故里思难酬骨肉
经年别湖天回白头

八月四日官署晚坐

海邑消烦暑星河坐晚凉清风来独树新月挂危墙水气生寒早蛩声向夜忙客怀
秋渐老官邸漏初长

盐城八月十五夜二首

飞镜当庭静衔杯向夜深清光霜满地寒色水侵襟不觉银河落偏宜玉漏沈暂将
江国景聊慰海瀛心

八月盐城客孤吟桂魄秋阅时常惜老对月欲销愁把酒添清兴酣歌慰白头郎官
今不斲犹嫌此同游

淮阴冬夜

羁客当寒夜惊魂自不眠风帘清寂寂霜月冷娟娟衰鬓淮阴道归心岁暮天敝裘
拥独坐谯鼓暗云川

吊黄海野早发

残月策行驂青娥戒晓严征衣鸣落叶宿鴈起寒湍烟迴苍茫外曦明紫翠间北风
吹老泪凄恻度林峦

归宿柴沟

余映沈冈疾悲风卷地寒烟中度淮水月下扣柴关半醉霜犹冷孤眠灯欲残可怜
今夜梦肠断野云间

十二月立春日简栾侍御二首

腊日逢春日新年入旧年野梅残雪后江鴈暖风前老眼园林雾闲身湖海天朱颜
那可再偷向醉中还

鼓角春初报阳和物自私冰溪澌欲绿岸柳媚将丝云壑堪乘兴霜台好赋诗相知
无异地相赏莫相违

秋日出西直门

秋日游晴旷西风被面凉征袍红叶满羸马白沙长曲水惊闲鹭荒池度野芳碧峯
千万点一望慰愁肠

秋日兴教寺

古寺青林外轻车白日斜秋怀开野色午茗惬僧家山鸟清吟兴云松静物哗禅闕
醒俗梦坐晚意犹賒

都城送栾岱沧进士尹溧水

相逢忽复别羁客不胜情衰柳高秋晚寒山淡日明歌残春酒尽帆远暮潮生何慰

潘郎梦芳声达凤城

都城冬日公出同杨东川寅丈宿僧舍二首

冬夜宿僧房萍踪覩帝乡松风韵骚屑窗月照苍凉不寐清宵短论文雅谊长谁怜沈伯起相与慰壶觞

僧寺清无极羈臣愁未涯月明寒吠犬风静夜啼鸦心苦仍依国魂飞不到家悲歌逢义士弹铗和京华

朝回望西山

初日早朝回金天秀色开彩云连巘嶿翠靄接城隈幽远牵高兴奔趋笑俗埃何时谢朝组随意踏莓苔

狱中不寐

身老名何在岁残人未归乌纱成晚崇白髮悟前非十口知谁托千山隔鴈飞泪痕挥不尽暮雨北风微

落日

落日崦嵫外新蟾粉蝶边严扉栖暮靄悲角调霜天倦点灯前易徐调膝上弦酒醒无限恨头白梵钟前

代送人二尹闻喜

阑暑金风早离觞野馆西關河秋杳杳云雨晚凄凄良吏新承宠殊方久望霓即看今日业拟与古人齐

次韵山行即事

白云幽石古青壁瀑湍鸣空翠侵衣湿山花照眼明啼莺寒谷静落絮晚风轻何处弥征盖松门一慰情

次韵宿弘恩寺

残阳投古寺乘月访高僧佛土风尘淨禅心池水明玄關欣妙悟白首絆浮名半榻三生幸千緣一芥轻

东归过邹平山下

昔去冰霜岁今归五六年青山如旧约赤日自堪怜两鬓空成雪孤忠负所天偷闲过海畔故旧半萧然

硖石

昔闻硖石险此日度应难烟洞深无极云梯不可干人从天上落树向井中看空翠茫茫里征衣暗浥寒

张茅道中

世路应愁絶胡为来此哉嶮巖崖畔度窈窕壑中回仰面青天小低头黄雾来艰危向衰老不觉此心灰

郭城驿道中

塞鴈惊斜日边沙卷北风敝輿山雾里冷饭驿亭中黄草连云暗青峦带雪丛壮怀
元不老犹慕伏波翁

塞垣晓行

野寺疎钟尽寒山残月斜冰溪惊鴈阵石径破霜花杯酒全无力边风不可遮孤臣
一万里肠断塞垣笳

次韵夜过六盘山

初月上银盘登高夜倍寒谷风肌粟栗山露鬢珠团身为微名苦心应老病酸秦程
良不易蜀道浪惊难

次韵夜过分水岭

素娥迎暮岭青女伴寒空龙剑明摇雪貂褕薄透风征车长入夜王事久忘躬穩羨
山翁睡独惭西复东

静宁道中用韵寄凌沙太守

霜气晓仍肃烟花迴未销龙冰千尺遶乌景一铛高同气青天遠孤征紫塞遥行行
不自己翻恨我车膏

舟中夜雨

细雨江风晚萧条落小舟一身千里外百虑五更头水遶还乡梦云凝去国愁沉沉
不知晓一鴈叫寒洲

闻蛩

疎帘玉露冷深院候蛩鸣切切寒如诉悠悠夜几更半窻山月白一榻竹风清秋色
竟何意愁人自有情

杨花

点点过楼台因风何处来庭空雪歷乱帘静日徘徊汉苑春仍老吴宫寂可哀飘飘
度江水肠断几时回

春日西畴

春日踏西畴东风阳焰浮暖云屯陇畔活水浸溪头百亩周王业一犁莘野谋此身
同鹿豕此乐岂人侔

次韵除夕

灯前辞腊尽漏底易年华拨火围青夜倾醪泛紫霞清香流栢叶懿颂起椒花学道
侵衰暮经年愧聚沙

弹琴

弹琴有佳音对竹弹且吟清风来几席俗虑涤胸襟青峯对终日綠酒沽千金太古
慕高调冥冥独此心

春日过凉台寺

野寺风尘静乘春一暂游叅禅违俗世驻履傍林丘贝叶僧窻寂金沙圣迹留殷懃

访学地随意却闻愁

碧沟战场

微雨晓初歇阴烟过战场悲风翻野蔓流水咽荒塘枯骨生新藓残魂断故乡谁输
全胜策干舞念虞皇

月下闻钟

鸦影风前定钟声月下闻高僧闲暮霭古寺隔河濱冷度千门雪清分双树云夙怀
超静土终愧恋尘氛

茨菰花

忽讶秋风玉由来冰雪姿孤光明绿苇独秀出污池宠谢华堂翦闲依野钓丝清芬
烟水外不受一尘欺

送姜省吾少叅驻抚商州

人去三秦地花飞四月天离魂销别浦断霭暗前川美政酬明主芳声茂昔贤商山
兼吏隱清暇抱琴眠

晚发莱城

羸马策新秋清光自可游残霞依古木野水舫孤舟人迹新沙润蝉声落日遒征鞍
何处息沽酒便淹留

次韵南庄

一心无俗物满眼是春光杨柳孤村静烟花曲径芳看山同野鹿藉草当胡床回首
红尘里无如此地狂

重阳

佳节际重阳西风野日黄鸣鸿云外度细菊目前香遣兴诗从拙冲愁酒放狂独醒
还独醉尘俗默低昂

次韵雪声

片片落来轻幽听细细鸣扑纱灯影静泻竹夜深清梦破黄芦鴈愁添紫塞兵何堪
擊鹅鹜蔡下不分明

次韵雪色

穷阴凝皓洁青女未依稀越犬风前吠梁园月下归疎梅迷玉魄孤鹤失仙衣粹质
谁能夺緇尘迥自违

野鹤

野鹤集沙渚悠悠向晓阳长鸣寒野阔振翼海天茫仙格违尘俗闲身足稻粱好随
王子去已与卫轩忘

无题

秦筝声琅琅越女歌遶梁响剧倾众耳曲终断人肠高情五陵客醲赏一朝偿古音
岂不雅寂然贮锦囊

冬月感怀

窗月明如练松风轻入檐不成清夜寐相对烛花残往事翻新恨凋年损故颜余龄
春酒在何必问还丹

招蜂

何处黄蜂集招来野叟家凿苔仍岁计掇葢阅年华努力知谁利依人正尔嗟君臣
负明识何事恋尘哗

乙丑正月二日慎修北赴礼闱十一日大雪怀思

儿作燕山别亲留溟海情北风吹大雪何处驻行旌春入琼林早云开玉殿明望遥
天渐迤计日慰佳声

用韵寄答莱城张南溪老长府旧友

相思分异地相应自同声各抱悬悬意频看字字情余年知几许何日续重盟南北
应天限离鸿怨弟兄

○五言排律

晓雾【五仄五平】

细雨夜渐歇侵朝云初晴竹槛宿霭散松阶余寒清旭日野鹤奋轻烟林鴈鸣远巘
润画碧新荣鲜图猩乱藓迭紫翠平池摇空明启牖爽气溢开帘微风生俯仰尽胜览徘徊
多高情作赋谢妙思横琴鸣佳声抚翫兴未已萧然偕谁赓

煎茶【都城作】

斧冰寒泉下粉玉石瓶中凤团沈夜寂兽炭烧春红霜清上桂魄人静骚松风芳香
涣瑞霭灵味湍华钟孤坐寒不寐一饮清无穷枯肠润仙液轻汗回春融兴逸昆仑外神
爽桃源丛可以发清咏兼之韵枯桐长啸仰苍昊矫首听高鸿壮心逐云翻奋翼来天东
西庄晚归十韵

褰帷一东望溟海正苍然浪激潮头雪山涵浦外烟蓬瀛迷落日蛟蜃幻长川孤鸟
飞还没归云暗欲连偶来逸清兴胜览脱尘缘景入仙源晚神遊霞际天短柯情自在一
苇梦相牵慨古超尘外嗟今老目前不成黄鹤客深愧彩毫篇片片轻鸥下悠悠祇对眠
中秋对月小饮十韵

寂寂苍虚阔明明皓魄来清风下黄叶白露湿青苔听竹幽懷静扫花逸兴开霜前
惊雁度岁暮感蛩哀桐影侵瑶席钟声度玉台赏心仍独坐对影暂相陪把酒吞星冷浮
生怯电催高歌谢尘虑清咏愧非才老矣休林际潇然醉海隈百年寡知己蚌守竟凡埃
代高时斋节推贺平渡李两山太守八袞有三二十韵

渺渺云龙裔悠悠蓬岛春精英集海岱剑舄出风尘襟抱乾坤外风流泗水濱淳还
高邃古玄养裕天真芝采今来汉桃花久避秦朝廷须鹤髮俎豆渎鸿宾晋楚声光迥山
川雨露均功成从絶粒冠挂学全身幽谷虚千载长林覩一人云霞韬古洞麋鹿老比邻
丹鼎追瑶兔清波跨紫鳞再周新甲子七守旧庚申耄协姜侯返龄超籓老伦沧洲娱蔗

境青鸟迓芳辰道气通无极家声演至仁芳流丹桂远秀吐玉兰新秋锦夸三捷春雷奋
一伸优闲一国老模范四朝臣窃幸紫闕客会依青海津拟将冥造破遥祝老人频

悼世皇三十韵

圣帝今何在皇恩不可酬康平叨四纪德业慰千秋刑赏天王政奸谀遐迹休神功
昭絕域灵瑞辑中州尺土一心泽秋毫万里眸唐虞轶高志秦汉眇凡俦千古英雄主羣
生际会优一朝三世祿两诰五云浮罗织曾生死权豪已破谋晋惭天日未归乞陇云游
白面新承宠金门早见收天波春溢海晚眷雪盈头终自懷芹曝无由报马牛夙期天保
祝不为鼎湖留龙剑空陈迹乌号遗世忧天风悲海岳云日惨旌旂山色凄还变江声咽
不流麻衣飞暮雪杜宇刷春愁宾旅辞华馆弦歌静玉楼凤膏寒贝阙孔盖杳瀛洲仙骨
一区木神龙数尺丘忠肝凄欲裂苦节竟何求夏启归贤嗣周成佐故侯儿曹贞信义王
业勉伊周壮士应崇孝残躯不解筹徒将庭教意不尽此生谋力竭懷终古哀余抱寸幽
龙颜瞻失覩天阙负无由怅望苍梧老啼痕湘水侔山川两不灭此恨共悠悠

海壑吟稿卷二

●钦定四库全书

海壑吟稿卷三

（明）赵完璧 撰

○七言律诗【上】

晓眠

枕畔鸣鸡是几回不关禁鼓塞笳催【曾宦游都城陇西故云】陶然人集彤庭后
嗒尔日高沧海隈门掩松阶昨夜雪涛翻茶灶午时雷朱帘不卷沉清影莫放闲云扰梦
来

壬申夏日赴西庄

南薰吹醒市尘愁冉冉新凉六月秋夹岸绿杨蝉不息连村青霭雨初收巾车迤邐
苍葭渚藜杖逍遥白鹭洲一片野心何所系野花啼鸟共优游

盐城官舍暮雨感懷

暮雨霏霏动客懷宿云霭霭伴空斋无端冷气生虚壁不尽寒声下绿槐故识梦中
挥玉尘舞衣海上溜金钗清风自笑无飞翼满眼烟波奈楚淮

嘉靖丙寅八月十日祝万寿

圣主仙龄甲子周西风吹喜溢中州赤天星彩光宸极琼岛烟波度海筹万国衣冠
朝紫府五云幽冀仰丹丘轩黄身世全无补天保高歌舞未休

即景

八月淮海客孤城高斋暮景何如情孤鸿落日天边去双杵秋风月下鸣满地花飞
红雪冷一庭竹合翠云平禁他离思沉酣睡奈尔寒蛩日夜声

盐署不寐

楼头鹤鼓四更挝枕上蝶飞不到家风透紫绡凉若水露浓催织静生啾诗因苦思
听残漏灯为无眠数落花夜夜竹窗绿底事碧云看尽楚天涯

怀月林

坐杳音尘是几年思莖心事自悬悬天涯鸿鴈秋将老江上青山日对眠梦断故人
蓬海月杯停新恨菊花天淮南久负白云约去住幽情各黯然

丁卯盐城元旦

喜收雨雪自经旬侵晓晴光逐岁新大造有知开景象万方无地不阳春日长诗酒
清淮客风暖弦歌太古民垂老唐虞何以报年年庭教汉良臣

盐署凭高晚望

北望苍茫眼欲迷碧峯斜日晚凄凄烟光度鸟白还没水色连天青更低千里秋颜
吾已老万山云树思堪题曾耽曲蘖沧江外不醉阑干玉署西

小僮缀磁盘代檐铁风中琅然可听

画檐飞度玉丁东杂佩仙人缓步空黯黯楚台随暮雨迢迢银浦下秋风无情苦为
多情扰动处生憎静处逢一夜不成千里梦转看残月向朦胧

送温玉斋三尹擢典鲁藩

一杖清秋且未归锦帆先送楚云飞高风旷世惊青眼落日遥岑隔翠微江国有情
人去后客怀无计鴈来稀王门久负云和曲此日淮南正可依

秋日署闲即事

玉署高风镇日清开帘满院绿苔明凭轩听鹤鸣晴圃倚杖看云过古城翠径幽花
留晚色粉墙修竹撼秋声居闲不染尘埃迹同调山翁匿姓名

盐署闻丘月林擢赴南太常舟过宝应遣送

闻道飞帆楚水秋碧云深署奈羁愁参差鸿鴈违青眼咫尺烟波滞白头八月仙槎
天上客十年情思海边楼青灯莫慰江湖夜新墨淋漓送彩舟

次韵盐城月下闻笛

羌管谁家弄月明晚风清度隔云声悠悠夜馆浑无赖袅袅江天别有情杨柳凄凉
乡梦断梅花零落鬓丝盈阑干十二醒残酒憔悴年年客楚城

次韵水中花影

秣花濒渌兴悠哉晴浒佳期心眼开帝子彩云归极浦影娥明月下瑶台绮罗锦水
经秋澣红翠青铜向晓回自是冯夷宫里胜玉栏长倚碧烟隈

盐城秋夜觉后听雨

分明魂梦到家来却被闲窗细雨催栩栩千山随意去匆匆一榻故飞回悬泉不澣
羁愁恶长夜难将曙色开心火不随炉烬灭倚听寒鼓下楼台

盐城归迁旧居登楼偶成

白髮朱栏快一凭珠山南跨枕沧溟烟中浩漫连天浸云际峥嵘括地青千古画图

诗兴阔四时风月醉魂醒蓬瀛不用飞翰去坐啸青云送暮龄

春游回文

忙里闲情娱景华度溪寻壑暮晴沙长原翠漾云浮草暖径红飞燕落花狂咏客亭
春把酒憩留僧寺晚烹茶香生陌雾飘风软苍莽踏来游路遐

夏日回文

红榴石畔海光晴寂寂闲阶晓翫清风静柳亭凝霭细日曛荷沼映霞明桐青坐暇
休炎暑草碧眠慵废读耕空院小吟长昼静同谁兴饮听啼莺

秋懷回文

寒烟淡点乱山青眺遠伤懷老渤溟湍急落声风拂树鴈飞涵影渌开萍干侵冷月
宵吟苦壁诉哀蛩暮酒醒残调古琴横竹石兰芳叹寂伫孤亭

冬晓回文

红日初醒睡起迟卷帘朱户暖烟披鸿飞目断云山遠鹤伴人闲晓枕欹松雪覆阶
清入画竹风鸣院静吟诗东窗烂影移霞彩蓬髮短歌酣酒卮

漫兴

弄罢素琴看鹤舞歌残空谷听莺啼苍苔细数闲花落白昼清眠春草萋云去云来
沧海上日生日落翠屏西悠悠野鹿乾坤老垂白无心更钓溪

冬夜

拨火青宵听煮茶兰灯烧落玉虫花月明当户清如昼霜气凝庭静不啐冻折冰弦
惊睡鹤寒生风树起啼鸦幽人不尽松窗兴坐送清阴下碧纱

煮茶声

石鼎春茸静自烹寒泉暖焰战分明山蝉泣露秋仍细松叶吟风晚更清不杂尘啐
随断霭偶醒残酒傍孤檠芳声不为朱门沸独听幽轩慰野情

霜月

玉魄铅花晚逐飞素娥青女夜忘归窥帘暗迫肌生粟到地明看星射辉窃药路茫
蝉鬢老拊膺人去蚌珠依龙墀如水瑶阶滑争似烟光卧掩扉

送刘春台太守朝京

朝天旌节海边来残雪荒亭送玉杯风树有情弦管外莺花如梦水云隈翠麟烟霭
瞻尧日丹宸勲名陋汉才鵬鸮不堪林石思旋将霖雨过蓬莱

壬戌秋夜闻雨不寐忆亡弟介泉

枯竹窗前雨未阑离鸿声断夜生寒哀蛩切切金炉烬银烛凄凄玉漏残风树不休
人不寐池塘无梦恨无端聯床更作来生约惭愧鹄鷄泪暗弹

芍药

一枝红药紫峯前半出青丛露未干脂粉不緣妆镜晓尘凡适偶玉台寒芳姿苦惜
忘斑鬢清赏长将倚画栏锦瑟无声终日醉黄昏犹约来年看

次韵玉泉

惊飞神锡翠岩开泻出琼珠涣不回风带潮声千涧落雪翻寒色一时来清流人逸
娱高枕淳影龙归撼上台一脉九天输万古沧波未必更尘埃

檐前鸣玉

碧云初敛画檐空何处飞琼向晚风破霭声疎寒寂寂步虚人迹夜匆匆烧残银烛
寐不得滴尽铜壶兴未穷清影依稀珠箔外二三竿竹月明中

晓钟

晓钟不异夜来鸣昏晓相催合自惊曙色微茫分宿霭年光断送向残更长鲸殷起
风尘思短发徐添雪刺明老懒无妨停午卧匆匆莫悞鳳楼声

代人送同年推刑泉州

风云万里覩仙才何事春深白鷁开瀛沼鳳鸾今在简炎荒雀鼠会看摧马蹄晓送
黄梅雨羊角秋生翠栢台官柳斜晖无可赠民情此日正堪哀

冬日过双塔僧寺

漠漠风霾白日黄浮屠系马慕清光画廊烟静鱼声歇寶塔云中鐵韵长双鬓尘凝
怜俗状满懷机扰断愁肠衰年苦为微官缚白社风流讵可忘

都城冬夜不寐感懷

雪霁清宵迴未明宫城漏结断寒更鸣风窻纸惊残梦如水衾稠冷宦情三径已荒
人未去尺书久滞鴈无声衰年犹自甘勤动升斗如何不解轻

都城西香山寺

独宿香山正寂寥憑谁诗酒纵良宵檻前山色千年画枕上泉声半夜潮风雨满天
剧愁思乾坤无地作逍遥翠微梦破红尘去清景曾教负圣朝

乙卯九月七日西城闻慎修秋捷

齐川秋捷迅燕山青妙功名慰鬓斑何益父书标锦夺早绳祖武桂香攀五云喜溢
蓬瀛外一日光生海岱间圣代世恩深雨露马牛无补汗衰颜

咸阳懷古

悲风淅淅古咸阳百代遗踪自可伤王气有归弓剑没寢园无祀野云凉蒿莱满眼
英雄去翁仲含情岁月长索寞秋原那可问碧峯斜日向苍苍

会寧县旅夜简吴桧皋太守堂翁

薄衾寒夜卧如弓万种羈愁辗转中有慰月轮来海上无书鸿鴈过天东百年身计
老仍拙万里归程梦转空落叶满窻人不寐坐令销瘦愧无功

南山晓归

苦爱云山风景幽百年心事几曾休是谁于此长相絕顾我而今不自由翠巘有情
遥送客苍烟驱马重回头尘罗卒抱崆峒恨多少浮荣多少愁

丁酉省试毕晓归东省

颺颺西风已老秋海东归骑晓悠悠荒亭落木萧萧下古渡寒烟冉冉收董贾万言
珍楚璞燕齐三战逞吴钩壮图早晚青云上折取天香慰白头

灞溪晓行

玉骢策晓傍寒流水自悠悠春又秋矗岸飒风翻木叶苍葭栖霭暗汀洲波间鱼逐
真相乐沙上鸥眠不解愁渔艇钓矶无限恨尘劳何事不相谋

夏日同张莼江太守海游得海字即席偶成

桂棹兰桡泛沧海微薰晴日萃僚宍澄波万里碧泓灏遥山几点青■〈山上晶下
〉嵬笙箫呖呖醉醪■〈酉灵〉烟霭迢迢听欸乃回首风尘万事忘临江横槩今安在
再过金山未得登览舟中望而有作

两过金山登未得风尘空复抱高情乾坤胜槩还千古诗酒无缘负此生心逐白云
环巘崿棹随流水趣江程营魂未慰缘何事挂带山门愧昔盟

春日淮安道中

春日迟迟古道赊东风游子倦尘沙方塘水暖鸳鸯睡平浦烟消鸿鴈斜满眼青山
非故国一鞭羸马去谁家赋诗饮酒天涯兴莫遣离愁老岁华

哭水南翁

吁嗟冥漠太梦梦丧我通家鹤发翁高世才华先子畏忘年交谊古人风他乡风雨
愁相慰故里觞诗老更同渺渺断魂何所仰凄凉泪落水云东

妓者失明

合惜秋波不可医芳心不灭欲何为绮窗晓日迷青镜金谷春风谢紫卮絶望远山
空旧恨传情无地罢新知琵琶记得从前谱一曲娇歌泪暗垂

谢吕干斋金宪故人见过

苍唐草树惨高秋海上民风殊可忧赤县恩光宣魏阙碧烟旌旆达瀛洲九霄鸾凤
欣青眼十载江山尽白头岂有芳声驻车马故人雅意自绸缪

木鱼声

僧鱼声度晚烟青索寞松廊徙倚听缓急自随仙梵落迢迢已觉睡魔醒风前暗点
愁城破月下从教欲海惺清味空门今不厌禅关何处好传经

九月庭下杏花

寒露凄凄肃晓旻嗟渠何事再荣新西风化拟东风早落叶枝同未叶春归燕尚懷
寒食约黄花旷值晚秋晨当阳庆际重华圣合有调元此细论

上程碧溪太守【守名世鹏广东人】

万里雄图仰德光扶摇东徙慰穷荒精忠翊圣风云迴枯槁回春雨露香一变旷闻
周礼教千年喜覩汉循良清时赤子今何幸白发丹心世未忘

己酉下第

青门泪落海云飞青紫曾看拾芥微五十文章犹锦字三千胜负有玄机朱衣弃我

孤豚细翠岱嗤人匹马归却喜诸郎尽英妙巍科应复慰重辉

次韵顾文昱公白鴈

紫塞悠悠素作仪关城寒早带霜飞湖天旷失云中影汉水长迷月下辉瑞叶九天
曾拂羽荻花何处旋为衣上林玉讶回阳侣拟自蕪卿雪里归

李亨庵见枉因示佳制用韵感赋

小洞传呼启碧萝逢迎无奈竹婆娑山樽有兴花为妓檀板无声鸟作歌宦海冠裳
萍梗迹浮生日月玉人梭寇公此日真难借白首相酬莫厌多

送李亨庵太守擢贰河间二首

赤夏辞东何处游五云直北是瀛洲华胥梦破孤城月玄朔情违一叶舟白雪俄惊
调沧海彩毫无计待清秋幽岩莫逆佳期在早晚霜台慰别愁

翠靄银塘红蓼花玉人青镜送仙槎山光怅别孤云暮帆影关情落照斜五马春归
漳水际孤鸿秋断海天涯何郎无奈瓜期早坐遣清风去思赊

王冠峯见招观莲阻雨简复

正忆仙芝艳艳开报书忽下紫鸾催纔驱羸马西溪度旋逐狂风北雨来絶代妍华
劳遼梦片时欢赏阻英才横塘十里烟云冷自昔佳人不易谐

次韵赏莲

芳姿袅袅出晴波烟破虚明照影娥紫艳生香风自遠红酣吐晕日偏多盈盈帝子
来湘浦脉脉天孙隔绛河莫谓无情情亦在休教解语动清歌

秋夜听雨小饮二首

坐听微雨夜如何小饮秋堂乐意多脸上酡颜忘白发杯中灯影晃金波高台魏女
空挥泪片石羊公久自磨今古滔滔春浪涌一回长叹一高歌

莫教烦恼心常累曾悟空门水不波万古此生真可惜百杯良夜岂为多逐臣自笑
山林僻幽室还宜风雨过纵酒放歌今不乐寒蛩昏晓欲如何

沙川东望

小桥东畔过沙洲一望清光雨乍收云矗山腰横玉带水环屋角遶苍虬矾边杨柳
堪垂钓天外沧浪好放舟乡土有情风景胜白头心事共谁筹

咏孤鴈

曳曳孤飞何处来嗷嗷四顾不胜哀虞罗骇失遥难合烟浦冥迷涣不回故侣有情
天遠大断云无赖日徘徊长鸣带月秋江上影落寒波祗独猜

送慎修儿还任兵曹

好去神京奉圣王休随儿女恋高堂双藜斜日犹强健百亩终年足稻粱有宠自天
皆雨露无能报国祗纯良兵权繆与期前美老拟营丘乐未央

送江龙所通府署州西还

荒城岁晚事多违无奈悲风送客归鸿鴈数声留遠思海山千里尚余辉春觴漫酌

聊相赠冬日遄飞不可依霖雨无私更何地东人空有泪沾衣

次韵壬申元日大雪

纔看青鸟启芳辰滕六飞花烂目新带雨无声潜入夜裁冰不解暗生春年登南亩
知谁卜日醉东风乐更真十四飞鸿促银烛不知斗柄转高旻

赵烈妇

赵董生妻也董早没赵随自经以殉乡人哀之余亦感赋

玉委鸿毛何太轻天常蚤已独分明破来蛺蝶人间梦合去鸳鸯地下情斑雨恨遗
湘竹泪紫箫凄断鳳台声谁将银笔清风下不为衰颓着令名

癸酉膺

封万厯新主覃恩老夫妇以慎修儿备员夏郎叨与殊典乡人称庆乃以不肖当年
七十有四老妻六十有九而于先朝又曾各沾一命白有司匾双寿重封以荣之因而喜
赋

蠢愚翁媪眷清朝祗以儿曹媿冒叨鹤发双逢千载庆龙章重下五云高虚生岂有
涓埃补小子曾输犬马劳末路寸衷无地报肯教庭下背伊皋

夏夜

落日逍遥向晚凉芳庭孤坐兴何长碧虚露下尘寰静银浦云消仙路茫两腋风生
飞海峤一天星动荡沧浪通宵无寐超人境祗恐曦明堕旧乡

暮春雨霁感怀

风柔雨霁暮春天可恨尘寰不了綠柳色不知城郭外鸟声已乱市器前桃花野径
云中骑弦管湖天镜里船多少风流赏心事白头扰扰是何年

冬夜闻逢迎鼓角

寒夜三更鼓角鸣遥知下吏苦逢迎冰霜透骨微名缚轩冕凌人四体轻枯柳门闲
无限趣紫芝山静有余清衡茅真自高风在楫楸煨炉睡到明

次韵秋日书懷二首简纪湛泉

机头驪鼠斲千钧芟制曾教污紫尘掇得篱英轻斗粟步来溪壑谢蒲轮不才白发
违明主多病沧浪纵逐臣忙里琴书醒后酒秋风潇洒自由身

叹老惊秋倚画屏抔沙功业竟何成心劳刻叶终无补技擅屠龙岂令名抚剑停杯
不自醉横琴吊古为谁鸣儿曹别有岩廊业林壑清风且读耕

咏渔

万顷沧波恣所如水云清旷岂忘渠长烟鸥鹭情偏洽细雨蒹葭兴有余几日醉来
村舍酒一生饱足钓船鱼湖天缥缈无相识一笛幽襟月下纾

咏樵

翠巘千寻斧白云高风杳不染尘氛襟裾每带烟光润毛骨常从兰气薰松下看棋
迷甲子夜中煮石待烧焚山深岁老韬名姓一笑那知麋鹿羣

咏耕

一犁沉迹野云边百亩萧然桑柘烟
惬意杏花春雨后浩歌金石晚风前
饭抄云子终年厌酒尽霞觞对月眠
鼓腹岂云非帝力明良应慰老林泉

咏牧

野趣闲情一跨牛烟蓑雨笠此生谋
挂书旭日桃花坞叩角秋风芦荻洲
笛里关山今古恨笑中榛莽贵豪休
斜阳古道频回首多少英雄名利愁

用韵寄答东莱张南溪老长府旧友

二十余年久别来丘林衰老愧仙才
觞诗即景心犹壮松菊怡情手自栽
青眼故人常在梦白头心事已成灰
诗来慰我情如结旧恨新愁不易裁

盐城初夏官舍独坐

幽轩晴昼上琼钩长夏清光寂寞俦
竹影恣狂风袅袅杨花随意日悠悠
短墙蝴蝶移春去独树黄鹂只暂留
惟有海云推不散欺人白日到床头

夷齐庙

二贤千载尚余休古庙荒凉过客留
秋圃空闻寒鴈度棠梨惟见野蜂游
拾薇溪壑孤忠老弃国烟霞百世谋
一扫寒芜倍惆怅可堪聋瞽更遗羞

春日旅中

春日融融雪渐消客怀郁郁思无聊
虚庭风细松声落薄海云开鴈影遥
书剑可堪淹岁月楼台何处厌笙箫
朱帘不动炉烟细一曲丝桐慰寂寥

次韵春日匡氏西堂二首

沙暄迟日慕山堂拽杖东风踏莽苍
野鸟隔林清弄味桃花流水暗生香
闲依修竹频携酒静爱孤云独据床
潦倒挥毫浑漫兴高名真自媿王杨

野塘鸥鹭静比邻何用藏犀此避尘
芳草缓寻违俗物落花沉醉作闲人
溪头绿浪无归日柳外晴丝不系春
白眼寰中谁是伴青山海上一佳宾

海壑吟稿卷三

●钦定四库全书

海壑吟稿卷四

（明）赵完璧 撰

○七言律诗【中】

西庄晚归

岭头旋旆已斜阳十里山城缓不忙
酒向晚风消未得诗从野色兴偏长
川横白鸟烟光暮潮拥沧波海气凉
鸿鴈冥冥谁得慕朝来暮去水云乡

春日得二翟进士书兼枉佳篇

日边双鲤海边来愁绝惺惺尘抱开
忽发仙函惊对面更依藻思苦怜才
莺花异地春仍暮云树经年老共催
懷袖字应终不灭断魂芳草向高台

次韵杨契玄秋日闲居

风清踈柳咽寒蝉拽杖芳庭自快然
蔌蔌落花飞晚径依依闲鹭睡秋莲
莘溪何意三千钓竹坞忘情五十弦
终日看云无一事不知霜鬓向残年

虹

逸势翩翩挂海头神光烨烨炫人眸
长桥朗跨蓬瀛迥美锦谁纒醉舞休
银釜云平从痛饮玉人烟际暂淹留
斜阳相送天涯暮拟破巫阳一夜愁

六月二十九日过小庄

丘壑崎岖偶一经暄炎适得片时清
主人十里春来少桃李千株子已成
欲去未能窥晚照乍醒还醉听啼莺
年来何事城中久书阁留人不放行

次韵冬日小雨

海国寒云锁昼晴北风旋作雨丝轻
疎梅冷浸娇含玉黄竹低垂暗有声
室蔼芳兰耽逸静门闲枯柳谢将迎
楚骚歌彻虞弦雅环堵何妨近市城

夜坐用韵

沧溟无梦遶秦关日絶尘劳夜更闲
云吐月来看不厌风吹雪散酒初阑
残更诗思碧窻静半夜琴声绛蜡寒
布被茅堂从坐卧浪无羁束漫成欢

喜晴

疾雨飞云惨淡收清风萧飒晓凉浮
石榴浥润红妆腻水藕凌寒紫艳羞
四野凭栏诗里画八窻欹枕梦中秋
日长细柳柴门静一曲玄蝉竟夕幽

入夜大雨不絶

黑云冥冥来海东翻盆急雨吹狂风
惊雷走电昼还夜倾墙颓屋家几空
峻湍崔巍卷平地阴烟上下俄鸿蒙
更深谁为乞邻火坐听瀑布心忡忡

庚申秋苦雨

海国穷阴雨散丝秋风不见霁开时
千峯秀色知何处一刻清光费梦思
石燕欢腾洲渚外荳花零落水云涯
泉声不尽蛙声剧搅夜无眠漏更迟

秋日雨霁病况萧然庭下闲适

雨后新凉不自持枯藤揜去遶寒篱
龙钟老鹤秋风劲寂寞闲庭落日迟
把酒颓龄心易醉看花满眼鬓成丝
梦中日月笼中鸟犹自蹉跎访药期

送王冠峯分教舒城

鲁铎声残马帐开淮南生色向春雷
匡时礼乐从周典复古文章陋汉才
丹桂天涯寻旧约碧桃雨后试新栽
龙泉晚効秋江捷得意清聯玉笋回

寄舒城孙小渠

长忆匡庐孙子荆燕山契雅岂忘情
雪中诗酒淹琼漏月下笙歌遶鳳城
萍梗天涯嗟宦迹桂香秋晚慕才名
江湖双鲤开春渌珍重缄书达海瀛

辛酉寒食同春泉兄小饮【用韵】

暝扫春云宴小堂孤城海月正苍苍
清风拂夜侵帘冷红雨飘烟入户香
人静竹窗犹共语酒酣花萼好
同床良宵且莫抛春梦曾向寒原听白杨

商林晓行

云暖烟消欲曙天行人驱马杏花前
故园桃李春如锦客路风尘日似年
山水倦人休未得功名老我少
无缘蓬瀛冉冉东来近早晚华堂菜彩翩

次韵中秋独酌感怀

鼓绝山城夜正幽雅怀对酒更何愁
功名勘破浮生梦风月清余海国秋
一醉良宵情泄泄孤吟残漏思悠悠
徘徊未遣嫦娥别遮莫鸡人五报筹

沭阳早发

山城挝鼓四更时官道萧萧马正嘶
霜重敝貂寒透骨月明啼鴈迴生思
长风游子驱千里乔木微禽羨一枝
坐损红颜成底事吴山楚水转相嗤

送张莼江太守擢贰南安

风正沧溟白鷁轻东山翻仰大江名
紫泥有宠憑谁借赤子无缘空复情
身世百年揖隼杰口碑千古自分明
青钱那复期君一为祝高门覬后生

早春雪后独坐

东风吹雪剧春寒幽室孤居对碧山
帘外冻云青不散檐前新月冷初弯
十年宦迹惊残梦一息尘机慰老闲
竹里酒杯冥日夜流年休问镜中颜

雪中思梅

忆向东风雪几番小庭寥落玉栏干
暗香何处凌寒度疎影谁家彻夜看
独弄虞弦春昼静空余羌管月明残
金樽彩笔孤清赏惆怅江云兴未阑

用韵春闲二首

白发恬居沧海滨兰裾不浣属车尘
风前听竹冲牙细雨后看山翠黛新
香惹梵烟莲社叟醉沉花坞葛天民
不教拾得芳菲恨数把金樽挽却春

秦关东下罢征骖久客燕山此日南
万里秋尘孤鸟倦五湖春水寸心涵
清樽夜夜情何极碧树年年人岂堪
飞翰谢无风雨驶钵催客次每教三

次韵秋兴二首

一叶银床早报秋天声涛卷下西楼
翠篁逸兴开三径黄菊清光专一丘
千古英雄翻浪雪一身天地笑蜉蝣
年来叹息风尘事潮落潮生青海头

穷海幽潜傍鹤田优游清境不知年
松阴月落收窗外山色云开到案前
渡晚红迷霞际水汲晨青破石龕烟
闲闲敢自忘斯世秋酿醺人日酪然

雨中桃花

惊风疎雨度新枝晓裊红妆半不支
含泪有情胡塞别沐芳无力华清时
胭脂冷湿青烟合绛雪香沉碧藓滋
帘卷幽轩看不厌漫漫春浸武陵涯

闲坐

幽人无事坐虚堂小院风清日正长芳圃雨晴翻紫药短墙云静倚修篁红尘车马迷清昼金谷笙歌共夕阳多少欲闲闲未得一般深味满诗肠

小珠山秀倚城南咫尺嵌崟老未登览闻其胜而慕之用杨公可久韵漫赋寄懷

白头伊迩未跻攀闻道竒观絶宇寰送尽归云残照里兴高终日翠微间
緱山鹤去尘縁渺天姥魂飞月下还竟欲晚寻麋鹿迹俗羈争得片时闲

次韵仇太守背儿山

山风飒飒向清秋古屋探幽一暂留飞瀑匄雷青壁下弱云如水翠岩流闲中日月抛双鸟静里烟霞笑五侯何用红尘空白首全身是处即丹丘

次韵滴水庵

灵源莫测此归淳千古摩尼下翠屏环佩有声寒出谷蛟龙沉碧夜吞星清开尘眼还侵骨静照禅心不役形拟访真如来物外冥冥白首坐烟青

次韵岁寒亭

絶壁荒亭岁月深长松郁郁荫寒林曾教炎暑来酷吏谁向清风会赏音冰雪有情偕暮节乾坤无地表贞心寂寥尽日啼幽鸟何事游人未解襟

次韵张莼江太守过松山

古干蟠云老翠虬清风骚屑暂来休半天晴影苍崖畔一派新凉碧海隈秋色故余还似水涛声欲泻未成流烦襟久已无从涤此日经过许散愁

北窻

北窻一枕寄高情久息尘机心独清卧看闲云来自变静听啼鸟暗遗声苍筠冷浸华胥梦赤夏凉生白玉京老去日休无一恙不须药物更身轻

古城

古城矗矗碧云茫往迹经过感丧亡流水有声号暮靄远山无语送斜阳豪华恨逐何时尽野草愁余故国长风景萧然徒极目平沙渺渺鴈行行

唁月林谪归道中喜见羣山

终日纷纷俗务中出门喜见翠螺峯幽情久抱空斑鬢胜槩长孤祗醉翁拟采紫芝休晚岁便从白鹿仰高风同心欲拉丹丘子又恐春雷起卧龙

独居

独居独坐独闲行岂有比邻慰此生翠岱向人原不语綠溪遶我去无情焦桐古调憑谁奏彩笔新诗祗自賡一片野鸥苍海上好风良月共魂清

都城冬夜醉眠

霜满珠帘月满天鳳城挝鼓夜悠然风尘宦况淡于水山海归心急似弦一醉清宵冥世态五更银烛揽愁眠蓼虫合是忘辛物白首衰颓恨未前

晓过纪省吾灵济宫次舍

曙色苍苍驻绣鞍银台仙子梦初残晴霞玉阙韬秋日青靄朱门琐晓寒病骨可能

依睡鹤旅魂常自遶吟坛西风合笑尘羈久郁郁憑谁说肺肝

送管励山进士尹六合

夷吾秋晚之江左鲍叔情深■〈糸 眷〉水头百里苍生明主意万山青霭故人愁
弹琴更有昔人兴鸣鳳终看盛世休衰柳西风一杯酒好将忠赤答旁求

小雪初晴夜坐有懷倪若谷中舍

小雪初晴永夜寒挑灯长忆老倪寬襟涵渊海探非易调入阳春和更难云冷鴈声
人不寐窻虚月转漏将残小桥犹自限南北孤负良宵兴未阑

北司狱中用苏长公韵二首

嘉靖甲寅秋秋曹檄捕豪校某因获罪东湖翁劾执坐死赖元老科台之力仅复瓦
全垂死中时泄幽悃

直从枯槁探阳春翻作冥投却殒身地下不惭今日鬼天涯望絕故乡人独知心上
原无累岂信人间更有神松菊海边千里恨残魂零落更何因

金吾肃穆晚风凄玉漏迟迟银汉低何意微躯投猛虎祇緣薄禄混羣鸡如弦速患
思先哲绕指全身负拙妻或觐一生濒万死渔樵云水任东西

西台狱中简杨椒山

北风沉漏夜如年辗转愁人独不眠颓壁浓霜寒冽冽破窻残月冷娟娟故乡有梦
人千里病骨谁怜雪满颠垂老自嗟还自笑飞鸿谁复慕江天

次韵酬杨椒山四首

夙挹风流效折巾低头此日愧山人出门有碍应懷古学道无成合累身筋力日衰
犹蹈险风霜夜寂更伤神拂衣未遂江湖意补袞终慚社稷臣

蓬瀛回首欲沾巾势入艰危托故人褊性由来难避俗迂儒垂老拙谋身赭衣相值
仇秦越彩笔谁看泣鬼神辛苦不妨淹日月授书喜有汉良臣

海上长思鸟角巾樊笼愁杀宦游人空随秋鴈频回首安得晨风一奋身古柏凌风
常淅沥老梅含雪更精神赋诗共荷天王圣取罪还知自小臣

曾向王公浪脱巾英豪跌宕迈稠人乾坤老我凋双鬓风月憑谁伴一身事变苍黄
堪堕泪天高视听岂无神穷阴急景催年暮引领金鸡释罪臣

大名野水舟中

野渡茫茫接晓烟艰难世路复登船蒹葭声里风惊雨杨柳丛中水拍天钓艇日闲
谁是主莘洲秋老自应怜天涯宦况澹如许一望东溟一慨然

淇县道中望西山有感

海天回首思茫茫入眼青山欲断肠缥渺烟芜秦塞迥飘零霜树楚云凉逢人把酒
酣清夜高兴题诗付锦囊自叹路难未已此行真自媿王阳

阆乡道中

六十颓龄独可叹五千余里一微官河临断岸魂应断径入寒岩胆亦寒白鴈关心

秋杳杳黄尘吹面日漫漫篱英烂漫情如失岭树迢迢兴欲阑

清丰道中逢云南戴玉园推府

漫漫长路可堪愁何幸英雄际盛游落木晚山人似约短亭浊酒意无休阳春雅调
曾谁和雪夜高情此日酬萍梗秋风仍万里陇云滇水思悠悠

观诸陵有感

人间富贵只如斯地下英魂莫自痴两汉风流秋寂寂二秦功业草离离丘陵何用
千年计指点空令万古悲西饿匹夫今不见高名竟与首阳夷

干沟驿道中

迢迢秦川合断肠病躯白发日仓皇黄云渺渺望不极紫塞茫茫情自伤淅沥高风
初作凜臃冷月尚含光山城半夜无灯火调尽霜笳漏正长

宿青家驿

古驿萧条独宿时悲风吹动故乡思踈灯半夜窗前暗残漏孤城月下迟人为浮名
来絶塞书因遥阻到无期梦魂忽忽惊寒榻唱彻鸡声又路岐

青家驿晓发

肩輿清晓出山城塞上风烟怆客情日畔旌旗微有色霜中鼙鼓暗无声凝寒割面
重裘薄晚节忘身一羽轻多病不堪劳远役羞将药裹伴微名

次韵落花

蔌蔌飘零绛雪光合烟苍藓不成妆蝶蜂几日怜春色风雨连宵妬异香浮去漫随
无意水拾来长忆有情郎玉阶不扫黄昏月檀板金樽坐晚凉

鸡冠花

亭亭斜倚玉栏秋缓带仙妆尘外幽对日欲酣红晕脸舞风如意锦纏头夺炎自惜
班姬扇妬夜还生青女愁谁把芳姿拟骁健争妍鬪宠一生羞

野人鬻鹤

何事皋禽紫野狂云霄仙格堕尘乡儿童白日骇心肉食黄金议豕羊雪羽投入
混鸡鹜青泉得意笑林塘瑶池万里嗟残梦灵囿千年空断肠

南山晓行

石径无媒野草青悠悠驱马晓烟横霞分曙色浮苍莽云冷秋空倚翠屏麋鹿闲眠
骇征轡山花开口笑行旌西风卷地迴萧索独叩龙泉吁紫冥

过苏州

云锦乘风吴水头繁华满眼过苏州青楼帘箔烟花暖画舫笙箫潋滟浮薄雾山钟
惊市晚斜阳渔笛使人愁孤舟对酒不成醉明月胥门坐未休

宿望江

北风云暗雨如丝暖暖孤村欲暝时野港系舟聊寓宿寒宵沽酒独吟诗乾坤旷荡
浑无用湖海淹淫未有期一点青灯千里梦江山岁晚结幽思

落叶

霜冷风清绿已休纷纷黄紫总惊秋僧廊凌乱无人扫江国萧条剧客愁山麓一空
天际阔纱窗终夕雨声悠青娥岂是无情物剥复真机不自由

晚春小斋即事

小庭人静惬春长珠箔微风度暗香雨过槛花开锦绣日高樊鸟啄笙簧修篁郁郁
云依石晴絮霏霏雪满廊一曲焦桐一榻梦不知身世在羲皇

秋夜

秋色愁人夜不眠鸣蛩四壁意萧然小窗影落松檐月虚室寒生竹户烟巧伪向人
今有腩文章憎命古无缘平生合恨谋生拙坐遣白头媿少年

道见饥民扫拾草子

渺渺荒原雪欲残穷民无计扫凝寒置锥无地周田壤潦水滔天舜帝难困麓已空
犹菜色簸扬何日足饥餐散金不解书生策徒向陈红发浩叹

诸城道中

孤村酒尽促征鞍急景凋年道路难四野荒烟迷客望半山残雪迫人寒孤依玄鹤
林间唳百中青骹草际餐冉冉危冈下余暎马啼何处说辛酸

春夜懷马珠岩

春夜沉沉春月明春光不与故人并星河庭院何时曙烟霭溪桥无限情沧海交游
齐鲍叔玉堂文藻汉张衡迢迢画角吹残梦寥落梅花负短檠

己酉除夕

五十今宵除已尽明朝五十一相依年逾尼父未知命老过蘧翁曾悟非世事无憑
慚我拙文章何益壮心违酒杯且莫浮椒栢辛苦平生岂细微

贺吴司训荣膺台獎

妙简蓬瀛适可亲风流儒雅更无论玄机秘启青藜夜大造潜回绛帐春桃李门前
新雨足弦歌海上古风淳明时岂负旌贤宠会见霜台苔紫宸

夏日久雨简高介亭三首

淫雨凄凄久不收烟云迢迢暗沧洲画檐泉落消烦暑疎竹凉生歛早秋青眼谁为
心上友苍筠梦遶泮南楼芭蕉声里无穷思独倚闲窗听未休

对雨高斋兴未收幽居清旷亦仙洲云来云去朝还暮花落花开春又秋已遣乱蛙
喧鼓吹不成雌霓挂岑楼巫阳合自仙衣湿何事霏霏不肯休

溪头雨暗钓纶收蒻笠纔归芦荻洲逸兴唤来西舍酒清风卧向北窗秋梧阶滴破
江湘梦烟景题堪海岳楼日夜潇潇浑不已老懷佳趣亦无休

用韵喜晴二首

几日愁霖一夕收晴薰吹绿满苹洲山光浥润浓如画水气生寒忽作秋竹坞烟销
频驻履海天云尽一登楼啼莺恐负芳时饮花外催人故不休

云雨从前梦一场园林转觉倍生芳青青杨柳听齐女袅袅芙蓉慰楚裳别沼旋添三尺绿小窗新透百花香光风拂面吟怀爽缓步青芜到夕阳

春夜对瓶中杏花独酌

红明团雪水晶中对酌幽轩入暝清绛蜡光涵香玉莹绿觞影动锦波生瑶台十二春何在粉黛三千意独轻叵耐芳妍终夜醉不须歌舞自多情

用翟楼村进士原韵寄乃兄雩泉进士

一生襟抱二难知金石论心岂易移梦里禁钟犹劝酒肠回僧宇共题诗秋鸿十载南飞日老鹤孤云北望时春草才名空怅恨一行寥落对残卮

用韵喜侄懷慎至盐城二首

玄子南游白鹭洲谢安久客慰赓酬良宵有兴频烧烛急景酣歌不下楼青眼天涯春几许白头乡思日三秋重嗟筋力江天阔拟伴青藜返故州

月明寒暝荻花洲骨肉相逢重与酬酒美他乡抛骏马话残清漏向朱楼孤儿不灭终天恨老梦翻惊断鴈秋吴楚壮游寻胜迹伍员英烈尚中州

盐城残腊久雪

穷阴晦朔雪■〈毛参〉■〈毛参〉残腊严凝冷不堪万里杨花飞漠北千峯玉笋换江南画檐琼筍清联阁古砚玄冰暗透函羔袖龙钟无那老月明长夜酒杯酣

寄吊丘月林丧塚器肖林进士

紫绶青春玉帝归哀君肠断旅魂飞绿芳早为青娥妬白发翻惊丹桂违邴老情深损眠食山翁泪落湿裳衣题诗春鴈遥相慰珍重琅玕待紫微

丁卯盐城重逢初度时慎修公出南都

秋风飒飒鬓萧萧从宦残年思尚饶江上征帆迷远树瀛西歌管隔重霄久违亲故虚风月暂狎儿童慰寂寥明逐翥鸾归去后还人景色倍逍遥

隆庆丁卯八月九日感懷二首

八月九日天气清同文四海试羣英蟾宫媿我昔年志蚕食看人此际声江左朱衣非是梦【谓慎修与帘事戒也】海边丹凤拟先鸣【谓慎几与试事勉也】白头已误青袍拙奕世科名覬后生

壮图曾此泪沾衣老向人间混是非得失功名春梦断古今荣利露华晞身归大块茫茫眇心向空门种种稀莫说风檐争寸晷且将杯酒送斜晖

丁卯盐城中秋感懷【有序】

是秋慎修分帘南都慎几应试东省老妻携慎动儿胶东衰叟从银莺孙盐渎固皆一时美事然值此良宵而能无感漫赋用纪客懷云

中秋云尽月华凉骨肉良宵寄四方一鳳南飞奎耀彩三郎西赴月探香荆簪携幼沧溟曲藜杖弄孙淮水傍共向一轮清影下离情各自抱衷肠

次韵吹笛牧儿

短笛山童学跨牛
英音不着利名愁
雨昏杨柳堪肠断
月冷关山合泪流
三弄缓归荒落晚
数声吹老绿芜秋
太平有象清风外
飘落梅花遍海陬

己巳元夕二首

考鼓搥钟夜正赊
畅怀春事老烟霞
楼台月暎蓬山色
歌管风清仙子家
绮席有情催刻漏
山城无事共誼哗
黄柑绿酒堪乘兴
一醉相忘两鬓华

新逢三五兴初赊
玉漏迟迟进紫霞
明月翫来知几醉
华灯看去说谁家
祠开太乙春方剧
禁弛金吾夜正哗
七袞放歌欢故里
十年羁客笑京华

登楼晴眺

宿云收尽晓初晴
独倚楼台寓目清
乱水拖蓝遥接海
千峯凝翠蔼连城
兴高平楚朱栏外
酒送飞花小院轻
尘点不侵寥廓静
超然身世在蓬瀛

夏日雨后闲居简秦余台太守

夏木阴阴雨乍过
幽人独适向山阿
啼莺隔岸笙簧细
古藓侵阶翡翠多
竹杖缓移苍霭径
钓丝偶动碧云波
巢由乐有明良在
枕上华胥醉后歌

高时斋节推署胶事春日简上

九霄旌旆拂春烟
遐域苍生慰所天
关陇豪华辉海岱
伊周声闻达幽燕
青阳化协穷阴后
玉树清依暖吹前
林壑熙熙欢不已
伫看鸣凤五云边

次韵唐人刘阮五首

刘阮游天台

翠微深入兴方新
却笑浮生误紫尘
绝壁恍开他日梦
片云拟老此生身
真机有悟元非晚
清景无涯别是春
采徧紫芝从浩漫
绮园犹笑汉羈人

刘阮洞中遇诸仙子

洞遶寒溪古木苍
偶穷云际出微茫
不知天上归蟾窟
疑有人间奏凤簧
青眼梦中心未稳
瑶池春迹兴初长
匆匆却讶相逢好
自是相逢悞二郎

仙子送刘阮出洞

名山高峙倚三台
何事郎归何事来
紫帐儵惊青鸟别
翠岑遥送彩云开
杨花决绝应难致
溪水悠长可易回
洞口歌残千古恨
萧条风雨老莓苔

仙子洞中有怀刘阮

卧怜薄幸损霓裳
古洞生寒思正长
芳草不归春寂寞
斜阳凝望晚苍茫
鹤飞沧海云初断
人远瑶台花自香
风树萧萧月炯炯
晤郎仿佛复羞郎

刘阮再到天台不复见诸仙子

欢合从前记尚真
不堪重问杳音尘
玉箫金粉遗新恨
红树青山失旧邻
野鸟唤回花底梦
水云凄断洞中春
故乡落寞人去空
对斜晖愁杀人

次韵懒出门酬水南

柴门反闭动经旬
竹石琴书是所亲
半榻清风成独坐
一瓢春酒共谁斟
浮云有变

归冥默世务无凭混伪真却笑生平多滞碍出门何处可容身

逆前韵

出门何处可容身梦里乾坤莫认真晋楚豪华浑不见阮刘寂寞更能斟在天富贵
应难必到手壶觞自可亲月夕花朝从我好合期共醉百余旬

癸卯中秋

酒满金樽月满天清秋儿女笑星前乔松空自传千古金石谁同固万年三百清铜
直土直沉酣良夜拟神仙人生莫遣佳时负岂有江河西复还

次韵胡虚白公苏武牧羊图

羝乳何年仗节旄中原君相久忘劳珊钩歌击秋风细金屋沉酣夜月高多病茂陵
归驷马诙谐方朔已绯袍中郎老迺归来宠独把青铜叹鬓毛

癸酉秋苦雨

带雨闲云西复东朝昏巫女意匆匆蓬瀛望絶连天雾湖海波翻暮地风临水花涵
青镜里看苔人在翠帷中炊珠爨桂秋将晚祗有题诗兴未穷

又

天空石破偶惊猜逗漏鸿泉海国来长昼翻盆迷白日连宵注瀑鬪狂雷三旬水潦
无余地八十年来未见灾老插渔竿闲卧处中原点检济川才

小楼晚兴

独倚阑干眺夕晖山城秋色正依稀蝉声不定风枝袅虹影初残雨意微看去墨云
双鸟没听来紫塞一鸿归悠然清兴不可寫明月满庭梧叶飞

春晓枕上偶成

语燕匆匆傍曙归幽人慵起闭柴扉梦回花坞啼春鸟人静松窗锁晓霏城市意闲
青嶂在交游情澹紫尘违衰残无事冥搜苦清对琴床卧翠微

蛩声

清秋何事此悲蛩散入尘寰恨不同旧国荒榛寒雨里古陵衰草夕阳中沉沉庭院
残更月寂寂楼台落木风无奈年年苦相值是谁沉醉在笙镛

春日楼上琴余小饮

长昼如何愜好懷琴樽清暇画楼开朱弦久为王门絕白雪新传郢客来骏马五花
能换酒浮生一梦可衔杯醉中更有憑阑兴满目山川媿匪才

盐城新秋即事

凉风吹人七月前清秋爽气开新鲜狂雨既过乱藓湿远山欲瘦孤云连黄叶萋庭
自作舞青虫吐丝相对悬稻花飞香海署静何处老翁来醉眠

海壑吟稿卷四

●钦定四库全书

海壑吟稿卷五

（明）赵完璧 撰

○七言律诗【下】

庚戌京邸除夕

的的寒灯照寂寥凄凄乡国望迢迢樽前欲醉肠应断客里逢春冷未消雪暗归鸿
书不至云迷孤鹤思无聊衰年合笑燕山客独对东风慕圣朝

再次韵孙小渠除夕

一年将尽寄金台千里萧条独举杯腊候无聊灯下别春光有顷暗中来身羁异境
添霜鬓心逐薰炉化劫灰乡国好凭飞梦去数声寒角故吹回

白川

万顷长川入望平烟开渺渺澹虚清翔鸥飞鹭茫如失落絮游丝迴未明极目晴光
霜练净迫人寒色玉尘轻悠然太素还千古一幅齐纨画未成

春夜饮王吉庵兄弟宅醉归赋简

春夜沉沉漏未终画堂银烛暖摇红鍾期古调尘氛外逸少家风谈笑中紫陌醉迷
青海月苍苔健倒白头翁天涯何幸逢知己聊慰羁愁日夜东

京邸清明

遥忆芳菲故里春长安怜作一羁人松楸望断青山外花鸟清孤沧海濱黄雾楼台
相识尽玉壶醪醕为谁斟寂寥独倚东风醉帘幕黄昏燕子新

次韵送张省几司城归休

镜干繁剧试多年报主衰颇惕皓然回首不堪孤鹤怨拂衣曾为一丝牵斜阳晚浦
怜樽酒归鴈春风慰海天满目红尘陶令去羁人泪落五云边

艾山晚归

斜日亭亭石径归秋风飒飒卷征衣林声度晚醒残酒山气生寒下翠微黄菊暂留
乌帽去落霞遥逐断鸿飞苍茫犹自余清兴新月依人弄夕晖

癸丑寒食

无限花开无限情此身那得一闲行银鞍柳外谁家子玉笛风前何处声俗务绊人
春已老清光犹梦醉难成赏心久负浮生意鸥鹭争如早缔盟

春暮感懷

春色初阑杏雪飞恼人情思暗依依风尘满目谁相慰觞咏无心久自违云断遠山
虚淑景帘垂清昼送斜晖天真欲写仍羁旅白首淹迟未拂衣

九日集饮边乐亭工所二首

不见黄花两度秋西风此日共优游青山入望飞难近俗事侵人却未休佳节祇今
怜白髮赏心思昔对金甌征鸿落叶无吟兴暂把茱萸一破愁

燕山风物向高秋税驾尘机合暂游寒日晚篱黄欲破淡烟晴野绿初休官衙窃禄
惭金阙人事伤懷到玉甌山水幽闲何日遂蓬瀛回首浪生愁

晚秋过城西广通寺用韵

飒飒秋风静法堂幽吟无与共酣觞踈踈寶树垂清影冉冉天花散异香落照催归
山郭寺渔舟看弄水云乡迟留合慰偷门意俗扰从来抱恨长

次韵李东冈关山

逢人是处说关山岩险真成百二关空谷阴寒催白髮崇峦颠顿损朱颜才输周召
应知止老入氏羌却忆闲落日啼猿肠欲断可堪征袖泪痕斑

流曲河

流曲河边促晓行桃源乍喜赴仙程溪声雪激寒潮吼山色屏开翠黛明杨柳石矶
白昼静桑麻村落碧烟轻倥偬不慰徘徊意风送黄尘无限情

早春用韵

东风策策拂余寒静掩柴扉戴鶡冠晷影渐舒闲里度梅红初上醉中看烧兰暖合
芳庭霭煮茗清分活水湍衰谢却宜春色早韶华真与意相安

次黄海野韵寄李翁明斋

壮心飞向白云头桂窟蓬瀛拟漫游勲业不堪青镜老璠玠早为碧山留孤踪怅望
韶华暮双眼迢迢烟树稠风月满天春寂寂相违相忆两无休

雨后夜坐

赤日煎沙苦未休墨云拖雨倏然收中天霁魄三更昼一夕新凉六月秋深院无人
风细细古槐垂露夜悠悠坐斜星汉清无寐酒醒芳庭独自讴

次韵登艾山

风尘梦想故山游白髮投簪向急流世路不堪惊险絕幽懷自合老林丘放歌邈逸
青冥鹄把酒茫然沧海洲黄綺一归紫芝老白云此日慰乡愁

次韵刈麦

宦海风波已倦游东山生计老春秋杜鹃啼歇桑重綠梅雨晴初麦乍收饼饵香风
新足慰流移此日故还稠巢由何与唐虞事自是江湖魏阙忧

庭下新凿二小泉

小泉新凿碧泓渟混沌凿开双眼明入夜沧光动银汉浮空霁色接沧溟孤居适意
寒江破一片闲心秋影澄不敢濯纓荡萍翠鱼龙时作雨云冥

七月苦热

纔喜新秋不自胜岂期烦暑转相仍微风小动炉中出虚阁高凌甑里蒸汗浹徒劳
白羽扇肺干空想玉壶冰倏然欲奋凌风翼汗漫清虚去未能

赠江龙所别驾署胶

风流文藻挹英贤彩笔通灵有异传冀北羣空还自负汉南独步更谁先沧溟治绩
曾无右青史勲名不道前垂老会逢今日盛相忘夔契醉尧天

曹文村晚归

斜日荒山返旆旌野烟迢递暗孤城路迷春草连云碧水遶寒川隔岸明细雨不禁
花外冷惊风可奈树边声芳菲有兴催归急每苦登临不称情

癸酉夏日赴西庄

翠柳千条拂晓风乱山如迓拥晴空闲情缓辔蝉声里幽兴题诗烟霭中野草连天
望迢递人家隔水正冥蒙青松短壑遥相慰一入白云暑自穷

癸酉七夕

雨霁风清佳夕闲从人遥指绛河间鹊桥诞妄今何在牛女虚无岁往还祇以盈盈
一水隔却疑脉脉两情关人间底事仍相乞梦向颠迷话更艰

癸酉秋阅慎几应试晓发感书

癸酉秋七月之望慎几晓赴省闱宵雨甫霁晓曦苍凉清吹激于虚襟烟光染于迢
递抚清爽之凝眸而早岁壮懷怵然又动且慨老无成貽讥薄子良可莞恨但二郎已叨
甲第三郎又觐秋捷亦海曲之荧光仅为末龄薄慰耳漫尔此赋

一番清爽雨初晴正是英才折桂行云路秋风香飒飒海山晓色翠盈盈壮懷有激
仍昔日大笑无成奈后生白髮关情还作喜几家麟鳳迭芳声

赠王碧溪太守

晋鲁勲名夙所钦朱幡适慰海之滨苍生旷被岐风旧白首重看汉吏新妙简无私
遭圣主催科有政属能臣虎牢晚托重关险犬吠生厘拟诵频【谓崇墉有绩】

闻试沧海遗珠感赋

精英夙自结骊龙明月清光重海东拟破幽昏当暮夜合增辉彩向琼宫沉泥沧浦
知谁惜按剑朱门总未逢安得高风来象罔便应长价到隋公

清明

春入清明自可游窃将乐事脱闲愁落花烟里从春酌细柳风前纵野讴去岁陇添
今岁墓千年人悞百年谋六龙不为人间驻莫遣风尘空白头

残腊小雪晚晴

小雪随风旋复晴晚曛独眺自分明云归海浦寒空净烟迴川原冷玉轻顷刻作花
非积素颠狂为瑞竟虚名冬深不协苍生望徒遣微阴蔽太清

书能仁寺上人壁间

十二回廊月正明菩提相见悟三生法云真际醒尘眼寶树清阴慰客情一壑泉鸣
惊卓锡半天风下质飞旌金绳梦想开迷境此日相从憩化城

五夜不寐

修篁移影月初沉青女侵窗夜不禁星下繁机犹在眼海边归梦尚关心啼残沙鴈
燕云冷开徧篱英塞日深辗转寒更浑不寐媿羈升斗未抽簪

旅夜

霜清月白酒初醒呜咽悲笳调鳳城纱静老梅横瘦影庭空踈竹送寒声羈愁多病

头应白王事关心梦不清辗转残更眠未得宦情争似故乡情

次韵秋园晚兴

残照离离带远林秋园晚色豁尘襟玉栏风细梧桐落石窦烟涵蟋蟀吟题句恨无
堪刻竹归巢喜有倦飞禽金钱满地知谁惜醉卧苍苔兴独深

喜月林奉使回京师

他乡大喜故人回尘抱相从一暂开芝宇三秋孤馆梦萍踪万里五云偕北风兴逸
燕山酒皎月歌残郭隗台宦海由来无定所老懷可奈济川才

海屋添筹寿尹金峰侍御太翁

关河迢递思无穷落照苍茫望未通金阙日淹周柱史碧山云老汉芝翁烟开青鸟
揖金母筹徙沧溟礼木公天泽年来更优渥紫泥黄阁下清风

将旦盐城作

窗外惊风飒五更敝衾时觉冽寒生乍回旅梦闻残鼓倦写新词向短檠斜月半窗
余纸淡踈钟几杵带霜清十年不为朝鸡扰今听儿衙报晓声

夏日西庄

炎赫西来耽野芳古槐踈柳荫茅堂破窗不阻南薰细深院常涵宿雾凉茵枕清眠
移白日柴门幽启对沧浪杖藜散步平沙晚凄送鹤鸽泪万行【时春泉兄新逝】

南窗昼卧

石床偃仰趁南风窗落闲云雪倚空一枕清凉三伏外片时仙梦十洲中凌歊歌舞
云飞尽结绮繁华水自东七尺微躯沧海上悠然情兴老崆峒

感蝗

六月飞蝗过目频奇灾何事苦斯民天空不断回风雪陇际还惊蔽日尘倏作青娥
摧绿野旋看赤土泣苍旻谁将无食悲生计祇有催租愁杀人

次韵喜雨

阿香驱车海上来白雨跳波云暗隕灵泽千峰润枯槁洪泉一息消氛埃荷喧战剧
明珠碎竹淨凉生寒玉堆何幸苍生迓天锡从开一噓一衔杯

明川

晴碧横开滟滟春封姨乍息湛天真青冥聚散孤云影白鸟微茫落日津烟破不知
镕鉴客月临拟有弄珠人清光不借银河色莹彻灵襟觉日新

晓过章台

晓霜驱马过章台弱柳依依门半开梦破巫山云未散香销鸳被日初回竹低护犬
垂朱箔花落无人扫绿苔满眼烟花无限恨独输刘阮到天台

简吴兴谢生

康乐清风费梦思敢题凡鸟到门时瑶华日仰今何暮玉树云停迴未期半夜丝桐
还自贮平生尘榻为谁私碧窗看尽沧溟月寥落燕山浊酒卮

雪中趋公

半夜红灯踏雪行北风凛凛玉珂鸣貂裘被体故仍薄羔酒冲寒力已轻千里辛劳成底事一官衰老笑微名海边茅屋何时返金铨融融睡到明

春夜不寐

金柝声残夜已深鸭炉香炮拥寒衾松根余雪侵窗冷竹杪顽云接地阴坐久虚堂春悄悄梦回琐闼夜沉沉无眠不尽山城漏暗送啼鸿过北岑

春晓水边感兴

晓策花骢傍水涯清光何限竟谁知平湖雨霁兼葭绿曲岸风柔杨柳垂烟渚鸥闲开逸兴沧洲春晚负佳期尘埃满目空奔走衰倦应惭归去迟

次韵李南川览赵氏山泉

啼歇莺声午闭关卷帘长昼看春山洞门花落怜风雨石窟泉鸣讶佩环幽景不知辞组去红尘空自羨人闲相过聊对芳菲醉合释羁怀顷刻间

喜晴

封姨夜半驱黑云羲和海上推朱轮氛埃净洗碧天阔物色清开玄圃新光景无涯输老眼觞诗有兴属何人迂踈夙媿抽簪未白首红尘悞此身

秋晚

孤城秋老欲黄昏扶杖闲阶踏藓痕芳咀落英来砌畔吟听促织傍篱根微风病叶先投地斜日寒烟半在门诗景满庭人独倚飞鸿送尽水南村

寄酬阳信董光禄二首

燕山鸿鴈惜离羣二十余年杳未闻绿野可能敦夙好凤城长忆醉宵分沧溟迢递劳春梦岭树苍茫送暮云白髮已衰空桂结琼枝何以慰清芬

碧筒衔凤翠屏岩【劳山岩名】青眼披云白雪篇风雅旷闻金石韵辉容宛覩玉堂仙东山久亦从踈放西子那能斗媚妍醉里挥毫何以报不成金错意茫然

送丘月林制阋还京

故人北上黄金台烟花春暖沧溟隈荒山人远不相送仙尘望绝空徘徊十载朝廷慰如渴九天雨露欣重回岩廊拟翼明圣绩烟波一竿何快哉

闻喜五咏

嘉靖乙丑二月念九日慎修春捷来喜慰存没因遥第其荣恩而五咏之用识草茅之溢庆云

飞报捷音

痴儿谬附黄金榜阿祖今酬素日心六纪桂香承杏苑十年云路到琼林禹门雷吼蛟龙化魏阙风飞海岱音垂老不知天地报壮怀记取慎清勤

临轩策试

太平天子肃临轩广辑英贤慎采言金殿日明春昼永翠帘烟卷御香翻凤鸾际运

鸣时盛豚犬倾愚答圣恩野叟媿无今日训早期董贾此回论

庐传丹陛

瑞腾烟霭溢彤庭仙御旌幢拂曙星千载龙飞云雨合九霄綉下姓名馨黄金台上
天恩渥玄锡人间晓梦醒济济鳳麟辉日月儿曹忝窃庆周宁

宴賜琼林

琼林賜宴平生慕粲子何知此日荣玉笋碧桃穷日醉宫花綠鬢衰烟轻恩光沧海
三千里人在瑶台十二城遥想逢山归路晚新郎箫鼓竞相迎

荣释褐衣

褐衣本自草莱衣圣主登崇革贱微野水烟裾迴佩玉云山芝袖谢牙绯春风文炳
于菟变化日仪瞻彩鳳飞一介宠光何所报仲山袞补勉归依

十月初寒围炉小饮

一壶春酒对红炉十月初寒慰老夫云影满窓松影乱雪花点地柳花铺弄孙清夜
歌唐句教子彤庭効禹谟一枕游仙欢赏后楼台深处拟蓬壶

掖邑张南溪老友以赵见亭侍御诗扇见遗用韵寄答二首

日攀危磴俯回溪流赏清樽迴自携花气喜涵香霭榭潮声惊落矗云堤修篁对酌
风前舞好鸟窥人林外啼醉里狂歌闲里卧簪裳回首是沙泥

衰翁无复志礮溪山海逍遥一杖携寻话野僧春日寺听蝉高柳夕阳堤闲情不遣
花空落清赏曾教鸟自啼遥向旧知挥醉笔休教翰苑鄙尘泥【赵侍御以翰苑擢也】

桐阴

瑶台郁郁綠生寒净扫莓苔坐自看日下平铺金翡翠月明齐上玉栏干来仪拟集
丹山瑞戏翦休教紫禁残老我琴书孤樾下不知冠盖满长安

柳色

飏风弄日翠依依逐岁春妍故不违映渚不随流水去临岐常送玉驄归台城堤上
无兴废陶令门前有是非莫向笛声怨憔悴好随烟叟上鱼矶

竹韵

幽响萧萧隔座回秋声遥送楚湘来惊风满院清如许度霭闲窓静可猜琼佩人归
明月下綠琴调合碧云隈高斋剩有衔杯趣七子襟懷旷古开

蕉声

繁誼庭下卒难收风雨番番可自由朱箔不堪云悄悄綠窓无奈夜悠悠綺罗萃蔡
惊初度金石琤锵听未休独倚珊瑚向残漏不成蝴蝶恼莊周

次韵高双泉翁登楼写懷

雨霁烟萝故故凉悠然尘外岂皇皇垂纶适慰依沧海继马曾教度太行画阁卷帘
舒遠眺清泉煮茗润枯肠山人本自无多事酬倡新诗静里忙

慎修以夏曹郎出守维扬经年懷想间书来鬢渐生白因而感赋

庭教原来辅圣明十年燕阙又江城嗟予斜日青山暮闻尔秋霜绿鬓生南鴈怪迟
沧海信北堂莫慰彩衣情遥知蹇蹇难为孝不遣书题老泪倾

用韵丁丑除夕

衰老头颅尽已丝挑灯又送腊归时心慵万事惭予拙骨隐余酸祗自知倏去年华
怜栢酒几回春色向花期玄修已与灵龟合诤向人间一朵颺

用韵书懷三首

红尘回首笑牵丝正尔烟霞放浪时碧水青山如有待好风良月属相知侯封姜望
今非望寿拟安期那可期陶意琴尊从白首不将熊鸟作颠颺

高节桐江慕一丝壮心苦惜暮年时随珠夜掷多相讶楚璞烟涵几见知碧柳自栽
栖靖节朱弦欲奏失钟期危楼惟有沧溟月弄向清风一解颺

冥搜太苦绎蛛丝得意酣歌向暮时花鸟闲情惟我适松篁雅操更谁知名虚蝴蝶
湏臾梦身寄蜉蝣浩漫期事变古今堪大笑悲丝何必泪交颺

哭内弟高介亭二首

介亭负俊才尹畿邑之丰润以覲事殂京邸闻讣哭之

一宿中宵陨帝京悲风飞讣过逢瀛伤心迢递还疑梦泪眼潺湲且未晴英采何归
空抱恨遗书犹在可堪情芙蓉别馆尘凡杳肠断朱弦夜夜声

英才何事委穷尘痛绝清时失凤麟分桂有情怜帝子种花遗惠哭丘民道旁说易
期何夕地下修文是几春独倚东风一相吊知予沧海更何人

戊寅新正四日雪中用唐韵一首

粉蝶惊春下短墙杨花早点鬓边霜月明迥彻清虚府帝泽先沾绿野堂秣李骇看
初岁艳枯槎犹借一时妆园林是处生春色愁杀穷荒仗节郎

己卯新正年登八袞家宴偶成

青眼明时八十春白头窃拟渭滨人青藜不用扶衰骨绛雪何须健老身凤凰双偕
桃洞久桂兰迭见武陵新神仙犹恐虚无迹欢会蓬瀛此更真

次韵登城楼

苦悲尘市上高楼老眼遥开天际头弦管云霄穷昼夜海山今古几风流汪洋万里
樽前兴紫翠千重分外幽一纵豪吟来胜概雅懷曾计未龄遒

金井

小铺金井碧粼粼琼玉参差照眼新花落清防俗客至苔生喜趁绿钱匀月明细浪
声沉夜雨霁如筛净脱尘醉向晚风从健倒摩挲惊汝莫相嗔

七月十二夜

几日烦襟暑不清天街此夕慰凉生翩翩华月随潮上霭霭青烟抱树轻露下寒蛩
凄四壁风前清漏杳孤城秋堂欲问如何夜竹影依稀石径横

春山

学弯新月两分明春霭连山淡欲盈入室纖蛾曾见嫉隔墙横翠重关情王书不至
双规损黛色初匀八字轻宛度清扬桃扇底怕教心捧更倾城

秋波

翠湖初落熨晴波明媚秋生奈尔何金鴈月辉珠未穩玉台云散镜初磨霜红密意
盈盈度银浦幽情脉脉多几许清光无限恨姑苏一瞬罢吴歌

哭黄海野妹丈三首

可惜仙才黄海翁秋风星陨海山东惊人彩笔原无敌直己清朝本至公湘水不归
兰蕙老长沙吊去古今同苍生莫慰当年望横涕滂沱哭上穹

逆前韵

有懷无路诉苍穹泉下人间渺不同何日化归华表鹤千年肠断石城公青山南卧
心犹北白髮西沉我尚东终日忆君君我弃空余残梦哭山翁

错前韵

暮景衰残尔我同断云落日已辞公伤懷问疾虚青简无计招魂向碧穹辽海燕山
总春梦惠音良晤失佳翁痛君洒尽平生泪淮水无情日夜东

自伤二首

幻身千古尽凋残是几登仙几涅盘迷境难开千眼相衰颜谁驻九还丹晚来岁月
惊如掷老去情懷澹自酸冥造不须愁里误酒杯端合强追欢

同游渐损逝川波病体支离奈老何甲子已周仍有几春秋过盛亦无多仙凡枘凿
终难合海岳沈迷岂易磨学道未成双鬢雪悠悠人事日蹉跎

雪中偶书

瑶霰万里逐风回漠漠穷阴冷不开野水冰连龙甲去海山碧浸玉壶来八荒旋作
残年瑞三尺仍余浩劫灰独倚老松醒醉眼平原不辨楚王台

人日观雪

青灵乍喜布阳和滕六侵权恣意过漠漠彤云昏日月皑皑白昼失山河东风欲拂
全无力宿莽初萌且奈何老眼仰天开一粲飏飞看作扑灯蛾

雪中潘边二老见枉夜归有懷

黯黯山城暮雪天幽轩解榻集英贤蓬云寒度潘邠老竹霭清延边孝先暖玉醲醲
醒紫茗博山香散拂朱弦情澜未竭仙舟放无影月中人不眠

首夏雨后晓起

列缺奔云裂海山夜阑雨歇晓开关修篁睡鹤寒烟紫小院无人细草斑啼鸟不来
诗兴寂落花飞尽酒杯闲苍苔满地抱孤闷独眺沧溟缥渺间

和穆少春前赐诗扇二首

踈狂取笑草鸣虫岂为幽兰播远风曾媿鲤庭无异教悞将鼠璞试良工玉堂彩笔
驰声久丹桂青云奕世雄池上鳳毛今不爽海人休说郢人同

书翰忘辛拟蓼虫酒酣随意洒清风脂铅不识惭愚妇剖劂无能媿拙工孙廌飞黄
来藻鉴薛函结绿际豪雄玄珠未必遗沧海此日何堪象罔同

和穆少春后赐诗扇二首

翰墨齐纨谢鲍才龙门迢递恨难裁银盘烂自沧溟吐锦绮新从蜀水来白髮可能
承玉唾清风犹慊涤烦埃神交徒尔侵衰暮却幸儿曹侍酒杯

抱瓮忘机老汉阴诗从鳳沼忽惊心孤高莫和阳春曲千载俄闻大雅音武库乍开
寒凜凜文虹遥射影沉沉诗豪适快明时覩悔蕪猩毫自不禁

海壑吟稿卷五

●钦定四库全书

海壑吟稿卷六

（明）赵完璧 撰

○三言

五杂组

五杂组宫姝色徃复还歌换拍不得已东方白

五杂组便佞口徃复还豺虎走不得已中散酒

○四言

翟家嘴道中

高山嶄岩冰溪互结北风凜如同云雨雪太荒阴烟飞鸟欲絶仆夫恍然征车未辍
前途何依想望天阙愴彼东溟我心已折

过西岩寺山

陟彼东巘寒云苍苍驱我轩车险阻且长猿猴我戏虎豹我当冰雪蔽途顾望斜阳
左攀双辘右怱干将奋然万里以趋康莊

○五言絶句

高玉翁左史见枉用韵赋简五首

夜堂酣若下春豆荐王余酒兴珊珊后乘龙过太虚

其二

孤云弃朱袂五柳谢金鱼萧散风尘外相将慰索居

其三

山鸟避人飞丘林遯自肥不縁黄鹤度尽日锁烟扉

其四

春残兼暮景志协怨离居处处堪乘兴时时有报书

其五

南极星飞彩东溟月渐西青藜扶去晚伴影度云溪

感物二首

欲系日沉彩欲障水湍流东西不我与耿耿心独忧
嗟嗟三闾子不复得懷王早以蕙兰悞岂虞萧艾香
春闲四首

曦射窓烟破风飘花露寒莺声清梦觉春色独凭栏
其二

莺啭玉笙细苔涵碧锦滋杨花春欲暮睡起和陶诗
其三

寂寂闲庭静离离春草生朱帘白日永空复落花情
其四

春阴山馆闲云静松花老玉琴寂不调清觞为谁倒
早春有感

东风吹老鬓衰槁渐成银不及闲庭草年年綠意新
草露

溥溥草上露珠玊明日华岂不照青眼湏臾良可嗟
盐城独坐

独坐淮南邑经年不可禁囊琴望秋浦对曰又西沉
感朝雨

昨夜众星列今朝雨不絕天时无定期人情那可说
有感

早有看花兴烟云竟不开每当花时节肠断几千回
鬓上偶见一白

鬓上一茎雪眼中一点血万事竟蹉跎难教心似铁
寶应湖渔舟

湖天一叶舟举网此生谋几许风波恶艰危不自由
小簔芙蓉图

幽石结灵根繁华不相识仙姿媚晚秋金屋无颜色
○六言

秋夜

凉月叫残蟋蟀西风落尽梧桐满耳秋声不寐寂寥延伫庭中
春日

微雨洗明苔色暖风吹破桃花竹里酒醒无事徘徊春日西斜
宿静宁州

踈竹半窓横影浓霜满院飞花梦破烧残红蜡更阑冷坠金螭
晚游温玉斋官邸亭台

幽境亭虚绿荫良宵花落青灯残月苍苍人去断云梦寐武陵
醒眼楚台烟月推襟晋代风流中夜烧残绛蜡孤城唱彻银筹

○七言

雨晓看菊

向晓踈篱看菊黄夜来微雨沐新妆西风好待吹云雾合送清香到玉堂
对菊小饮

小径黄花艳艳开晚风时有异香来长杨红粉知多少争似年年照酒杯
青州道中观古塚

荒塚累累春草青行人指点未分明英雄寂寞前朝迹落日东风恨未平
道遇寒食忆宋之问马上逢寒食句五咏其韵

秋千女儿桃李下柳外行人驻征马骄马嘶风桃李香愁人落日云平野
东风浩浩吹平旷红泪纷纷号冢上满地梨花春又来松楸海上凄行况
荒村寒食雨蒙蒙柳拂娇青桃欲红山馆留连聊把酒佳时尘世苦难逢
云外乌衣怯晓寒花间杜宇泣春残冷风踈雨行不得南陌清光自可叹
小雨清明烟火熄寒茶冷酒强饮食云冥家远野草青尽日相逢不相识
山猿窃桃图

佳实祇应酬国士绿香翻为野猿探不绿便捷先偷眼自是山翁午梦酣
观泉图

悬泉高挹九天回雪瀑虹飞尘抱开合笑狗名徒洗耳洒然何似洗心来
琵琶写怨图

红颜共策息金戈泪落哀弦奈若何昨夜单于毡帐底分明犹说汉山河
红叶题情图

潺潺御水出重关空复题红信不还薄命谁云秋叶似争如随水到人间
夜闻琵琶

何处琵琶向月明粉墙低度晚风清夜深多少王嫱怨寥落江州恨未平
次韵野居

沧溪遶屋野人家风静门闲鸟篆沙清梦乍回春昼永黄鹂啼上碧桃花
次韵春日感怀

朱箔微风燕子斜江山红绿总春华酒酣偶作懵腾睡梦醒飘零几树花
次韵答张当轩节判

白昼楼台空对酒朱帘烟雨独看花瑶华慰我惟平子祇恐春深早及瓜
一枝春色自应怜羞向东风鬪媚妍可恨少陵寥落久无人驱马过寒川
秋闺思

西风凄凄木叶下凉月皎皎抱君思思君见君一相慰梦回不如无梦时

次韵宫词五首

宫柳垂垂露欲黄西风吹冷妾衣裳妾身宫柳难相似咫尺东风入建章
昭阳殿里醉阳春歌管风来夜夜新错向台前怨颜色施恩承宠不由人
踈钟夜半过长杨歌舞争能得帝王书卷笔床何所益当年悔不事宫商
闻道仙幢下九垓是谁巧引羯车回殷懃学插朱扉竹又恐君王缓步来
中使开扃晓一通云车传驻上阳宫黄莺唤醒残春梦独对东风惜落红
塞下曲

万里胡天一寶刀霜风透骨不知劳壮心岂为封侯赏不遣旄头傍夜高
次韵古城

陈迹兴懷空野芳贤愚千载总亡羊牧儿不解丘墟恨横竹秋风弄夕阳
携琴小图

满天秋色月明中散步石梁趁晚风是处寒蛩纵繁响乾坤无地理丝桐
次韵赵松雪胡马图

俊逸风流帝室人素衣无计染燕尘画来胡马千年在遗恨中原要认真
次韵王媵出塞图

昨夜灯前旧守宫朝来零落向胡风无縁红粉违明主错恨黄金买画工
冬日过崔侍郎墓

残麟萧索半梅开潮咽悲风万古哀金盃玉鱼犹地下行人谁谒侍郎来
次韵雪夜

侯门灯火尚迟眠酒美歌楼别是天却有铁衣三十万谁怜彻骨冷屯边
风流太守

风流太守饮西家纔自东家日已斜乐意未央夜未曙不知门外雪飞花
读朱淑贞吊林和靖二絶因用韵偶成

婺女躔分处士星楚波宋焰有余清何縁红粉孤山吊技痒千名岂令名
十二栏干肠断时鸾凰失意却縁诗不将化石心应老犹向诗人吊古祠
用韵京邸春夜感懷

寂寂松凉月斜客身何事滞京华青灯落尽愁无尽酒美燕山不是家
坐对杨花

何处杨花小院轻卷帘孤坐午风清一春寥落江南梦肠断吴姬劝客情
都城闻西郊阅武

金郊月落促战鼓壮士喊声怒如虎将台百尺高入云北风寒透将军股
月夜会宁县道中

半天玄霭浮沙漠万里荒山接草莱千古婣娟恒此度不堪人自海边来
次韵鹤山晚钓

一片闲心系野藤 羈人紫翠遶千层 孤云小艇迷春梦 月满寒滩未起罍
感懷

六十余龄羈海头 山川远兴恨难酬 龙钟鹤髮心犹壮 日逐白云天际游
春夜

深院秋千儿女情 桃花香暖月华清 碧窓梦破啼鸦散 杨柳风前笑语声
盐城初夏雨中诵 不知春去几多时 纱窓几点黄梅雨 之句用赋十四首
雨中红瘦空肥绿 强把余香留寸曲 酒酣陡觉壮前春 为问来春还胜不
寂寥粉署少相知 微雨霏霏织暮丝 惆怅故山飞客梦 不堪杨柳唤莺儿
芳菲零落已残春 可惜韶华客邸身 清吏戒严孺子事 旋将狂叟作羈人
红芳梦里谢春归 白髮天涯仍醉去 曹腾几日未开帘 莓苔绿遍闲吟处
齷齪之畏何首尾 七十余龄知有几 赏心莫问春去来 秉烛风流自英伟
雨落残红晓更多 留春不住柰春何 春来莫遣伤春后 几度春归两鬓皤
正是桑榆陶写时 客中丝竹媿羲之 淮南四月风和雨 尽日垂帘独赋诗
异乡红紫老春华 故国芳时不在家 柰尔青青数竿竹 天涯风雨伴窓纱
连朝风雨度沧江 接地烟云暗海邦 王事沈郎仙棹迴 白头半夜倚寒窓
踈雨冷风暮复朝 翠林红萼知余几 十二阑干无限情 锦囊清昼闲焦尾
儿役王程我拘检 官衙雨渍重门掩 森围湖水绿千重 不见蓬山青一点
别将鼓吹慰诗肠 斗酒芳柑傍海棠 调得玉笙无觅处 青烟低度小■〈利上黑下

〉黄

楚天四月熟黄梅 云雨年年会早来 日夜不堪江上客 寂寥惟有掌中杯
酒醒萧索桃花坞 云冷玉屏诗思苦 杨柳风清燕子低 幽轩帘卷黄昏雨
古意

飞梦依郎不可招 郎音杳杳妾寥寥 思郎不见郎帆在 日日门前送暮潮
鹤林玉露纪王荆公晚归钟山放鱼诗或因刺一絶余亦效次

相业当年负读书 一番新法太迂踈 苍生望絶公孙惠 何事终山学放鱼
七月十四日观虹

半天云雨半天晴 雌蜺连蜺斜照明 莫自巫阳归意倦 晚拖腰带背人横
晓起小雨落花满地感赋

小雨廉纖晓意寒 卷帘秋色落花残 无情一夜风吹尽 可柰多情满地看
丁卯盐城九日

江峰迢递独登台 满眼黄花暂举杯 两度重阳归未得 秋风千里望乡来
问僮

碧纱离离清影开 青僮扫花来玉阶 隔窓朝朝数相问 阴晴一夕不易猜
春残漫书

啼残野鸟春归去开遍好花人不知向晓高堂对青镜萧骚惟见鬓边丝
翫庭前风竹戏书

■〈女便〉娟细竹玉玲珑袅袅纖腰不耐风谁遣楚宫如意舞婆娑对酒日西东
次韵李亨庵辛夷花

惆怅春残尽日中新词欲写倦柔风珠玑不逐猩毫落意匠悠悠铸未工
阅来承宠若为容倦写蛾眉独倚风满目杨花心绪乱彷徨他桃李不言中
盐城官署对葵

伟干秣妍冒雨华粉墙摇曳晚风斜黄昏小院无人见孤负年芳独自嗟
雨夜

城头落日云重重倦吏闭门睡正浓雷雨满天来半夜定知海上起蟠龙
翟家嘴感懷

老妻海上肠应断弱子河西泪满襟独向关山对明月离懷三处总伤心
春日即事四首

满庭芳意绿茸茸独向瑶台步晚风一片残红飞翠藓可怜春色寂寥中
一声两声山鸟啼三日五日春雨凄柴门暗锁柳花碧闲馆无人醉似泥
松筱随风如意舞石床杂藓五色组悠然醉卧了不关一梦落尽桃花雨

修竹■〈女便〉娟尘外幽苍苔满地落花浮青藜散步东风软无个轩乘无个愁
睡起

寂寂清轩老病身闲情无頼写无因日长翻为琴书累恰度华胥意兴新
刘春台太守州治有大观天日近雄胜海山连之聯因十咏其韵简上
夔契唐虞值良会熙熙四海春无外酒酣欲作太平歌映然剑首乾坤大
海国熊轺一纵观凋残此日际刘寛东风到处苏春槁红树啼莺物色欢
圣明侧席苦遴贤卓老东来慰所天篱落不惊明夜月桑麻无事锁春烟
焦枯润溥商家霖凝沍欣宜盾之日岐阳旷矣三千秋青荒赤子今宁一
天地尔我元相近四知今古钦高韵何物犹烦暮夜辞私门争似无人问
风流儒雅慕豪雄勲业文章海岱空天地无私人似约仲舒端合到天东
癯自从肥窥战胜清操冰玉呈孤莹负义封侯自烈然尘埃詎为如钩应
庐陵太守来东海政和化美春常在惯寻山水积英贤朱弦欲奏朱颜改
龚黄芳誉重如山可慕当年不可攀银笔恨无今日传循良犹在口碑间
散逸云林彷彿连佐时全仗庙廊贤闭门不解当时务只合教儿读諫篇
次韵高侍郎鹑鸽山

百年幽癖向烟霞海岳茫茫日已斜开老苹花秋浦静野鸥来往水边沙
次韵东山樵径

谢组樵云白髮余阅来尘世合幽居萧然一径林峦外未必人心似坦如

栢闌将军庙

俗传将军战韩信败死庙于此

将军身自旧周来
大义还当仔细裁
御汉祗知今日死
帝秦已遣后人哀
落日二首

碧簟凉生愜日斜
胭脂飞满玉阶花
幽闲帘卷汀烟紫
遥送轻鸥过海涯
古木阴阴独据床
微风飒飒暗生凉
余酣清眺暮云尽
万点碧山秋兴长
金身范蠡

报国忠良义自深
几微早已见君心
金身却恨功成去
不去终难保似金
雪

朔吹飘飘雪满城
琼飞月莹眼中明
君看千古兴亡迹
谢馆袁门一样平
久雨新晴小步

云雨连朝不下堂
新晴小步翫庭芳
莓苔为我开清兴
是处氤氲翡翠光
瓶中花

清秋红翠浸冰壶
浪遣人夸絶世无
壮志肯教摧寸草
长松古栢拟身图
阅阎铎斲胫河之作用韵感赋

当年斲胫剧相看
股栗行人阻晓湍
莫笑行人行不得
不知天步已艰难
独酌

绿酒金樽花正开
闲庭白日好风来
樽中酒尽还沾得
花落明朝可易回
正月九日梦与春泉先兄凭栏看花赋诗觉来记首二句续补一絶

日暖风清花正开
雕栏双倚共徘徊
春窗梦破夜沉寂
淅沥寒声竹里来
癸酉次韵新春试笔十首酬友人

彩笔冰消试早春
墨花香暖暗薰人
媿无珠玉篇篇莹
却有龙蛇字字真
玉函暖透碧泓春
猩颖鸾笺更可人
扫去忽惊风雨落
右军潇洒自清真
挥毫不敢和阳春
逸少休论北面人
但使醉中常作客
有神词赋却怡真
萧萧短髮又经春
万事峥嵘属后人
惟有中书不终老
漫凭哦句写天真
七十高龄又始春
衰延愧过鲁儒人
一生词翰空成拙
曾悟玄关三昧真
笔阵珍传几百春
杜家诗法要惊人
年来漫兴挥毫处
草草花笺不用真
大梦悠悠几许春
浮生不悟古今人
酣觞高咏暂须乐
蕉鹿从来认未真
风软晴开碧海春
日长暖愜白头人
风流对客挥毫处
何用蓬山漫访真
紫极恩光万里春
觞诗欢赏百年人
木公金母知何许
双寿重逢此乐真

【时叨膺宠命乡人有双寿重封之庆故云】

挥洒凭谁共好春
青云何幸挹诗人
十分佳句凝清听
大历风流亦逼真
闻蝉

清响踈桐向夕流
年年一度使人愁
白头已尽惊如雪
又被催人鼓缶游

海壑吟稿卷六

●钦定四库全书

海壑吟稿卷七

（明）赵完璧 撰

○赋

寒宵赋

海壑子读书冬夜长宵沉沉凝寒凛如抚此穷阴怅然不寐是用有作辞曰颞頊司御兮移玄贞黑帝涣号兮趣朱明悲泉沉晖兮野霭冥驷宿耿耿兮流长空素蟾碾碧兮寒光清青娥肃征兮驾瓦水苍旻迴而星垂枯梢号而声悲大河伏涛兮凝璐连辉温泉封冻兮瑶华莹璀万动阒寂兮清庙进假其何諠广莫扬吹兮辕门号令之戒严寒云冥冥兮鸿鴈哀而流连黄竹萧萧兮玄鹤警而鸣旋松杉陨兮栏槛冷而凄然皜梅粲兮掩寒纱而晚娟怅铜龙之煞絶兮银筹淹息霜堞之笳奏兮鱼柝杳以声残轩楯沉菽兮朱箔翻重扉幽扃兮疏房寒兽火无光兮嘘之不燃兰灯冷青兮素膏凝盘抱云和兮绳絶揽冰纨兮绵折龙涎熄兮芬灭凤团委兮烟歇红丝冰兮玄结猩颖强兮摧缺悲暮节之隆严嗟众处之旷别乃有贵奢兮构罗绮于云霄暄蒸融融兮护絶域之重貂沉檀耀庭兮郁攸而香飘龙烛荧煌兮星分而红摇翠雉明兮袭锦袍据熊虎兮崇且高烹胎脯膳兮肥甘充庖醇醪菊美兮紫霞春饶素霓回旋兮舞纖腰贝齿声琅兮遏云遥琼岳頹兮紫绡金钿落兮娥媧驾被浮兰兮恍巫阳之魂交金鍾暖薰兮惕永漏之易消淫约悬絶兮竟罔知此寒宵悲风发兮情自如而陶陶若彼塞戎之宵征兮惨边声而泗流关山迴絶兮望故土于中州负浓霜之重铠兮寒彻骨而驱遁冲朔漠之惊沙兮月黯淡而云愁孤臣万里兮海天沉沉凤城云遠兮银汉无垠时易逝而岁晚兮忧忡如焚愴遐荒之逆斥兮耿长夜而虑深愁思妇于云屏兮心已摧水珊瑚之絳渍兮肠终夕而九回幽思沉以繚纒兮遊蛛丝于天隈合欢余寒以辗转兮金壶如海而鍾哀遊子未返兮天涯沦落羈馆岑寥兮怅戍烟之残角孤灯落而愁絶兮蝶悠扬而遠脱载夙兴以行迈兮抱离怀之忉怛驱渺茫兮寂鸡声之啞喔陟崇巔兮俯荒原而旷阔霜风凛其被面兮嗟敝裘之凉薄冰溪皓胶以迷途兮情惻楚其如割哉独无眠兮哀生寒庐炉无宿烬兮恶裳无

■〈糸如〉一饱无时兮凛切饥癯妻孥坐对兮相泣以吁冀今夕之昧旦兮伤来夕之何殊胡为终此岁寒兮仰苍穹其畴苏皇天运化兮无私于好恶四时平分兮岂以斯人而辍其凝沍推有生之厚薄兮允玄机之攸赋感逆顺之相遭兮忧乐安于所寓贵不可以拟贱兮贫与富之有数神祇无以辞其憾兮博济为圣贤所惧但造物惟人兮我心皇皇仰變理之任重兮惕此寒凉辟寢门而假寐兮趋火城之煌煌立双阙之残月兮霏裳履之满霜启九重以匡不逮兮吐瑶墀之鸡香格君于仁圣兮沛天德以怀万邦裘帽释兮三军挟纊而相忘雪宫同乐兮胥肉帛而有常夫无外旷兮内无怨女之彷徨彼四方之人兮孰不期温饱而我望苦冻馁之无闻兮霭和气而洋洋寒暑有代谢兮春晖煦而

悠长固君相之能事兮又安危关运化之否昌坐喟叹而漫漫兮其谁待旦汲汲于庙廊
顾兹寒微兮何以弘被抱此区区兮畅回春之溥及淑气敷以遐征兮罄寰宇而俱立偕
物我而悠然兮慰是夜之悒悒

○帐词

为儒学师生送童贞庵太守入觐帐词【并引】

伏以图灵启秘冥陶瑞世之贤方夏崇勲昭仰御天之睿故荒陬无久否会际贞良
而善治有奇馨协钦隆渥恭惟【某】官炎乡鸿笔罗渚仙才逸韵松飏冲怀桐月抱千
古江山之秀擅一时文藻之宗锦捷秋风回首龙超万蚁桂探寒窟扬眉虹贯九霄青钱
遴慎于玉堂鸚鵡易水赤邑寄專于墨绶骥展湘云三褫政成江城花暖一迁福赉海国
星高楚去而见思梦泽草长迷望齐来而嗟暮蓬瀛雨足腾欢德化洽于渤汇豚鱼毕信
恩光流于原野草木均辉王风返而恬熙醉慊村烟桑柘文泽深而汪濊光生璧水桃花
吾道孤旌金章企慕斯文正印玉笋联翩幸倾圯之经营遠鉴麦葵摇荡荷清寒之矜恤
曾闻苜蓿阑干秋风独翔已慰吹嘘天上春龙旅应还期辅翼江濱五马骋而恪诣宸枫
三鱣违而婵媛岐柳帘霏鸡舌御屏题汉循良佩转螭头帝室延周笃棊沐无涯之天宠
喜溢沧溟睽不世之邦侯情含翠岱晚山残雪寒侵綠蚁芳樽古道酸风吹断骊驹清咏
冠裳郁郁弦管嘈嘈长忆天东短歌水右

词曰

山馆翠云寒晓色新霁古木含风卷涛细川长烟渺情思啼鸿声里文翁金阙去留
无计孤鹤霜明七弦锦秘五袴清歌溢流征玻璃红凸相送紫霄凌厉凤池调舜鼎匡
明世

右调感皇恩

为胶庠师生赠高时斋节推署州代还帐词

伏以奇器奋乎风云留思征淑庶情昭于日月协美扬焯道直天机淳元未泯声芳
人纪悠邈奚涯恭惟【某官】高风周甸雅望秦川华峙英灵渭波精秀瑞岐阳之凤鸟
产自名家穷太后之龙图绍由先世桥昂碧落未当世而拟后達人桂占青云讶鸣时而
辉前继美蚤图九万簸击南溟晚慰黔黎铨荣上国明弼宸极緬寻鸟喙之芳使伴寒星
遥徙爽鳩之域庆乌巢于春树沉鬼哭于夜台刑讫于措刑清息庭前鼓吹讼服于无讼
赤违水面波涛忽吏涣胶西黄章生綠幸旌移掖北腐草回春寒谷恩光良慊自天之陨
穷檐膏泽式占时雨之私栩春梦于华胥莺花畅化悲晚来于青壤沟壑腾欢消鼠狗之
妖踪朗月清澄墟落屏豺狼之奸迹雷霆烈赫山川赤子如伤岂云青眼丹心似水莫探
玄渊洞寸照于水晶青焰炯玉荷之影涵万机于藻鉴明湖流桂魄之光贞操垂晚节霜
筠义概凜平生冰蘂宦海波而砥柱耻系商帆世道溷而日新讳言阿堵风流儒雅攸钦
璧水词宗夷易温恭悚企穷陬道范青衿挹采宛在春风白面承休坐醺醇醴雨露忘情
于桃李云霄垂意于蓬茅有代及瓜旌旆遥遥天上含情折柳称觴悚悚溪边复岁月之

几何五云高翥慨烟花之缥缈万井畴依草凝望以连青不尽矗云离恨桃无言而含紫聊将落日歌喉回首岩霏萦捧别绪断魂莺语属和遗音

词曰

邮亭沉月正杜宇送春时节淡霭连山柔风卷陌满目杨花飞雪人渡溪桥晴绿旆袅碧山辽绝无可柰借野花啼鸟留觞英烈 伤别难忘处三月弥旌惠政人人悦弦诵春长桑麻雨足方信海波恬灭何意孤城甫慰寻远三秦豪杰便指日向乌台青琐傅霖望切

右调喜迁莺

为乡耆贺戈雨溪荣膺嘉奖帐词【并引】

伏以灵凤征祥羲驭光华海岱应龙神化丰隆璫璫山川故英雄奋明圣之期幸世道际亨嘉之运恭惟【某官】燕冀休灵古今俊彦深沉令德慷慨高风逸韵禀自天陶冲气含于特秀襟怀璞玉唾嗽明珠蚤捷蜚声载耀龙光于云汉重辉接武旁昭瑞彩于虹霓钟鼎之业合羨夫家传儒雅之风争夸乎世继忽宣纶于北极式赠马于东州旌旆扬休枯槁乐阳和之候闾阎动色颠连仰怙恃之秋迩清光而岩电夺睛探幽格而松风遗响抗鸿鹄之志拟迹循良洁冰雪之操乃心民社清才实学君子攸钦纯化义风匹夫胥庆禁奸不遗于毫发馭黠果震夫豺狸仁恩与造化争流灵威共雷霆齐轨迩遐春盎政教云行海国日长乍识华胥懿景村扃夕静顿回太古醇风温温乎丰岁瑛清时可爱粲粲然荒年谷赤子所天廉班胡氏父子以天语流光勲继董生南北之乡评有在伟绩茂昭于海域芳声丕着于霜台春日生辉骤蒙嘉奖秋风播誉竟复重褒甫期年而治效垂成未半载而恩荣荐至某等揖英贤之令范已踰白头接锡命之宠光倏经青眼不胜欢跃竞笳鼓以相迎奚啻声音聊讴歌以敬寿心惭芹曝调谢宫商

词曰

霜树蜚红烟峯凝翠云齐秋晚摇落羣芳操持暮节方见篱英艳西风遥逐阳鸿征晓报到天恩重衍庆仁声薄海穷山共欣夙怀今展 琰誉播青珣名驰充空自芳传残简垂老躬逢清朝良吏无负虞汤选彩鸾枳棘飞黄庭际应是不堪狭浅行看取秉钧异宠沛霖溥演

右调永遇乐

为千户所贺杨子承千兵完戎朝奖帐词【并引】

窃以明圣神机旌淑恒先于厉世豪雄劲节临戎岂惮于捐身恭惟【某官】将军胄子闾室俊人魁梧殊标端凝令范耿青年之义概正气自天矢赤日之贞操壮心画地八阵穷劳梦寐六韬绍邃宫庭申涣号之严儿戏岂沿陋迹本知权之善父书不滞陈言表海岳之瑞灵庆风云之猛士抡精夏府开基之华典重辉镇肃遐陬褫魄之威声四达建牙吹角寂不闻諠拔剑登坛强无与敌茂瀛壖之春草曾教戎马长嘶澄淮海之沧波坐致鲸鲵永灭锦袍翻细柳康堵编氓缪带缓生花倾心儒雅佐政播霜台之誉摄屯貽

寒士之恩两简提兵跃然千里十年就炼惕尔万全际国家悠久之隆饰部伍凋残之弊推心置腹劳思自过吮含协苦分甘布惠频空储蓄貔貅争奋思兼报帅以报君葵藿纾忱诚非爱身以爱国指龙沙而御侮迴熄狼烽旋凤阙以趋劳灵成雀贺旌麾攸向绩用倏登岁月虽淹人咸恐后阅师而称耗方殷当国忧虞离次者无闻独美元戎纪律累黄金之腆赉莫称丹衷慰紫极之温纶式惊青眼玄朔遥而飞檄青海渺以腾欢琼酝充壘银汉润分恩渥天机遗锦彩云蔚映仙葩沸金鼓之喧闐畅融梅雪萃人文之炳朗喜合春阳末忝葭莩旷见乘龙异宠祗承豪彦惭无跃虎英词一阙清歌千钟醕饮聊倾肝膈不解宫商

词曰

翠岩碧海春初丽忽下彩鸾烟际玉阙布天恩凤阁褒忠义生色焕山城芳誉飞迢递总只为赤心丹陛况早遇英主明世家散万金身余一剑喜有戮力三军锐宠拟玉关封看取金章系

右调忆帝京

○表

拟上元观灯赐宴辅臣谢表

某年某月某日臣等蒙赐观灯与宴称谢者桂魄腾光薄海仰初春之象华灯焕彩九天瞻联璧之辉既醉太平何胜感荷臣等欢忭欢忭顿首顿首窃以天地交泰一元转造化之机君相协和万古庆明良之遇故贰室谦光乎唐帝而金台贤誉乎燕昭火戏骊山奚取深闺之笑酒通淇水终贻烈焰之灾南国临春永嗟沉湎西风汾水徒自悲歌乃者候运青宫大地浹阳和之气既而影盈玉阙钧天昭皎洁之晶祈太乙于初元一灯破暗演炎刘之故事几夜摇红烟云敛而明月逐人箫鼓沸而暗尘随马宫城焜耀闾巷讴歌六鳌驾海上之山乐偕百姓双凤扶云中之辇清暇万机炬烂仙台何幸微臣纵目风传天乐渥蒙御宴称觴允贤圣之高情实康平之乐事寒酸至愿今古难逢兹遇皇帝陛下德拟干元明侔离照恩泽及物炳朗烛奸畅仁风而遐迩皆春被光华而隱显毕達三冬陋巷蚤蒙分暖杏林十载短檠顿致扬辉奎阁春台谢调元之善玉烛负屯膏之愆甫奋幽微欲竭平生糟粕晋观灯火辄施不世几筵佩转彤庭眼开蓬岛香飘桂宇梦入华胥谁家对月能闲而叨与鳳城之宠何处闻灯不看而旷瞻龙烛之奇紫府星辉藜影駭翻仙界绛台风静莲光幻逸神工月阙夺睛琉璃炳莹瑶池高会龙虎优游焕■〈酉灵〉醪于霞觴明及肝肺照珍奇于玉案暖入腹心簪笏灿银缸冠纓岂遗織手綺罗飞宝镜瑛盘追笑含桃分黄柑于九霄罄白兽于一夕相遭道合期于不醉无归从事军严志在有怀必吐九重春色共翬仙桃永夜漏声晚催银箭饱饫皇仁而益足沉酣圣化以何知兢兢周诰之中泄泄尧天之下融查滓于亲炙奚啻秋阳荡邪秽于相酬岂云江汉东风吹酒旋看银海初醒凉月伴人清到玉堂不寐身归天上而常自光明梦想樽前而乃心曲蘖臣等昏昧不足以图报称潦倒曾可以効勤劳徒抱区区有怀耿耿伏愿有象太

平偕此春而永泰无疆福寿并斯月而恒盈演膏泽于幽阴焕文章于昭灼养贤以图天下用继权舆涣居以赉国中不独盘乐则圣治清明而夜户不闭民心和畅而鳧鹭可歌矣臣等无任瞻天仰圣激切屏营之至谨奉表称谢以闻

拟夏日赐扇羣臣谢表

某年某月某日蒙赐臣等以扇者湘筠破玉黄封陨自九天蜀茧浮香墨迹题当五月草茅增气闾巷生光巽命猥颁贲恩仰荷臣等惶恐惶恐顿首顿首窃以八风吹嘘匪鼓舞无以育羣品一元橐钥非凉冷罔以济至仁故廓寰宇之妖氛回飏动地而除酷炎之溽暑清商满林此吾人仰披拂而豁如因大造以呼吸而咸若也乃者日贞曜于鹑首律迁度于林钟祝融鞭赤云之龙羲和典阳乌之馭温风翕以辰至星火灿以昏中处凉台而有郁蒸之烦浴寒水而嗟烁烂之惨圣王体好生之德歌薰五弦哲人妙制器之宜来风一扇以形轧气默契玄机用上礼贤风高前古盖始为者固有莫既之惠况分布者尤为不世之恩铜柱逼人慨残酷于万古雄风适己恨夸诞于一时夜色扑画屏之萤宫闱褻用秋光致素纨之咏篋笥深藏歌彻桃花醉里不知炎灼舞残白羽闲中独翫飘扬缁尘染素于九衢清风安在束带发狂于庶府明月何归曾无苏下以轻颺岂有假人以便箠王风因之而扫地■〈火虐〉焰于是为薰天何幸微臣骤蒙珍赐百工至愿千载竒逢兹盖伏遇皇帝陛下古直德健质素性成妙开阖之天机四方风动神屈伸之物感百世扬休鉴前王摇乱之鄙心荡淑世刻薄之陋习出仙工于天上辅造化于阴初织女机丝霄汉乍流夜月石鲸鳞甲池塘蚤已秋风移寒色于潇湘散清光于巴蜀絶尘凡之竒巧如璧如轮祛穷巷之烦冤非冰非雪捧持在手感荷生心发迹寒微沾恩稠迭开緘日下黄金辉映蓬瀛回首云中仙桂香遗青紫轻凉拂罗袂何须风蹬云端溽暑散穷檐不向茅堂江麓酷吏去矣身寓青苹故人来斯神遊空谷障朱明之燥烈荫庇实多驱青蝇于暄炎肃清益至置怀袖而郑重入依孔雀徐开慎把握以无忘出为貔貅指示举动而毛发洒淅挥扬而股肱战兢臣等热中未已恒思汗出沾衣寒心方殷窃恐情乖中道伏愿严操纵之威权轻勿授人以柄善弛张之治道重惟持己以清作法于凉而罔贪守约施博而不乱推心及冷地痛惩炙手之徒示法向薄夫用戒趋炎之輩荷蒙遮蔽无为庾尘所污不异寒温莫致班诗共叹则仁风拟大块而同德余光昭汗简以不磨四海播扬万年快慰矣臣等无任瞻天仰圣激切屏营之至谨奉表称谢以闻

拟宋论翊戴功加石守信等官爵谢表【建隆元年】

某年某月某日伏蒙圣恩加赐臣等官爵者臣守信等惶惧惶惧顿首顿首窃惟乱极思治实皇天泰复之机厯数归仁正英主丰亨之运故神谟庙算克当乎天心而治定功成不由乎人力武功诚武丁之独断翊戴何论文德允文王之寡俦加封实忝曾不以能而自负普施天地之恩何敢以功而是居仰荷生成之德稽晋文于返国功高有不赏之嗟考汉祖于承家事集致当诛之祸狗兔数语竒功万古以酸心龙蛇一章伟绩千年而堕泪是皆刻薄之主顿忘勲旧之人臣等退思有愧犬马何劳进补无能蠹未报仰

自天之陨实切愚衷慰好爵之怀真逾望外兹遇皇帝陛下乾坤至德日月休明馭众以恩雨露溥施春泽临下有赫雷霆丕振秋毫德威不爽于赏刑处制允超乎今古念八姓之僭窃君弱臣强伤五代之昏庸兵烦民敝黄袍被体虽天命而众义无忘赤德开基録军功而大封不弃龙旌缥缈万国生辉凤诏光华九天流渥进有差之隆爵再焰寒灰沾并领之宠光重荣春槁辕门甲冑际风云而高入青霄汗马刀弓出涂泥而近趋丹陛人无不足耻龙泉击柱之争劳无不酬絶虎士分桃之怨各叨一命较才程力以何思悉竭寸衷沥胆披肝而图报若都挥若点检山河带砺无疆或虞候或右厢日月贞明不替云台异眷越百世而同符烟阁竒褒旷千年而合轍侍龙颜之密迹共将纾悃一朝仗虎符之灵威谁复横行四国庆明时于无事不闻剑戟扶危乐长夜于未央合听笙歌聒醉托勲名之暴着詎致沉沦际君臣之交通永无猜忌臣等终延乐土大造无可言之仁蚤沐恩波沧海乏可述之润起死人而肉白骨结莽无因忘何日而藏中心衔金未即伏愿五位昌隆太平有象一德贞固终始不移保誓命于万全君臣一体绵本支于百世上下同休舅犯无弃席之忧恩信日固叔敖息负薪之虑德惠弥深阿衡荣而商道致遠营丘永而周汉流长万古无虞九泉不朽臣等无任瞻天望圣激切感戴之至谨奉表称谢以闻

海壑吟稿卷七

●钦定四库全书

海壑吟稿卷八

（明）赵完璧 撰

○序

海若効灵序

春台君三年守胶政彻沧涯民协青壤和气蒸蒸溢于遐迩嵌崟者繁息润泽者涵育桑麻郁而风云畅谷菜熟而康乂征黄虞之治而华胥之风也父老子弟伏腊熙熙举觴相庆且复精吁苍漠其以斯民之生也治乱关于弘运休戚系于相遭残虐者流赤增波贪饕者地利惟尽我民何幸际我侯登我治耶往者天保之祝无亦感休庆而艾君以心也千古纯诚殊无乖异此为三代直道而行者也是以不能无祝愿于侯也南山之贞拟君之躬永君之躬不尽所愿也松柏之茂拟君之操承君之操不尽所愿也至情笃意殆超乎天保之外迓锡仰禧将望于君身之余也如兰之锡如麟之托昌厥后裕厥昆充厥公闾焉已矣天惟民听而克享之笃生英秀实惟戊午之始秋君子卜其知本穹昊灵其効于溟水允矣且东溟阔汇百川长为委输潏秀二仪淳漓元纲嘉珍异宝献瑞呈祥万品类育千古可考也故夫木难明月尤补竒絶盖涵于天一受于拙魄蚌之不知其获于天珠之不知其成于蚌也造化之鍾于海者无穷而珠之产于蚌者曾无老少之异蚌之珠非海之灵耶君之子不犹蚌之珠耶于穆以无心福仁者而至仁亦不知所以承天休其时其地所适所遭皆莫可臆究今君侯年几强仕宜蚤育江乡而佳气顾腾于海域宜多男子穷居而弧矢甫系于朱旛其泽及生民而后天德之乎其涵濡沧津览涛波之

吐吞沐蛟龙之烟雨渐其秀而化于灵亦得以蓄结玄妙是皆未可知也但民情所寓人言所及依理符迹吾不得而遗论也乌可不谓之海灵耶况英物鞞鞞啼声琅琅犹鸿鹄虽未羽而拂霄之势可逆覩矣幻逸天池清莹蟾彩异时光朝廷辉四海声夷貊重古今兹公之庆也民之望也海之灵所以协于天也

代赠刘氏乐寿堂序

刘氏子者风神逸爽伟然三齐俊人袭先声累业雄于珠右拓故第而新之大构霄峥川原动色且广缔四方豪彦一时儒绅率雅爱之甲子冬予将北探江春戒行在即忽有欲为留行者倥偬冰雪间切谕刘子景怀今愿窃导腾虬披珠云移旌而南光乃鼎室遗乃珠玑以垂庆于无极惴惴然将不慰草茅覬私耶予解莞唯唯用扁乐寿以赠主人揖而前敬觞为寿或曰智者乐仁者寿智仁之道亦大矣哲如颜樊犹待问焉刘氏其智仁矣乎奚扁为予曰不然人心之天不终澌泯涂珠璞玉苍澣弥光匪情而扬诬也机萌而沮弃也皆非也轲命世英儒曾不知战国风习顾以仁义争论于时可谓智乎无亦以彼昏不爱仁义而利之出乎仁义者将不爱耶故梁惠好台沼而进之圣齐宣好雪宫而推诸王齐梁不关民隐然齐圣兴王谅足悚动方寸刘君为斯堂将自娱而永焉者吾不以乐寿开之堂胡为哉况望其知仁乎吾今冀其乐而寿焉融融斯泄泄斯伏腊斯子孙斯刘君其自得矣虽不告以仁知将不绎其所以而求诸浚源植本要有余师因乐以崇知由寿以敦仁乐乐而达于君底豫而达于亲埭箴而达于兄弟琴瑟而达于妻子笙簧而达于宾友周流活泼莫非乐地罔惑于声色罔诱于货贿罔夺于威力安固永贞无戕所天乐示而智进寿启而仁弘缘此获彼鱼网鸿罹谁则知之刘君将不为明理以终乐贞守以介寿者乎况东望沧溟西顾长河鲸波潮而虬带环阳侯河伯君之适也大劳在瞻二珠伊迤青苍蔼而鸿龐基林林央央君之契也此又非乐寿出于堂之外而智仁之雅怀幽致会得于天者乎使君而淫于乐于智则昏焉已无述于寿于仁则悖焉已昏且悖其奚处于斯堂或曰博矣哉君子之言非浅夫所窥也企勉刘君其慎审于乐寿

劳山仙迹序

劳为墨阳灵峙枕沧溟而峻迴东南秀于青声于天下逸物外者咸兹乐慕逢冠挂而斯东安期老焉胥有取也世传丘刘王马輦举此仙焉信耶渺茫之故适非青眼妄耶史籍攸征殆难极诋嵇生之论存乎养久而仙或由兹也长春诸翁见超寰宇越嵌崱履奇峭奚啻千亿祗惟劳焉依依无谓耶海岳之吐吞云物之舒卷冥化之往来必有奇趣入乎其心而契焉而陶焉者虚牝抱元精鍊致极而还虚破造要所必至盖亦自不知其乔松之趋也混古今于天地弄风月于川岑神游意适罔非豫所寸灵之秘泄于英词悟尘之几托于幽石霞栖雪殄紫封碧荫鸟窥而樵游焉耳咏我思者谁欤嘉靖甲子载值君阳汤公尹墨宓弦之暇慰适宦况劳无余区寻幽兴怀抚迹增慨虚玄茫昧者空复梦思而垂悠寄遠者宛在贞坚犹可彷彿诵剞翳扫烟靡隱弗底获诗词古体五十余篇玄珠之庆良慊夙私窃惟海内之嶙峋层见奇迹恒渺乃有高林石之兴而欲一骋歷览之怀

率皆滞于时牵于势尘拘艰解悼种种予毛卒未之酬者指可胜屈耶虽予亦密迹海涯纒百里耳覩嶠峭于目前聆胜絶于夙昔寸心如飞犹越万里攀跻之志恒切而仍岁无谐况其远者乎君阳公以其迹诸劳者移诸梓邈歷迨兹旷逢懿举俾无蹉珠玉儵徧中原胜征而情慰无劳而可劳间有微辞奥旨妙悟神会者得无乐际矣乎君阳之于道玄关幽键仰不可窥即仙迹攸崇无乃慕之笃養之深臭味之相入赏音于善歌者欤于野之利何其博哉矧莅墨以来轩黄之化而旌阳之政迹之寓乎墨者皆以铭诸心不但寓乎劳者存诸石焉耳噫演劳迹者君阳也昭墨迹者玉堂在今银笔在后不知其当为谁也尘埃鄙人雕龙匪技詎敢为诸仙序聊复对君阳之命述其畧兼章君阳之美意云

赠储少梅将军抡典戎政序

胶为辽右穷壤南北界莱灵二戍间彻三百余里沧溟浩望旷然潮汐之区倭夷伺逞靡常抚图筹衅者乃不顾兹陬凜森耶沿浹连兵以胶冲雄镇崇墉以昭岩驻戎以张威选将厉才倡勇明政用宣圣武遐荒也始敦任七侯率由殊简二百年中继美扬声海上者今莫仰矣储氏少梅将军将门英胄涵淹儒术毅然刚介中有雍容文雅之懿艺精力强才优识朗古名将风烈衔命以来文武属心殆以安危轻重系将军也嘉靖辛酉春侍史檄执戎政遴选慎名实核协人望哉少梅将军震惶罔自胜感一饭于思酬惭世禄于未补顾不幡然悟奋然兴惕然求免厥艰耶中外熙熙印首维新令而风霆威而霜雪介而金石操而冰檠樽俎可以折冲帷幄可以御侮虎豹雄踞长城逶迤鲸鲵之波其几息矣乎蛇豕之毒其或靖矣乎弦诵兴耕耘无事太平之乐乃不赖将军以有终矣乎冠裳相庆且从而祝之难副惟声难克惟终细或不矜其罔有不倾将于上下负匪浅也尚自厉焉拊髀惟时筑拜有期垂黄秉钺万里之封岂直区区一隅之显已哉谨日夕以仰

代姜省吾侍御送刘春台太守考绩序

岁辛酉摇光树虚危寒飈凜如玉尘炯炯春台侯敝车羸马遄征之色溢于道亭庶黎超骇莫慰攀延熙洽中不知崇年効绩檄速稽核将以旌淑德昭陟典也猝夺吾良奈若何省吾子荣其行君子也几何人哉圣皇三五绍麻渴笃世英四纪相寻以跻嘉靖之治无他考核鼓舞尔也侯六载溟陬一贞永矢虽有横陈漠然也杨称四知弗来胡畏刘纒一选弗赠胡辞侯曾未闻来且赠也殆齋渊方寸波澜寂絶要难以漫窥焉者无荡天机庶理息至公斯也明斯也威而断斯也本植而绩庶凝焉孤魄停瀛清飙逸岱夫或得而御且揜诸兹不稽焉攸劝今天下籍名宠以骋尽锱铢而利实有蓬心蠹乃纪经胡能侯拟继侯而后皆侯耶匪侯耶种种予怀无或援焉若帝臣罔蔽万里有明宠眷茂殊寄任出入以德诸郡者德诸天下此又人心无既之覬也省吾子葢葢南山之庐松楸外不狎尘机侯行念兹揆有言任媿无言征制于时泥于迹即不能以侯图报尚宣言台垣庸罄忠赤行将采焉以闻慰夙私也姑以虚江公甫来奇侯之器不遑悉侯之泽乐闻而诵之趣张水石婣媛增楚金石震而玉觴醕旂旂扬而五云茫骊驹不忍闻执予言以赠

海屋添筹序寿年家杨叅峯太翁

添筹事邈不可知然造化之运甲子循环其或司冥纪者理亦有之近恒摹绘竒迹以相赠遗无亦援仙灵以拟长年非斯人之至情已乎此其图者何寿洛之杨昆翁也其寿杨昆翁者何敦年家懿也吾郎慎修胶致乙丑春第适与贤嗣同之叅峯君为昆冈片玉洛才俊逸也视海山牧豸奚啻倍蓰实窃蝇附及分令盐渎而又同家淮阴洽情楚水且几三褫郎尝拜昆翁淮邸而衰质亦曾幸挹叅峯通家之契良亦深矣戊辰春旅覲燕都王事竟叅峯君怵然记翁当七袞稀古春秋喜溢颜色将汲汲便经故洛以觴初度郎闻而嘉之欲偕往不果遥致已心许焉归而语诸庭余曰诺佳哉是不可无庆庆以神祉吾海人室庐潮汐间仙迹茫茫习闻已久虽不躬覩其异古史籍亮不厚诬添筹海屋兹用图焉今复指三山之庵藹睇十洲于微茫银台金阙所寓紫鸾黄鹤所归海之屋殆可究可言筹之添亦何终何始水浅蓬莱尘扬灏渤笼鸟之辰云谁数计而太虚浩劫要难纪极岁易筹偕人依化运昆山翁其将优游穹壤而不自知其寿拟玄昊也雪刺方瞳乌纱玉杖餐霞咀芝云卧天游悠然伊洛中奚俟玄圃瑶池耶况桂林郁郁兰茁森森而贤嗣叅峯飞鳧之履甫过金门旌扬之声上達天阙行复大擢玉堂调鼎鼎以寿皇图则黄虞斯世真不负所以义涵也龙章凤采紫诰重褒自天之泽如海斯深此又添筹外无涯之福筹亦所不能尽算焉者矣小子乞予言以信友笃敬也叅峯事君不忘其亲崇孝也昆山翁茂无疆之寿征仁也敬则善交孝则不匮仁则与天地万物为一体宏裕而可亲焉者也余于翁神交久矣况今蠢延亦已六十有九晚龄同跻喜闻而乐诵之欲同庆华堂仙云缥渺莫慰逖忱忝同盟之好假仙筹以献同天之祝云

代慎修送温玉斋三尹荣擢鲁藩司宝序

余素耽清旷家世海山狎于心目出必登临舒写入则园林沼榭会心自娱同志者盖寡焉乙丑夏谬领盐寄违猿鹤而南勉莅陬僻日夕尘劳颓乎俗吏回首云阿梦寐渺然乃有少尹温玉翁者风流酝藉旷古高人雍容官署中峻结幽轩小筑亭台佳木葱郁琴鹤萧然偷闲机务而山林余事随其所适盖超然不累于喧嚣之烦而洒然特逸于簪绂之外也余然后知其为仕而隱焉者况乃坚持凜凜不为苟污岂特居处之清而高节更自嶄然可谓心迹兼得其养而孤竒尘表寡俦也余每喜其烟霞幽趣宛在咫尺簿书之暇假之游衍资之谑讪相与上下数千载间古之是非得失以及今之贤不肖可否飞屑飒飒如烛斯照蔡斯卜也吁有是哉翁之可嘉乐也其裨于拙薄良不浅矣究极师友渊源翁汝人毓汝秀而迹南阳山川之灵其亦有得伏龙凤雏之遗风者不然胡高雅乃尔窃庆方殷忽有东藩之擢圣天子笃金玉之亲重凤鸾之辅去盐就鲁亲亲贤贤之义兼得之矣但江海之留思未艾鸿鴈之兴怀无已也翁行矣鲁周公旧国宣尼所生礼乐遗风千古不终澌泯翁览龟蒙洙泗之胜抚浴沂风咏之迹回琴点瑟人遠而真乐犹有可寻翁臭味惟同慨慕依稀磨之岁月当必有进于平生者翁慎厥司钦厥宝增辉沧岱以迓天休此其常业耳恪职之外更以宝之胸中者为国华焉则辉光日新清越以长纲常植彝伦昭主德敦教化隆亦几乎变而至道矣鲁将不遗其所常宝者而宝翁耶况懿

德之好有生恒性窃恐鲁不私其宝而扬于帝庭以为天下共宝之是又所日望而惓惓者翁其无自高以弃天下

赠景节推重均胶役序

斯民慕三代之风而千古无忘者何哉孟子曰三代之得天下以仁仁也者亦惟得其民心焉耳夫民情不一物理自然夫孰得而遂之乎是以传大学者谓君子有絜矩之道亦莫非王道支流三代遗意也然明王图治惟艰曾不以得人为要务乎哉肆我今上法祖弘恩求贤如渴亲民宣化尤莫急于守令龚黄卓鲁期其人三代之治覬其盛也且令非也而守正之守失也而府抑之此又设官之美意而行仁之令典也吾胶僻在海涯尤为弊郡土瘠民贫役繁赋重号称难治久矣虽有循良之政犹不能速効于更生况舞文弄法者之相仍而奸伪萌生耶民焉攸赖国家例以三载一均民役隆庆庚午冬适当其期亨庵守以覲事匆匆未暇竟妥东方嗷嗷哀鸿之声溢于海隅抚台忧之思得风裁夙著者一为抚绥而我公当时已蚤为默卜矣公适以贺岁闻命戴星而东祗惟负托是惧入胶来恤弊悲穷补偏剔蠹恤疮痍如己子慰寒酸犹故知好所好恶所恶一徇民便而罔叅己私真犹父母之爱其子也无矜容无厉色春风和气中人未尝不畏刑威痛惩下人未尝不服斟酌得调停之善而会计无锱铢之差上不滞惠泽于当道下不致隅泣于穷檐一时膏雨宛苏海壖白首絶荒自谓终于颓风已也何意骤覩善人之治旷瞻三代之泽不犹醉而醒瘖而鸣仆而起耶公青年甲第夤然燕云隼才小试鲁郡天假惠临初挹其辉采侍其珠唾已识其逸絶风尘矣况复躬蒙德教而举措闲雅规度弘裕逆占所就更当何如噫宰肉细事也且以征相今此休休之心优优之政章章人之心目时复金瓯之卜舍公其谁士类欢慕之余挽之固不可留望之又不忍去聊托衰残以相赠诵然东野之鄙言谅不足为鸿笔齿草次掄扬一以为君子美一以为俗吏风焉

张平山画册序

张平山者大梁祥符张路也字天驰初号茅蹊子先大夫正德辛未间判开封予因识之时张游府庠计其年可三十前也体质短小器识温雅胸次洒有奇趣不多饮酒赋诗鸣琴志役物外而其笔造之妙初无所受人天畀之巧虽心手亦不可得而知一落颖靡不骇讶时誉藉然每留连于豪商大贾妖艳珍奇羈縻百种以是士大夫慰其意者盖寡矣而窘焉者恒有难色先大夫畧常格曲意招之张感焉及晤谈契合遂倾意相将而交好日敦始爱予卯总知琴曾作高兴图为忘年赠其相与之情伯仲中于予尤笃也灯宵手语时复连床抵今有恻乘兴挥洒甚多曾覩有象簪刻张路字尽妙处即识之仓卒之图多而不暇且漫然有待遂因循终致不果丙子秋先大夫有武昌之命分袂来迥不相闻后访其贡之太学珍于公卿名动京师先不知更号何年而天下莫不脍称张平山也有得片纸尺素之遗者宝藏珍爱琬琰木难无以易之皆不知吾家之所蓄者多且久焉爱虽锤于平日名复重于末年其进于后来者竟无一获是为怅尔虽然但要其得意处虽少年犹老笔尝闻昔之诗人有年未壮而风格亦已夙成者卓识异才岂论蚤暮

张之笔妙殆亦无声诗也何老少云良亦足珍迨今五十余年散之昆季而独存者无几张曾谓蓄画莫如作册吾因而役志焉兹用永之以方付慎修慎秘以藏值嘉靖乙丑举进士出宰盐城余亦当陇西归暇从容借游携取以资翫弄适覩温栗翁三尹汝人也得平山之履歷甚悉始知寿以云殂也深为悼悵将追刻平山小印于诸所遗皆为补识庶不混真以衍厥声又欲各勉题咏哀思之余以终朋好之谊且恐才不逮志词不能摹先生之精也夫姑曲为叙述以章诸首云

贺张恂翁七袞序

古今人恒多慕仙其慕仙者何谓长生也旷逸尘表也神变化于莫测意萌而罔不慰也其孰能破造化外五行与天地并日月侔哉借有劳心苦形如鑽盘阅壁负井揖枯精炼致极而至于吹笙跨鹤鸣箫乘风驾赤鲤于清波驱彩輿于碧落以相羊乎两间者要皆理之所不可知也蛊惑之深虽帝王亦不能自己荒哉燕昭周穆秦皇汉武之为心也张翁寓于稠人之中而特异乎寻常之外产古即墨去邹鲁甚近陶然醉孔孟之风于数千载之下纯乎其中而朴乎其外共德在家谦光在乡庭教孜孜笃求善类以为师友之资乃尔贤嗣文伯秋云効捷赫然扬海岱之光行复登瀛选膺台宠为时霖雨舟楫不贤而致是乎若夫役志茫以自沉溺于怪神诞妄皆所弗屑也然德本诸身静而恒焉不期其寿自尔永年出入烟霞优游山海阅世故于虚舟抚日月于笼鸟忽不知其瞳尔绀背尔鲐发尔种种矣邈乎寿之不可及已然尝冠切云于暇日拽灵寿于清风褒衣芝馥阔带兰馨酣春醪而讴商山萧然太劳峯下为帝悬解安期之俦欤偃佺之俦欤昆仑蓬岛奚以踰兹芝颜玉彩快覩斯人其于生翰白日而清虚莫可仿佛者何如耶桂嗣兰孙绳绳森立其于名存仙籍而苗裔莫可究极者何如耶况帝赉之荣莫逆其后天锡之龄未究其终翁之仙于人间而出乎天仙之上者盖几许矣福祉非常墨云胥庆胶之缙绅能无景德而希光已乎且托予言以赠顾拙薄弗克诵读祇惟吾郎慎修尝内交文伯旧有通家之雅乃勉于扬摧陈辞为诸公代寿

赠镜湖王司巡三载考绩序

夫观政者闻其誉不若覩其人覩其人不若核其绩绩征而慰覩焉宜其誉之不混也镜湖子淮阳美士楚藩淑僚擢巡逢猛司铎者拔英扬俊遥托荒陬谓其雄镇要害而分寄山海也方其扬旌而来励精应物雍雍楚楚温然连城之辉毅然百炼之彩人咸谓兹贞良之质也予闻之可哉容未必然既而士相与礼爱之无尤焉民相与敬畏之无厌焉有司悉从而付托之无惑焉人咸谓兹才能吏也予闻之可哉誉未必然洋洋藉藉殆拟芳秋兰比翼翔鸿矣君子要不得而尽信也某衰谢岩壑瞥然尘务冠裳车马邈不相及吾于镜湖子饥渴有情云覩未繇空复劳止乙丑春适泥书在庭填门有庆镜湖子牵羊负彩以临挹其光冲如也聆其音秩如也把袂惓惓好尔忘倦吁嗟人言其不谬哉及察胶南旷数百里灵鳌之冲而青徐之走集也变乱无常恒为当道忧乃者防御有方馘俘屡効东南僻域殆坐靖耳曾不闻夷窥于溟寇恣于野也且催科有道不妨公不病民

寸衷无累而匹夫不怨得人若此亦难矣哉期当考绩而去人咸思慕之君其勉诸方今用贤无方超陟不次君之晋未可指数切无懈清操弛壮图乖古道负明时以自隳嘉誉而颓伟绩也戒行晚秋庶情悒悒追而送之云之涯酌我醴竭我忱临风以赠君胡来东山孔怀君胡去五云维翥君之心惟石与金矢彼石金君子攸钦

送楼念竹太守入覲序

古诸侯朝礼孔子列之九经以启鲁哀孟轲氏本之述职以悟齐宣振王纲以垂后法厥意岂其微哉我圣祖开基抚有华夏酌古准今制为三载一入覲天下有司莫不应期以从事是举也立法之精又有超乎前代者寓焉考核由兹也旌别由兹也黜陟由兹也劝惩由兹也玉帛之萃有以光神禹之隆英俊之辑足以协虞庭之美乃不盛欤况今圣主虚己好贤孳孳图治往年躬宣睿旨以劳远臣宴赐之荣恩礼之笃怀忠良而有激者孰不精乃心竭乃力効乃职耶是使天下罔不臣政罔不举民罔不顺且治也熙洽之世何幸躬逢万厯丁丑春又当其期我胶侯念翁将行胶人始仰而乐其进御宸极又不忍暂睽而忘情于翁也翁胡为乎来哉翁江山瑞灵簪裳淑裔早登甲第而首试以推鞠西江强御不畏摧抑权奸者法无少贷听断惟明平反暧昧者众罔不服劲节高风悚动上下维时内诏殷懃秋曹暂署朝埜方庆其弼教得人天下可以无冤民也何间乃萋菲生焉济水别驾以行其亦黯而淮阳舒而江都焉者其谁不为之愤惋耶公忠勤自若漠然无动鞅掌尘埃中声闻蔼然当道以胶难其人遴拟我翁而疏迁之御命东下海人其更生时也五马萧萧朱旛郁郁蓬瀛生色草木增辉不半载而田埜辟余粮栖亩也人民治华胥易境也讼狱均雀鼠相安也盗贼息犬吠不惊也较艺奎垣朱衣不违于青夜平徭穷壤苍生溥被于春阳篱落莺花山城弦诵豺狼屏迹鸿鴈无哀依稀太古之风儻以挽也吁嗟乎昔何时也今何时也而何其来之暮耶且今之慕古者以邻境言之不过曰渤之龚遂密之卓茂伯起之介洁盖公之清静芳名虽茂而实惠渐泯语之人人亦罔焉耳乃者循名核实交相副焉青眼康义间当汉之循良者其谁欤翁之过于古人不其远乎方今明通万里简在无私斯行也甫迹天颜则晋接殊隆超踰非次腾翥当其时而久于胶不克终留也仁人之失可不为深虑乎迂叟沐岐阳之泽藏之乃心徒将不朽耳适辱诸缙绅以言征窃媿颓龄昏耄谢颖楮久矣上无以悉众善下无以尽羣情聊述鄙怀以僭达诸道左且祝之曰其人如玉挹公之光兮其德如春值古之良兮天子维明兮式谷之彰兮海人有怀兮亟矫首于帝乡兮

海壑吟稿卷八

●钦定四库全书

海壑吟稿卷九

（明）赵完璧 撰

高八姐传

高八姐者胶东鸿胪南泉翁季媛早孤鞠于匡慈匡出宪长公淑源有自孀闺风节

蒸以性成古列史种种默识温然良璞在韞也及适密也砺山进士之仲子管二元者闾仪雅慰堂室戒二元缉学励行光休维奕及二元游虎闾省鄢陵而东值余痾未殄严霁野飙长征遄劳黧然颓然几不获税驾故密八姐一睇震惶神爽飞越即趣赴胶幸图饵砭卢扁察而谢焉八姐审不可为飞悉宦所阿姑星戴以还二元剧且慰薄请金遗别八姐不忍连泣懷之无何罄珥饰暨二元堂授备以札归姑前一号投顿弥日乃蘓诸莫谖故二元寻就舍八姐掩罔知潜自密经众亟索释之二元少苏闻故求阅嗟痛久之遂幽约会合越日弃客八姐自二元报革即不甘食至是惫馁弥甚伺间三死未果五日哭不辍泣尽音竭待毙而已或以寡姊之生例解焉乃懊愤曰吾方寸事已定为常识拂扰怜我者媿我深矣天云坠不徒作未亡人若阿姊抚有襁孤用延绪绪是可无死管无遗育其谁与图存荀氏之缓己为下策为身防者吾衷且叵窥焉遂絶水饮僵卧不起凡六日母姑泣劝直一沾漱即吐曰起若儿吾可食矣五内蒸灼舌燥以槁齿渐以脱骨立容毁母怜之曲为调摄觐少延焉八姐曠谓逆已儿以死慰以生忌也匪石之心徒尔劳益我苦耳再逾日厥息寢微畅然曰今果贞初志媿贰懷也一节有终从容为诸骨肉诀无憾矣乃歿时嘉靖辛酉闰五月之廿一日越二元之殂其浹辰也八姐以廿一盞合甫三褫萃涣靡常恩爱几何管之宦裕可以温饱高之雄宗科名儒俊可以终赖矧古今夺志之权抑亦不渺八姐冲年弱质乃能精识茂见就死不易青女炎乌超氛埃而特烈美丈夫弗迨也英皇之死有商均焉死而过也叔姬存纪无裔绪焉过而生也徇义蔑生邈焉其罕媿矣夫海壑子栖遑溟曲厌衰颓久矣骇闻而槩纪之用彰圣化表坚贞励靡风也异时备良史薄采

张老传

张老者不知山左何许人亦不悉其名字但东人率以老张称之性敦朴鄙嗇鲜以贿交人多与其厚而贱其吝也适有恶少徃访之坚拒不应索之亟力拉于庭瞬息格杀而出至门惊惶莫措踟蹰而言曰我将焉徃触其门者再俄亦仆毙少焉张渐苏以生恶少竟以死矣候徼特声恶少之死絶不允张先见杀恶少因以自残也聽者卒以相殴鞫煅抵死虽屡録未决其谁能轻脱之噫始以无故之死而人自偿我继以不死之故而我顾偿人冤哉虽然恶少之死其究也贪而忿无足罪者张之死而生生而死得非蓄崇其身嗇囿其累耶

蠨蛸传

蠨蛸构罗牖侧大纒若杯局狭而缕微仅以困蠨蠓蚊蚋即为巨充曷敢横异图哉伏匿罗际用需来者会有飞蝇卒悞触之窘鸣间蠨蛸震慰望表速前以承天陨既而所以为具与力寻集私揆忽复却目伺之罔措中殆幸以一获蝇鼓翼奋跃极力蹙踏小罗旋空而脱蠨蛸亦随荡越相失海壑子喟喟叹曰微质也本不足以制宏幸覬也竟顾以灭家小而谋大曷可不程懵以幸免者其戒诸

古妆镜记

先大夫收春翁博洽好古正德间宦游开封曾购获一古妆镜背银鰲而寢玄朱翠斑驳铭字宛然余窃爱慕先大夫因以畀之余敬承良用珠椽未暇考究嘉靖乙酉之十月曝日短檐漫阅菊坡丛话适有宋景德间军人杨起于凤州遁赤山郭家崖下洞穴中入见有石镜台一座镜圆五寸背铸水族回环有三十二字云炼形神冶莹质良工当眉写翠对脸傅红如珠出匣似月停空绮窓绣幌俱涵影中方取镜闻后有风雨声既出洞则镜存而匣烂矣详是妆镜不知何代文义甚佳惜不见于文集而独见于郡志故传録之以补歎识之一云注出学斋占毕也阅既掩而叹曰有是哉相遇之奇也其所述规迹文字相质无舛但中二聯与镜文差越前后想亦当时纪录误耳及再考博古图形制有大小之异文字有多寡之殊皆云自汉不可证据大抵世久传悞诚难得真即今存者是则庶可以征诸传非也谓为汉制亦宜噫器物之在天地间如金石类者歷古今遭常变寓隱显如絮流风如萍涣水恶知其有定在耶要不可以意图而力致乃者传之古汴者越千里而归于吾室藏之先人者于诸昆而遗之不肖况入洞以前杨起以后歷年几世传经几手虽纪于学斋时亦不识此镜攸寓纂于菊翁时亦徒慕此镜芳声耳今宛在兹物虽微理数存焉不亦良可幸矣乎乙丑秋慎修儿举进士出令盐渎以便省归余会倦于家政悉付诸郎而是镜特授之慎修以方民社攸归观人观己之间足为明法厥意滋深岂徒傅红写翠已哉其绎之其世守之海壑翁识

书诸子侄自社引

我列祖诸丘垄皆在南山下去城百里时祀维艰自先大夫欲迁之不果而逝以是先大夫卜葬城南之二里许诸兄弟相继而亡序昭从之子孙之拜扫者始便于时又趋赴各异萃合无常情虽同而礼不一甚非所以睦下而事上也隆庆辛未冬会慎修儿以兵曹郎送妇丧归懷慎侄相与议其事以质于余适符吾志因可其言遂集诸子侄世恩堂而教之曰奉先惟孝不以礼非孝也孔子曰生事之以礼死葬之以礼祭之以礼吾于尔生事葬祭无容喙矣而祭祀之仪得无谕焉已乎构祠未竟况晦翁家礼已有成式亦将待时举行姑以坟祀论之昔我尼甫亦不以为非春秋已为埜祭而东汉初遂成俗焉继今不可不遵古奉先以立吾家之准也月为三会会有常品因人以序齿无越酌家以出资有差掌握一人每岁时致祀预委一二幼而才者置之于吾父为尊祖之义特一具虽丰而不为奢于尔等亲为追慕之均虽杀而亦必成礼礼竟而合享之着为定式似于逝者粗有常制而生者又不可无常训焉每会毕除宦游者不遑考问官守徐图寄勉其余士农商贾必询其课某业作某田居行某货学业进而家道亨及安常生理者则诱掖之诵美之其有颓惰不才骄横非礼者劝戒之再三不率将必痛惩之期尔善斯安矣倘终不悛恐非吾门子弟也然又或别有处焉是会也遵行无怠孝思可谓有永而义训不为无方泉台慰血食之休子弟乐中才之养淑厥家而风厥俗不亦善乎噫吾兄弟五人长兄南泉享年四十有一遗孟焕次兄春泉享年七十有五遗之藺之苏之范之蔡之琴四弟介泉享年五十有一遗懷慎懷贞怀礼懷明懷遠五弟垂璧享年四十有二遗懷中

予今年七十有二子三人慎修慎几慎动俱已成立但吾之内外同胞零落已尽而龙钟衰老颓然独存幸年龄之过望顾骨肉之不相及可胜悼哉所冀吾儿当喜惧之年宜爱日以承欢诸子向无夭之期敦犹父以悲庆趋耄之论恐不足以悚清狂然垂老之年亦或可以繫骨肉也其恪循之尚期不替

代撰明威将军匡公墓志铭

隆庆庚午夏五月十九日诏进阶明威将军署指挥僉事匡公卒越年冬余将还任京师其孤受爵衰经踵门捧同年公弟兵科给事匡君松野所状行实勾余志铭余不忍辞按状公讳天伦伯仁字北田号也仰迥遥宗故鲁匡卜勾须后初寓海州及七世祖以兵徙赣榆之赤涧里祖福者值元末之乱志奋廓清却伪吴元帅之授归翊我太祖高皇帝茂树奇绩累封东莱副千户子德移镇胶州寻以功擢正秩遂世守兹郡德生济济生英英生勲勲生允中弗嗣允道以次弟承之实生公焉公赋性颖异器度豁如敬修厥职忠勇之略不忝先世叅涉书史古儒将风烈也屯田海上利裕军需提旅京师勤劳屡效分甘恤苦士卒乐附佻佻有礼以遇乡人敦睦宗族惠爱优渥其有负誉自暴者则务规于善尝歴图先像纂制谱牒奕世英风宛然在目岂徒光美前烈而照激后昆之意殊为深切悯伯父之女于孤贫虽及其嗣而弗怠全伯母之侄于荒歉终始调恤恒情所难普济于无私垂恩于罔报仁人君子之心推而无所不至者殆不可以缕数也公生于正德丁卯九月初一日距奄弃之期享年六十有四配吴氏赠宜人继李氏封宜人男三人长受爵正千户三荐武闈一占乡解总戎即墨赫然有声时亦有上之帝廷者竚膺异宠次受业补弟子员次受诰尚幼女二长适本所正千户汪士弘次适士人高一夔孙五人曰持曰极甫成童进学未艾曰扬曰择曰拱尚幼孙女八长适本州士人纪国瑞次适国子生郭景完次聘庠生刘汉嗣宋一魁次聘千户应袭刘肇基次聘杨时春余幼在室辛未冬十一月二十有六日甲申墓于州之郊南高卓山铭曰

桓桓神武辉昭厥祖仁勇性生帝臣维虎维世之英维国之桢于朝有纪于乡有评长眠南亩佳城不朽大树萧萧攸欽弥久巛如相望白云渺茫海山休逸万古无疆

高丽砚铭

英英紫玉渺渺沧波贞归华夏契结贤科龙光香霭泽润江河登瀛奇选百战良多补天高节五色靡过水旌厥信无胥缁磨

宣和砚铭

真确懿质渐磨惟良文林奇品世寶弥光来自宣和其获也有陨究自御用其归也靡常

又砚铭

贞而固也不磷温而润也近仁依之朝夕翰墨崇勲磨之岁月辉光日新允斯文之良友其子孙之世珍也夫

收春先大夫暨先母恭人高氏行状

先君讳从龙子云其字收春其别号也世家胶西生而颖异有奇识乡人奇之以为先大父未扬之报先大父讳本字宗源绩学种德纯雅君子弘治间有司贡礼曹辄厌奔趋归颺天和因授先君以易学先君甫弱冠义理精深文词俊逸金陵沈公锺督学海上一试大奇之极加题品才识迥超尘俗禀赋优出伦侪殆凤毛出色者也取冠胶庠先叔亦列上第兄弟一日隱然名动齐鲁先大父一喜而殒沈为之震悼命有司礼葬东人恒为美谈我先君居丧哀毁弗胜哭尝呕血葬之日先是祖莹去胶南百里先君狭之迤南百余步别创新域沙水特秀遂改迁我高祖以我先大父合叙于穆北迁之举虽有志焉未敢卒议至弘治戊午先君领乡荐凡五谒南宫不遇辛未以太母夫人就衰乃即铨曹简判开封水任是寄先君阻絕奸贪大革弊政行所无事水政修焉始塞荆隆再完铜瓦继而罗卜张口之患寻已焉凡三大工皆前哲歷岁所难而先君以初仕次第就绪且复堤防疏导民安而运利数十年间皆先君子之力也专职之外且多造官舫以便度广修廨署以便公慨包老之祠岁久卑隳一新焕美神妥而人安之断狱则公无私托法无冤民虽异境疑狱莫不恳请当道以趋速理凶顽无知释讎息忿皆弃利敦德有藏我先君之主而报祀者弥久不衰也正德壬申大河南北流贼猖獗当道殷忧乃于先君倚任不貳兵马大政一时偕归早夜忧遑用图报称大购骏马广募骁雄旬日之间军声大振且调遣有方输饷不匮是用剿絕鲸鲵以济平定之功又尝行寓属邑贼势突至方经残破城无完堵先君通夕率理达旦俱兴居民赖全河北渠魁裴昆者诸帅攻之久而不下我先君外张兵以窘其势内遣使以誓其衷不血一刃元凶授首河非以宁抚臣邓公璋歷试诸勋既偕众以聯扬复特章而超荐其畧曰转输効劳督调有策才力既贍勤苦亦多而中丞刘公承华御史陆公鳌李公元皆以贤能交荐六年之间凡五疏焉丙子春擢武昌士林歌颂以华其行曰导水疏壅曰作舟利涉曰平分冤狱曰增垒御防曰募勇得人曰智获渠魁曰转输効劳曰督调纾策今犹未泯也度江而南当道嘉其廉能吏民懷其威德三月之间声动江汉丁丑春先以不狎媚悅中伤萋菲拂衣而东士民嗟泣上下挽不可留侍御王公度有舍斯人其孰与理之叹行之日方舟琴书殊无长物来归海上萧然洒然黄犊在亩青衿在塾偕三五同志高年酣觴赋诗陶写林壑以终天年尝喜咏未老得闲真是闲及回看官爵是泥沙之句谓古人良不我诬也隱念宗族之流离贫困者招辑而慰悅之老弱有养壮者有给一身荫庇靡所不至蓋恒以祖宗为心平仲文正为法也尝置一宅第故主悲愴不能舍去辄留之不令遽徙抚諭之久仍益金帛以悅其意有扬州士人自东海来者病疮穷途垂死萧寺矜恤生全輿马遣归南北美之嘉靖乙酉东方大疫叔父分训潞庠子病于家不至殒絕者特一息耳先君日夜悯抚哀禱之曰我先君育我两人吾子有五而弟惟兹一焉吾老矣复何为愿以身代以永弟传以慰先人于地下乡人叹服叔父之子寻愈是秋先君亦渐不豫遂卧疴不支鬼神之理虽不可知而先君之疾会逢其适呜呼痛哉先君知不可为言念先大父夙爱万无一酬泣下交頤頤诸儿曰某初欲构甲第建先祠修古蒸尝以报先德传之子孙再欲恪卜佳城移请

先骸哀畴昔之薄莖易今日之美完弃遐就迹以时祀扫实抱区区也更将妥老母于幽宫尽人子之终事岂意垂白者尔康而我顾先零也惟此春秋窀穸之事两无一得送死莫大之故竟莫能及皇天有终此恨不朽兹不有俟诸尔曹焉矣乎呜呼呜呼夫复何言越明年五月二日子时忽谓吾母曰适有人衣我仙衣指示之曰是何鲜美也停午卒于正寝先君体干秀伟丰神英爽天性仁孝才识通敏理义充然襟度豁如慷慨有古人风而康济之志老而不倦博通书史多识物理文章雅健诗律清古善楷书行草图画其骑射百工技艺之事亦莫不谙晓好音律而不暇于琴命子学之以适古懷不多饮酒常爱醺然谈论有章声音朗彻衣裳有度进退可仪笃爱宾友情如同胞四方知名之士罔不悦契接物则务谦退奉身则欲留有余勤以持躬俭以垂训不喜逢迎鄙视齷齪制行之美每为乡人取则耿介之标絕非尘俗可班也生于成化己丑十二月四日戌时距终之期享年五十有八仕至奉政大夫嘉靖戊子冬权厝介城之北俟先母别议改葬先母姓高氏胶西处士浩之女也维性贞慧维质淑雅勤以奉我先大父母慎以侍我先大夫先大父早卒先大母孀居严肃我先母朝夕温慰委曲周旋未食不敢先未卧不敢休恒恐炎凉之不摄于时而瞻养之不适其宜也凡我先子所不能躬致者举一身悉之而不遗或谓母曰太夫人早尝苦汝留怨乎母曰夫苦我者乃以进妇德以劳阿母罪也今复以怠敬尤罪也吾不图家世学礼可以慰亲乎甚非所以垂训表风也日慎一日四十余年终始惟一大母临终之日亦以贤妇归之从我先君蓬茅中灯火辛劳久而不倦十余年相取乡第二十年从仕梁楚报国恤民之心未尝无助早见之明处制之宜坚贞之操洁素之行先子每有取焉淑子女以礼义贞诸妇以典法勤俭有恒虔恭茂着家声有赫于乡邦懿德不忝于前烈也嘉靖丙午秋儿完璧应省试白璧较庠首母戒曰各勉旃以绍汝先志以慰我余龄各勉旃既而门下有膺荐者吾兄弟俱未捷母嗟儿之不利而悼己之益衰因不悻宿疾增剧凡六越月而逝生于成化己丑三月之八日寅时卒于嘉靖丁未三月九日戌时享年七十有九制封宜人人生子四长良璧读书未仕先我母卒娶萧氏继娶崔氏孙男一孟焕女孙一适雅士杨宪次廷璧无为州同知娶李氏生孙男一之藺次完璧国子生娶高氏生孙男三慎修慎几慎动女孙二长适千户杨世芳次适尚寶司丞毛照次白璧庠生娶栾氏生孙男二懷慎懷贞女孙一生女二长适高密仪宸国子生次适安丘黄祯吏部文选郎侧室姜氏生子一垂璧女一适诸城庠生张西铭今将迁先君柩合先母葬于城南完璧不敏不能详悉先行草述槩略以俟采风者志之

故乡进士直隶和州知州进阶奉直大夫行斋毛公行状

公讳盘字世用别号行斋世居东莱掖邑之东里高祖考讳伯全曾祖考讳福英祖考讳敏由乡贡士任杭州府学教授俱赠光禄大夫柱国少保兼太子太保戸部尚书武英殿大学士考讳纪号砺庵晚号海翁早擢省元举进士累官光禄大夫柱国少保兼太子太保吏部尚书谨身殿大学士致仕赠太保谥文简高祖妣丁氏曾祖妣王氏祖妣赵氏刘氏俱赠一品夫人妣官氏累封一品夫人兄棻癸酉举人顺天府推官槩乙未进士

户部员外郎弟渠亦以省元登丙戌进士任太仆卿业治儒术未第俱先公卒集官生都匀府知府公天性嗜学弘治丁巳甫六岁即欲从兄治业文简以冲靳竟弗已比长慨然欲尽友天下士德业日益茂正德庚子以儒生应试补员府庠及弱冠文简爱携宦邸学易于汪东麓太史领其微奥发为文词弥无尚焉嘉靖壬午大中丞浚川公督东士阅其文以伟士奇之是秋领乡荐凡六不偶于春官辛丑春文简书谕有命且又致尔年我暮之警及是亦显扬之道公得书志以命制遂谒天曹授守泰仓编氓当海寇初平流移未定公推诚兴发曲为招来复安如昔州东境旧筑堤数里用虞潮汐厥利维深岁久骏夷兹为民患公毅然增修不扰而矗峯宛然士林赞永赖焉壬寅文简公寿登八袞圣天子笃念元老驰遣抚按官及门存问公荷主懷亲守官云望将图海岱长春之庆维时文衡山朱玉峯太宰泊吴下缙绅且绘且文以从欢祝遣延照子恪致遥寿张天恩慰庭怡诚一时忠谊仁孝之盛癸卯侍史周公南疏荐畧云纯诚笃慎练达老成除奸弊而事克有济理海虞而民利无穷遂调知和州盖移简就剧彰德辨才也行之日迺以来苏留以去思道路相属得民若兹亦鲜矣及视和城闔故存雉堞楼櫓已就凋敝公曰预备不修何以待暴非政也殫心力惩苟且不再踰月颓者兴敝者焕矣和人慰维新之仰初文简蓄文稿二十六卷归田集识二卷圣朝存问錄二卷久未传播虽文简不欲彰人而人未尝无探珠之志也公匀序于徐崦西少宰捐俸梓之文简手书与其显亲继志之一端甲辰公入覲倾境遮留相与歌诵不尽懷私侍御舒公汀疏荐畧云性资老练事务精详真实心以爱民堪任重而致遠复改西陝之干州蓋抡才试用倚効边筹也居无何公以塞程巖嶮毫亲杳隔高志拙于盛时孝诚违于西日辄解组浩然以东慕乎干者亦犹慕乎和与泰也琴鹤以随黜闻长物会太仆都匀二弟咸以省还金紫相庆乡人以古万石荣之越明年乙巳夏文简翁不起公获侍属纆咸自尽焉公可谓有感有见也寻与二弟谋请恤典悉获如制戊申建祠寝东遵礼奉祀公彷徨祠墓间永慕弗替冢子延照以恩授尚寶司丞考绩进公奉直大夫制词有世家宿学科目流英仕罔玷于官箴居克敦乎乡行之褒公稟受灵淑虽抵暮气鲜失平庚申夏偶撓微疴即不就砭药至五月二十有七日寅刻处正寝神闲气定无乱无惕从容以還元化公生弘治壬子十月二十有七日时距终期享年六十有九配雷氏赠宜人莱州卫指挥勲之女也前二十有一年卒继王氏封宜人广西南宁府通判廷臣之女侧室姜氏子男三长延照尚寶司丞次延慧次延炯俱府庠生女五长适莱州卫指挥张栋次适平度州国子生崔旦余幼孙男三长引增次引坝次引来俱庠生女孙三长聘莱州卫指挥王道男梓余幼曾孙男一鈇曾孙女四公孝友夙成事亲曲尽其道虽宦游异土时献不爽约以自奉享祀致涓笃爱宗亲终始不衰晚年与季弟集偕休林壑觞咏陶写琴瑟好合王谢高风非尘庸所知垂训以善继居官以清慎恭无谄和无骄人咸慕之守有先庐扁堂裕庆郭田百亩他无厚蓄清白世绍无改焉每春秋扫祀躬率诸子若孙礼成齿序文会尽欢而返居暇则坐一室图书前后日夕潜泳随笔词章不事雕饰浼理可爱着有行斋手稿数卷藏于家善行书有晋风公鸿

笔懿行媲美前修不幸制拙礼闱拟古则过人远矣况位刺史寿古稀萧散溪壑历久完
名无异议公亦人所难矣哉某旧以通家兼忝葭莩其世系事业粗得考闻今墓且有期
始掇其槩畧僭为状托立言君子图不朽焉

海壑吟稿卷九

●钦定四库全书

海壑吟稿卷十

（明）赵完璧 撰

祭毛行斋亲家太守文

公辅之胄贤圣之徒社稷楨干宗庙璫瑚清才通朗辉映天衢武继三世芳聯五株
三守名邦琴鹤与俱白云兴思玄髮来趋抗章解组林石江湖桑榆承庆埙篪偕娱一觴
一咏萧洒从吾盈虚伸缩造化一途高标逸韵超然万夫峩南鄙叟乃敢趋隅乔丝不弃
惭与葭莩笃我恳至慷慨交孚情瀾不既玉魄阳乌送我魏阙识我区区秦陇懷君同味
秋鲈江山十载胥视凋枯哉舟未剡君豎回卢君垂凤爱我抱今辜悲心忽折泪下鸣鸣
临哭未即窀穸罔图支离莫慰幽鉴不诬遥托哀诚以荐芳醕渺不可测天浚愁予迹不
可招奏鼓吹竽瞻望咨嗟何射何虞

代祭匡环溪文

闕闕之裔雄于海乡清俊之才沈于林塘陶真觴咏娱情文章竹林逸韵莲社清光
一经垂训四国斯扬桂窟秋擢桃水春芳惭予不肖谬附翱翔昔分南邑庆过华堂今还
北覲嗟慕沾裳悼彼电露胡存胡亡公不我留我为公伤仰公一哭谁云非福五十余龄
不称殒速身弃国荣子崇君禄忠良有声公遗之谷紫诰濺泽黄垆永沐泽溢松楸芳流
山谷顾此殡宫梨雪春风淑嗣有情王程倥偬不遑素车结此丹衷聊尔薄奠以表无穷

代祭刘石渠给事文

君负隽才迥茂佳名君崇令德宜寿此生胡方阶于青琐儵谢尘于玄冥小试秦关
甫兆大行苍生不幸夺我豪英仰昭昭之祸善窥渺渺而未明追忆淮南慰聚风萍瞻望
悴颜恍尔惕惊送君南渡烟水關情闻君北归鸿鴈稀征拟云闲于海山冀日休于蓬瀛
胡为乎卢扁无功哀此同盟江乡杳杳幽襟痛盈乃今过便一吊孤檠酌觴在手不觉失
声

代彭麟野祭丘母夫人文

呜呼母有顺德藹如慈祥母有令范则于家邦佐宜君子闕闕用彰肃有懿训薰兰
丛芳秋捷春荣沧岱辉煌耳目魏阙勾陈孔阳国崇英俊贤哉厥昌峻惟作艾焕锡宠光
龙飞凤翥猗欵青乡垂白珠锦鸠杖华堂邈禧优优既寿且康理数之极今古之常顷复
莞含九地何伤幽明一情乐意洋洋业惭菲陋瑞鷲相将春霆桃水偕我翱翔微萝罔弃
寄托千章久揖堂下沐德何疆闻母之讣惕母之亡纷我涕泗絶我衷肠适我先慈三载
未忘还侍天陞执紼不遑道出琅琊展我心藏愧无生刍忝有勺浆秋风萧萧愁云茫茫

青眼同袍靡恃雪裳离魂飞越灵鉴我傍

祭宋南亭举人文

别君久矣莫挹夫咫尺望君邈矣徒仰夫空碧君之文章散为云霞君之徽音寂夫泉石君之芳声早已达于云汉君之奇才犹未试夫霹雳惜哉逝而沈珠毁璧哭君以彩笔言尽而思深吊君以朱丝琴破而恨积旷万古其何期适星霜之两易抚九原其谁招冀椒兰于一格忝君娅戚痛君夙昔泪凄凄以冲襟风稍稍而过柏

代春泉兄率诸弟祭东溟翁太叔文

昔我先大父畎亩高人树德绩学志存廓清屯淹未扬产我先君及叔父举有奇资时以达人致望其谁曰不然弘治戊午秋我先君膺荐叔父失利先君尝憾其不得为苏氏同荣且曰我弟负隼才必魁东人终当不陨厥闻芳声嘉誉震灼海隅莫不逆知其非尘埃中人诂意本难殊珍竟遗漉漉可若何孔子曰贤不肖才也遇不遇时也叔父亦久谙斯言安于所寓又焉怨嘉靖癸未有司贡于朝分教西潞文泽汪濊上下悦之庚寅春奔我先大母丧越明年叔父以疾终于戏于戏何痛如之我先君宦游七载倦还叔父甫出先君卧疾鸿绝离伤兄弟不获一诀而逝及叔父来归我诸孤咸庸劣失怙仰其抚我佑我义训我等动定其又或雨夕风辰春亭秋圃娱情觞咏彷徨阮谢清风所深愿也不图皇天罔吊爰弃我老成宗亲兰荪其摧矣琬琰其碎矣迸泪失声潺湲其如霰也吾弟楚珍负梧篁秀姿抱鸿鹄远图信叔父所未信者拟在斯人叔父其又何忧廷璧不肖粗通书史忝厕下舍无足言我母弟完璧淬砺不堕亦欲罔忝先世而白璧又进学未艾所可哀者我母兄良璧殁于去年之七月而不得同哭于柩前是为泣尽而心死也幽冥如知覩我先君暨我兄妹骨肉相将顾念故乡事何如楚恻家势殊昔书生亦悉有令图叔父其又以是为先君慰焉尔者楚珍弟卜于容成筮于巫咸曰维庚申是为佳辰将厝之王村之阳以安窆窆廷璧等致薄奠临哭之呜呼薪我享

代同乡诸朝绅祭杜太翁文【即墨杜介庵进士太翁也】

福莫大于寿也而公惟遐龄寿恒本于德也而贤嗣足征瞻沧溟而缅怀逸韵迹玉麟而遥挹芳声德教如春公之器度太虚也茫然莫测义训名世公之文章龙蛇也变化可惊康济之学曾无少试于一匕幽潜之德竟亦淑伴夫寒星鸿鹄高翔于碧落蕙兰独秀于中陵陶意海滨弄涛声而金紫长辞于烟驾放怀诗酒翫云影而利害不怵乎天精公所不得于人者得之天厖眉鸪杖迥出风尘之外公所未信于身者信之后凤毛虎变垂光虹霓之明公其无知耶其有知耶黄肠虽没于穷尘而玄垆殆开夫一噓公其果逝耶其未逝耶雪羽惊翻于华表而金身或脱于五行兰香系属盖邈乎其难仿蓬山密迹信萧然其先登但悲莫悲兮银烛凄凄父不得易箴于其子恻莫恻兮金台渺渺子不得招魂于其庭抱黄泉之恨者夙阙华封兹莫待以膺夫荣宠慕昊天之德者龙章美赠终犹可以慰乎衷情春风荡而梨花飞回首英魂之莫即晓烟开而山水绿堕泪颓波之益增某等哀哲人兮天浔冥冥送孤帆兮杨柳青青灵不返兮芳草芊芊杯不干兮忧心忡

仲

代祭同年丘肖林太守墓文

仰君桂芳妙龄腾光渴依辉采百里渺茫甫丑之春挹袂易阳彼苍莫违合并孔良
慰斯兰臭江曲徜徉忝君尺木比翼翱翔媿我萑苇伊迩琳琅看花春永翦烛宵长胶漆
异境风雨连床岂无同袍谁其范张岂无相知两世相将我志子心子无我忘歎焉而涣
波骇雨散南北相违天涯目断淮水悠悠塞云漫漫懷子沈疴冀子鹤筭五马方来胡遗
一旦并讬江飞爽越意乱天乎斯尤夺我良俦摧此玉树华乃琼楼春红雹碎夏绿霜休
九霄子期夕景子適予独何心而不凄愁泪尽千里抱痛曷已吊不及哀祖云邈矣梦魂
劳思寸心负此绿琴悲鸣原草青青一死一生何如为情扰扰逾时岂易生平遥驰一觞
敬酌幽旌剑意犹存不罄遠诚

祭逸庵丘翁文

公雄豪之气英敏之才制荷结蕙铲迹海涯不以显慕不以隱忧殆古之有道君子
今天下之不可望焉者也然盛德无当世之荣于穆有丰后之报月林仲嗣琬琰淑姿凤
麟嘉瑞非由庭教曾不信然乃尔早擅科名显崇枢要天下想望风采罔不有太平之庆
公之意于是乎殆慰矣乙卯冬歎然来京曾不知凝沍之严驰驱之艰其君臣之义父子
之仁蓋两懷之也谆谆详切辅郎所未及而勉旃以清忠高节此真爱主上无己而因以
爱子有道欲凝其志使无分焉公其贤矣哉既而浩然东还吾党诸贤弗克为迟留之计
祖侍道左瞻望芝颜不惟知仁者之必寿而且逆识豐铄翁之终迓天锡也兹闻逝矣精
爽飞越五内痛伤夙有葭苕之好今不得彷彿其形声素有山斗之仰今不复揖其辉彩老
成云亡吾道其可哀也夫呜呼我心有恻天道不诬七十余龄不为夭矣贤士登庸不为
穷矣子孙绳绳几于昌后矣异时龙章焕九原之光不以死而亡矣公于幽冥不亦慊乎
哉但高堂云断于海天孤儿魂飞于蓬阙生者倏而歿萃者忽而离造化无常人事靡定
变若浮云运同逝水此不肖所为交痛于相知对泣于羈旅也吁噓其戚也何涯其灵也
何招姑一酌惟鉴之

祭妹丈黄海野文部郎文

嗟乎公逝矣于公何言哉公灵鍾海岳贞超尘埃落落胸襟浅鄙莫测德谊评于乡
闾文章品于翰苑政在朝廷名在天下何假烦言但三十余年缔结亲情有莫能忘焉者
如春如醪温然藹然同胞之爱出自纯诚骨肉之好久于初竟发我覆蒙达我幽曲虽同
乎相接殆异乎相遇也方公小试夏郎予亦叨业成均值偶燕亭聊足相慰者几再易寒
暑复无妄适灾于奄忽风萍各涣于天涯可乐者无几可悲者寻至矣相续来归违越百
里烟草芊眠尘机萦滞情虽亲而迹益疎虽公之再起再归日月逝而会晤稀青眼寥寥
白髮种种矣况乃牵丝冀北解组關西中间相去又几十年鸿鱼固不相弃而留想亦自
遥然也仰过公闾扣门秉烛把袂披心悲欢交切览容鬢之凋然慨精爽之殊昔且惊衰
老而犹喜有香山之约也指屈海峯遥期胜槩拽藜云石帆锦烟溟扫残红于春醉采落

英于秋风拟襟抱一时之豁如式尔我崦嵫之奇遇也何意宿陨山摧老成云逝冥漠其不吊矣哉闻讣震惶魂越而泪血悼离合之靡常伤岁月之莫待公其如遗我生其无意矣夫肠断遥天扳鼻罔遂托爱子执絮酒一表厥衷呜呼公不以生乐不以死哀萧然于造化中与元气相徘徊今古谁不死公何恋于尘埃墓门寂寂雨雪皑皑白杨含风玄泉生苔生人之情曷既逝者之往诘追三甥在傍英爽若来九原冥冥使我心摧公其风云而浮耶水之在地而沈耶精爽攸寓将无感于斯哉

祭亡婿毛尚竇文

呜呼子之心胸涵千古而莫测子之才华岂近代之易得聆子之唾嗽琼珠绮粲之悦心依子之光仪玉树清标之动色诗礼浸涵自五马之庭金紫承传本三公之德北超凤阙匪懈之义履霜月于娟娟东慕鹤巔无忘之诚睇云溟而惻惻播芳声于畿辅以得御为荣仰芝采于依稀以封侯未亟忽凤台而失侣屑胶水以求皇荆布不鄙幽燕相将海人衰晚爰资清光岂意帝简金城一方忝与葭莩朝夕相忘久子之处也饮醇醪而罔觉其醉美子之度也探渊海而莫可或量把酒论文落青灯于残月鸣琴逸兴共清风于伟篁盖冀其同游百载尚虞其各宦一方何意一疾之奄歎竟致百医之莫良仁者必寿兮子何为天天何迂阔兮善有可疑要自有数兮今不能移而尚亦有报兮胡可度思秋风淅淅兮使我心悲燕台凄凄兮老鹤如痴惟酒兮在罍惟痛兮有情魂来归兮鉴此诚泪不断兮吞此声

代京师王次庵举人兄弟祭亡妹文

呜呼淑人复能靚闲雅之貌耶复能宁故里以慰骨肉之情耶翳其长逝而不可复追矣夫神飞越而震惶气填胸而泪渍尚忍言之夫以柔顺之德谓其可以衍后也而椒聊摧焉坚贞之质谓其可以永世也而昆冈火焉得非冥冥迂阔昧以难明天道有足憾而人情有不能堪者耶然青鸾杳而瑶池寒顾氛浊其莫撻霓裳迹而琼楼迴何世俗之足恋淑人谅其有归矣柰离肠断而骨惊方寸死而魂销其招之何据挽之何由也哉览春花其在目挹寒松之可哀清水凝而留想素月流而恍惊淑人之去若不可得而知兄弟之情抑岂可得而或尽耶况高堂人散于斜阳南浦鸿分于夜雨谓存于少者可延而后于悲者相庆矣今复若兹殆出于意之所弗及而事之难以逆焉者矣亦复何如其痛抚焦须其若割慨睿谋以何偕曹闕虚而影灭秦台寂而声沈兰熏充堂醪香泛笋同胞之酸恨无穷异路之芳魂莫即呜呼呜呼其来归

祭淮邑通家翁文

呜呼德蓄诸躬幽岩沈而未扬善熏诸远颍风易而淳龐不以其销然者闷然于懷乃以其充然者畅然于乡井里之璞含光短褐空谷之兰敛艳羣芳衣薜萝兮以歌以觴老岁月兮惟瀛与沧淑后之义要有本于严诂达人之报亦何爽于玄苍奋迹青云大魁天下征昌白首晚慊斜阳廊庙之猷其庭除之蘊奎章之焕协褒锡之良韦布珍于万乘波泽演于无疆噫然宇内而何忧何歎陶然冥漠而匪存匪亡通家之友情每關於哀惻

执紼之违迹有间于渺茫匍匐后期望松楸而絮奠愧惭无既扫泉台于芜荒灵兮来兮
我依我将

祭内叔高翁文

公跌宕于山海间垂老犹有英气八十余龄酣歌陶陶不役声利终始克家之操共
德无忘平生力善之心早夜不寤纯孝之诚老而且慕垂训之良义方无替诸郎滚滚冠
裳跃马季子昂昂风云展骥昌于后者垂黄曳紫九地华荣光于前者飞龙舞凤九天宠
异悠悠冥漠中玄鹤昆仑青鸾蓬岛则又何事婣媛于尘世然而熏斯芳也酌斯浆也南
氏之于尼翁岂无挥泪

代祭年家孙翁文

哲人逝兮江之水汤汤灵莫拟所之兮云飞大荒纯德何依兮蓬瀛景望英闻不朽
兮清风以长淑嗣不偶兮玄报未疆追琢有自兮美哉珪璋忝附骥末兮窃淑余芳遥藉
庆祉兮云衢联扬敦同袍兮抱寸心而夙降延世好兮趋杖屨之未遑山川兮云雨异方
苍苔兮日夜以黄二竖幻兮侍药罔将石城郁兮梦魂渺茫切哀感于区区负遥懷于未
彰两媿幽明一罪沧洋顾秋巔以游神托霜鸿以致伤楸梧悲而西风淅淅寒花萎而宿
莽苍苍洒涓滴于云隈达诚欸于海乡遠兮迩兮我心有藏灵扬扬兮慰我以回翔

祭丘母夫人文

呜呼母之谢尘寰而去也曾莫掩乎云旌母之歷清虚而游也伊何慕乎遥征蓬瀛
归而波浅瑶池返而花明偕萼綠于凤驭追杜兰之云輶挥珠玑而弗屑委锦绮以何轻
蔑泥封于宸极锵佩玉于太清超氛埃其如遗陟仙界于渺冥有范在庭有训在经有子
维楨有孙惟绳福寿岿乎兼美生死允乎两荣早内交于贤嗣将以淑孟母之芳声越山
川而百里竟不慰范子之幽情违晨昏于海曲忽飞讣而震惊愁霖冥而秋徂北风发而
寒凝某也歷墟莽登丘陇而西来于以敬祖乎佳城和薤露以衔哀俯金扃以致诚三酌
瑶浆一哭玄灵

代诸僚友祭边太夫人文

呜呼母之逝也良可哀伤母之生也曷掩其光产自名闺春松茂清标于烟雨归于
巨室夭桃成淑教于家邦属既絕之哀弦辛苦无违戒鸡鸣而弗怠拂先遗之弱鷲劬劳
莫恤慙葭絮以何忘既而秦台凤失只冷孤杨郑馆兰摧一存两亡天地永而竖百年之
苦节水霜冽而繫万古之纲常分熊檠于寒宵勉学小子刃机丝于暇日激绍先良不欲
坠厥绪者母之贞志必欲昌厥后者母之遗芳果而挺桂林之仙枝香浮蟾窟出芙蓉于
綠沼秀絕帝乡玉阙生辉赋羔羊以裨盛世金郊播誉屏豺虎以卫明王萍踪倏而相值
兰馨契而相将令范表清朝而勲茂醇德醉素交以心降光于君上者母之懿训益着风
于僚末者母之余泽尤长将觐协斯人之愿也攸而弥久厚彼苍之艾也寿而且康庆泰
岳之崔巍遥递孟鱼于故里沐恩波之涣演终慰莱彩于高堂君以子贤賚遗有隕子以
君祿仁孝未央何意桑榆暮而悲泉沈景望舒缺而婺宿韬芒珠没瀛川地下抱倚闾之

痛恨乌啼燕树天涯忆杖鱼以彷徨报乎我者无尽抚乎我者何殃呜呼母谢尘界也山川还秀母遗贤俊也金玉其相孔雀堂深乘龙美青钱之选钧天日迹石麟荣紫诰之章黄泉之幽母其容与青冥之表母其翱翔扬凤旂兮吾不知其游瑶池与琼圃纵鸾驭兮吾不知其偕萼绿与兰香某等感风云而洽骨肉于一旦哀鸿雁而横涕泗于万行忽匍匐以惊骨载夷犹以断肠北风萧萧兮寒山苍苍朔雪霏霏兮阴烟茫茫陈絮酒兮灵于何望送水涂兮子于何方吾于灵慕兮诀绝太荒灵于我感兮依稀在傍

代高氏兄弟祭管子暨贞妹文

呜呼桂林芳枝昆山美琼何青妙之未扬膺玄召于太清而淑人之相从以殒且莫窥其衷诚生同欲也灵胡捐而自轻死同恶也灵胡爱而独成毅然有以彰天地之大经卒焉无以为骨肉之至情父兮懷汝九原未暝母兮笃汝双璧斯迎同胞雅爱鸾凤飞鸣胡隕尔天胡累尔生视尘寰也若浼趋冥漠也若荣何苟生之不可何苦节以用贞果于自沈不以一勺或慕忍于自毁不以一息易名超然之识出于凡陋烈然之操冠于豪英谓盖壤之博也尝以一节而独咤谓古昔之旷也每于列传而曾惊迹者金玉之质产于同气冰霜之烈赫于家声诗书表垂世之泽山川还储毓之精白髮哭青春于芳草红泪吊淑女于佳城且不知其死可哀耶行可尚耶聯旌辞祖举将茫然于蓬瀛

送疥文

海壑老人七十有三齡病疥痛痒搔楚不胜眺望无痊三年于兹闻昔人有病穷而恣于鬼送之以文余因意其兹或有崇焉者戏效以送曾闻以邾娄取喻者谓患不及于腹心乃有赋楚臣好色者拟秽恶之益深始焉肌肤隱隱芒刺阴侵继而突颗累累珠玑浸淫嗟痛痒之无时悲日夜而难禁搔之而素雪零蠹深无内顷焉而红露渍灼燎在临当宾祭而蚤虱潜伏处燕闲而爪甲相寻据不安于绮席僵不妥于锦衾踏月寻阶而如慄倚风搯杖以曷任牙籤在案卷舒惟倦停披晴窗忘情文苑屈伸愁予囊弦索如宫征不调鸾鹤云疎国手从敌而未瘳虎穴得子以何由猩毫艰于健握骊珠滞于探求纶竿暂歇何意垂钩斧斤且息无事樵游徒袖手以窥云谷聊微步以倚烟楼掩镜扇焦心不愜蓬首垢面残躯如怯自冬徂春拟除旧而更新继秋复冬转纏綿以相因胡寒暑之屡易但生灭而仍频虽康齡其莫支矧颓年而苦辛覬冥逃于壶觞寻复增剧欲効灵于药石累见无真良平无以售其智卢扁莫以善其身计无所出筹何所施心烦意乱志倦体疲默仰圆灵潜祝方祈大而四时之运神有所尸小而一人之身鬼或所司如游光之肆疢疫方良之恣阴私三彭倾人于不善二竖为灾于出奇或扰于内而沈痼莫及或凶于外而反复颠危适来之咎乃不滋疑渺然衰叟何以罹斯其或不能夺人锦攀天香持毛槩战文场振修翮于云汉奋独步于骊驩负家邦之覬望销海岱之声光降罚手足乃若此耶抑或不能献策金门纾诚帝阙挥翰玉堂分阃铁钺勤奉主于鸣琚急亲贤于握髮甘贫贱于清时徒懷安于沧渤厚愆手足又若此耶思之思之若将有知甫自成童功名念兹红颜白髮得意无时不炉不扇手无释卷暑湿风寒晚齡末见原积渐而身灾更

崇愆而神厌或不事犁锄专尚清虚锦衣华堂寒热媒且彼幽斯瞰患曷可除伊戚本于自贻蹊田过于见夺被其毒者甚于水火主其柄者欲其转斡以富可恋欤世宦清廉而自若家声琴鹤以相承汝将穷奢而极欲我非金谷与铜陵以贵可附欤投簪二十余年结蕙海山云暮汝将炙手而趋炎我非权门与要路反复长意愤惋不直学道平生四体罔失撝谦敬恭素履坦易薄冰恐陷琬琰如执蹈舞何知乐兹乐实尔称为鬼号曰通灵胡滞于一胡混于冥指摘万类用裨纪经德惟锡祉恶用不宁乃有倍孔子之四达道蹈孟云之五不孝翻覆云雨贪残虎豹钻缘相高奔趋胥効挠乱纲常蠹壤礼教尔宜横其崇充其类变而通咎而备使之痒疴以反其躬自其疾痛以杀其恣于逆党死而后已虽偷生少焉知忌不愈于无妄以肆灾亦足为乖气以致异盍知往而察来盍异趋而斯避便须遄驾速宜纵辔兰熏椒醕之莫陈桃弧棘矢之将累若其慷慨遂行是谓有知且明如复夷犹濡滞乃谓无识而盲寻毕除而无悔其戒满而恶盈呜呼别矣式将诀今天下之情动之惟诚黯然销魂者原于意气之相倾愿为比翼者激于交好之莫并尔于我乎何荣吾于尔乎何矜伺行李之将戒觉微躬之方瘥为歌今日之骊驹效赠昔人以不拜

海壑吟稿卷十

●钦定四库全书

海壑吟稿卷十一

（明）赵完璧 撰

与丘月林给事书

前轩车东来未暇一言而返久许劳思不慰片时歎教怅恨何如闻即吉坐失趋候衰病穷居艰于动履惟赐体亮想北行不日此别仰陟钧衡慰瞻盛世而丘林野老日趋凋朽再图良晤河清之俟更几何哉兹遣候情抱无涯书莫能悉临楮怅然知复云何惟知己鉴原

答毛行斋太守亲家书

牛马走蠢愚无似苟延五纪何益明时消损天日负媿良多岂期谬辱盛使惠我好音眷我珍品捧慰登嘉感佩宁有既耶尚容遣候使还暂此伸谢

又

数月来家务琐冗未遑驰候适闻道体违和鄙懷切切徒抱趋侍悃私奋飞安得想斯文之系匪轻吉人之佑有在拟复妥然倍常矣况君家孝子慈孙自善调摄无忧也谨专人赍小牍奉问惟避俗清心重加玉爰以永仙龄以慰天南寸慕不备

又

前令孙回已具启谢近闻海屋初度在即拟将趋瑶台执霞觞以効蓬山庆诚奈尘冗衰疴不果初志且若之何北望迢迢耿懷无已敬遣苍奴持罍酬笼果少将逖忱其为我頤挥万万

与舒城孙生书

畴昔邂逅京邸垂我欸私示我肝膈揆照凉薄何缘雅遇胡十余年来去留异迹离合靡常风尘中令人常抱惘思曾不得把臂朝夕以敦旧好情如之何卯科仰冀魁名蕘屈既徂午年倾候垂光转加落寞是何不遇之数耶而伦绝见忌耶抑亦晚成而大器有需耶兹者酉宿天开文光照于庐岳想休征端在子矣秋风发而桂馥春江波而花暖得意骅骝长安之胜一朝遍矣不识通家儿曹获蝇繫否不肖苟禄西城五年余叨擢巩昌出监靖虜邈在边陲荒山紫草殊绝中原虽上下之情每有相宜而风土之薄良无所赖甫半载而来琴鹤萧然海山恬若科名眊矐于少年勲业衰颓于青镜阅来世务贤否之乖宜清浊之异遇物理颠倒幽独祇默于邑耳然又尝窃仿达人之观乃不顺适所天也耶栖遑林壑庇以先庐给以山田诗酒琴书此焉自足莺花风月知己无多惟此老焉竟何足齿适舍亲分教来始以彼之获依于执事为甚幸而继以不肖之得通于门下为尤幸也草此聊陈久旷怀私琐琐无伦惟高明赐亮

与任丘边通府书

别来久许不奉颜色怅惘弥深闻候京师不识擢补何城想暂复而大迁矣美质清才真明时利器他日宠荣曷可量哉何似不肖迂疎方棱动见触连滋谤贾祸竟所不免委弃山野适分之宜粗有敝庐薄田优游海上与林壑居与云霞侣鸣桐酣醴散帙咏歌琼林桂阙付之三郎秋月春翘陶于百岁清狂野叟何足为朝绅齿耶但夙蒙雅爱会晤无繇而音尘旷绝不敢不以私悃相寄也前所托海天泉壤二册近曾注意否倘不见遗万一获协初志没齿曷忘千里惓惓不胜遥恳之至

又

违教六载忽焉逮兹海山修迥光景迅逝奈老怀何哉林谷岑寂偶辱华札兼蒙珍惠自天之陨感媿何如捧读间既谗大擢曷胜欣忭及再闻尊阃谢弃之变震悼不任想鸾续已久探珠消息近不识几许也此亦不肖为兄宿怀焉者然瓜瓞末丰理数必至敬候佳音足为遐慰苏鸾回敬此奉谢仰恕不恭切切

与济南王罗溪通府书

别来数载梦想光颜无由为慰每念畴昔叨侍京师稠人中俯辱高情方寸怀私刻镂何能泯没适闻荣擢东藩佳声腾播溥延海岱君侯奇绩南北之间亦伟矣哉大拜明时画期可待不肖西陇来归栖迟海上鬪山渔水聊复终老恶足云小儿慎几以省试来谨兹候问惟台鉴不悉

与王冠峯书

再辱翰札谢谢别忽半载淮海悠悠何如为情抚良时抱长忆耳闻舒之士风纯雅土俗窳窳兼际一时之盛慰慰惠来渔歌奇谱小试颇佳但讹谬太甚烦暑中不暇密审姑候凉秋徐按之以副遥爱使旋暂复祈赐照

盐城答王冠峯书

昨淮上人归得手教知浩然高举抚掌叹赏急流之勇当时孰有逾于君者烟溟云

峤恣意徘徊况壮年强健天趣无涯不肖又输君一头地虽然沧浪潦倒中且犹勉尔竟为风月主方日夜埃东携取枯桐古音以相陶写于云水之阳每欲奋一扬翰蓬烟杳如楚天莫慰且若之何怅怀怅怀羽便率尔奉候凉秋萧条瞻慕不能为情拟幽人会此区区是仰盐城

与姜石泽封宪老亲家书

别来不亲教范奄歛逾年桑榆契侣顿致杳违淮海浩渺中时复令人回首俟期而旋何如慕渴吾兄颐养沧溟陶意种种天禧无涯而相业有托景羨景羨不肖从儿曹小宦邸肩钥閫寂不任结束仰东山杖屨徒五内燥热焉耳便中小致问私余再候

盐城答黄海洲书

仰间忽承手札兼再辱宠贶谢谢吾兄晦养云需会心鱼鸟于势分莫撻清旷之娱迴自翹企不肖凝寒中逐孱弱书生閫羈粉邸顾淮海烟云不任惆悵冀春来旋旆以慰夙况且复伺通猿鹤或有期也儿曹株守小吏久忝素延祇貽遥莞尔来教已悉想阅阅遗声贤德休光自足感人于无既自分卑微揆不为人重轻也勉令转为裁候聊致葭莩至意以自尽耳敢遽图君家补益云乎媿媿鸿返此复希原照

谢平度崔生

畴昔京邸辱枉未遑从容聆唾音抱歉未既迩年来儿曹往返取戾门下良多鄙懷耿耿忽复琼函有陨珍品猥颁捧诵拜嘉顿令惭汗豚犬儿谬附末第曾无足齿道沾被宠锡若此怖感曷胜久仰跌宕雅懷旷逸高致海山风月中良俦也何白首衰残经年百里竟不获一挹芝采探玄机淑道妙川逝悠悠俟复何时此为怅恨使还仓卒敬此附谢与即墨汤君阳大尹

迩闻宠陟鸾音别荣熊驾林壑慰然可谓无负贤劳矣似于俊才伟绩少有不协殆明世登良要有渐次隆崇之典仍合旦夕期也然体国仁贤应自有后获深识鄙窥何如何如但墨水苍生无复寇借胶湄黄髮靡从斗瞻兹焉怅尔早图叅谒之行适为良晤何意并坐尘闕尊驾税于王而不知寻候于姜而弗遇再要于匡而星轺长往矣纵横颠越仙迹杳然徒令望尘愧恨负罪庸何可言敬兹遣谢兼附鄙稿用尘清阅佛头之秽诚无足云亦聊以竟严命尔统惟原照

盐城谢刘雪溪太守书

仆衰残朽质沈迹溪壑方过眷西伯顿睽南服周悉高情备辱临岐殆偕日俱新也迩忽秋暮春回海山如失清颜旷别梦想何依窃念濒溟枯槁罔不慰被青阳顾区区末路邈越楚云可能侍粲花于清飈剪芳兰于良夕叨恩如昔耶白首驰神青冥録羽俟时而东恶知其九霄灵凤千里神虬亦焉攸寓嘉乐淑人竟我心惻奈我翁何哉风便小裁敬致遥悃岑寂中不尽惆悵仰冀德涵万一

答纪鉴塘司徒郎

忽教音猥及高情欸悉走衰朽林丘曷堪屑惠无乃德之至爱之深不我终弃尔耳

足下清才朗识巍陟徒卿进依英主退协仙僚优游鹓省中议政论文自是青云奇趣昔人谓向长安西笑企慕何如时复大擢柱辅拟树无前伟绩于昌期走之所遥钦而仰羨者指可胜屈耶且不替儿曹旧好泽益有归感念殊切逃谢幽忧良莫能极潦倒岩阿强勉报候第恐烟霞鄙悖唐突风云取罪万万清秋爽飒塞气高凉息冀玉息以将天休临书怅惘无既

答福山郭嗣翁尚书

瞻企间忽仙翰俯临兼天机有陨发函媿感仰谢仰谢顷在淮咫尺无闻坐失良晤令人惘恨不肖自南归俗务纏牵殊乏清兴新声旧谱两负夙心向亦无得今且几忘矣闻山居吟得之桐庵者想亦造妙而阳春樵歌曾记于边邸谱赠或亦不可弃也数曲之雅真足以快适东山矣又奚以多为哉然尝缅惟高致风月边空复劬劳每有东劳之思海市之想俄慰此行拟当一候门墙然白首桑榆知复将来何似亦聊云此一胡卢耳党人之变诸子侄元妄被灾苦何可言幸昭然余不足憾矣辱蒙言念感感别启来教已闻命今亦未敢轻拟其人俟从容驰报

与安丘黄甥茂才书

久旷情疎殊切懷念向闻春试优选欣慰不胜既而秋麈失利更增怅悵然妙龄青紫时复当芥拾也云霄天马何患于暂蹶耶但淬砺无辍以速嗣前武丁宁耳吾庠吴冠老俊逸高雅人也今擢贵庠教长将渠泮生辉春风转徙也子其善事之渠修吾胶志创稿未半遽有此行将携彼处终之及思我先君墓志乃若翁海野笔也今原稿已遗想贤甥家藏者犹存可检出録致以备风采盖首欲不泯英才鸿笔而先人实行亦赖以不坠吾与子不偕慊于心乎子其念之临书不罄私惟孝子仁人鉴察之

答章丘胡湖山三尹

适辱教翰切慰渴懷幸接玉郎再谗吾兄二十余年履歷动定深恨璠玕重器不获大扬明时轆轳■〈山儿〉岬竟致山野遗逸自君子观之不无倒植之叹乃闻诸郎若孙桂兰丛茂秋来当自有効竒捷者不将以信兄所未信耶亦姑陶适烟霞从容迓玄锡耳窃为默庆之再忆畴昔都城一覩英风而豪人意气便投肝膈亦倾盖犹夙契焉者未几儻别悞触权豪犹赖故人夙爱致蒙元老科台俯为垂手公论不泯而濒万死者仅得一生何幸如之偷生苟禄忝擢巩昌塞垣凄寞良非衰老所堪六越月而归乃酬素愿栖遑海岳间犁锄编简传家旧矣海诸郎以是老焉已也何意二郎慎修滥叨甲第蠢子迂翁实出望外及谬尹盐渎亦尝俯逐琴鹤聊适晚懷于淮海也三载还儿复忝附郎署曾何劳绩近补维扬令人慚悚不肖衰龄适今七十又七老荆少五岁而相偕豚犬儿三慎几亦叨廩慎动附庠末小孙四而做当志学畧知文字亦可粗继书种供桑榆玩弄也且拾先人之余材完小子之新第琴书余暇松竹盘桓痴延崦嵫余暎朝夕所不可知者亦一付之冥造耳吾兄果有东山高兴秋风春日引首西岑正慊百年志愿何如慕何如慕恃爱琐渎忘陋取罪仰惟老知己情鉴

谢维扬严绍峯贰守

久企芳闻不阶瞻挹琼采拱聆珠唾以雪洒衰朽尘抱空复驰神江淮耳窃幸儿曹
忝厕左右辱益良多琬琰华英不弃葭倚是为远荷昨儿书来启函得善册一帙仓皇再
阅乃知鄙稿也又复捧诵首尾佳篇乃知二公赐爱也本海壖野语暂藏之敝笥终当覆
瓿焉耳曷意尘之名家而且梓焉刻制端整装缮雅丽自揆鄙俚岂宜过蒙称誉重劳增
美若是耶无乃陶瓦贱质朽株弃材悞饰之金玉章之青黄耳爱之深宁不使媿之益深
乎又闻垂念贱辰猥惠锦制珠光玉莹顿令南极增辉东瀛生色身膺垂老之庆家传不
世之珍也刻感更当何如便此统伸谢私衰眸病骨草次不恭临风莫罄鄙懷邈越天南
劳望靡既祈惟台照倦倦

徐瞽道募緣疏

窃以太玄溥化妙无外以何仁品彙肖形私有生以成性洪纖各足终始相忘禀赋
惟均得丧或异椿龄芝秀草木且复归根龟息鹤胎禽兽亦知有养是以智超苦海者不
同腐于尘緣见爽真机者欲高飞于仙界鼎湖龙去金华貽万古之思函闕牛归紫气协
千年之瑞然道不可以易致必假修为况神每限于难通岂宜鹵莽金丹妙炼惟须静定
还虚玄闕微机曾傍纷华入圣子晋长辞魏阙而笙鹤微茫希夷高卧华峰而云霞缥缈
故奋凌霄之志者宁久滞于樊笼竭慕贞之诚者不暂依夫燕雀哀人身之一失万劫惟
难恋世法于七情九贼何灭徐子崇辉自九龄而波冥银海返观紫府清虚悟百岁而电
灭灵山长往白云闲寂早依禅室苦空金粟如来日奉沙门护持贝叶般若竹槎曾卓锡
蓬云十载润袈裟铁橛再开山池影几年清智慧志上人力行妙道非不根徒诵狂言欲
了真如可期后世奈仙緣之犹在赤松黄石每神交矧芳名之犹存玉室丹台曾默识迷
途猛省脱抛身入身之烦急流挽舟会用铅弃铅之妙违雪峯而趋玉极殷懃窥潭底日
轮舍龙鉢而就鹤衣萧散翫山头月片修性而遗命何如性命之兼修得阴而失阳奚似
阴阳之两得江湖旷荡荏苒曾遇高真吴越徘徊繁华可能幽僻池亭水榭总为歌舞之
区野寺山房尽是游观之所北人南悞空嗟万里之劳红雾白头慨失半生之计利名场
覩破罕得披沙见金声色闕打开谁识被褐懷玉幡然故国何假蘧庐吾党多情仙鄉少
遇秦皇汉武尚厯蓬岛之懷龐萌海蟾且逸劳峯之兴挟清风而载返还思沧海扬尘跨
雪羽以言旋重叹城郭如故真人所至从之者云仍妙道攸存宗之者日盛望青苍而高
蹈欲慰平生跻危嶮以幽居用偿夙愿翠屏岩畔怡三生旧日精魂华楼宫巔接万里紫
霄烟靄罔辞尘陌他年之蝉蜕何期小结蓬茅此日之龙珠堪养金炉玉鼎顾佳地以何
妨水虎火龙还先天而有藉然身归静域自应削迹于闕闕道慕玄门讎合縈魂于世俗
若无外戶岂得内修世财罔施仙緣难遇穷乡孤坐初难气满而忘食多侶寡儲终当壁
立以待哺伏望四方圣众一切善流弘开惠爱之门大建慈悲之业负夙德者定图后効
于来生崇阴功者必致善果于旋踵施恩于不报乃所以广种福田力善于无闻亦将以
终归乐土黄金綠韞借天地以迎恩尺布斗粮托鬼神以降鉴善緣速结须知天道好还

恶报难明宜察人寿有几请为推心以利物岂谓假天以欺人庶大道可借以有成而小补聊资于托始阳谷之晷斯继于燧钻飞廉之功获济于挥翮势以微而裨着事以琐而助洪功同八百之中行合三千之内给孤长者事有明征元始天尊照无私漏诸天倾耳一体回心蹉失善缘幽沈难悔

海壑吟稿卷十一